

الشرقة

ومسرحية أخرى

السيد فهم



الشرنقة

ومسرحية أخرى

الشرقة ومسرحية أخرى

السيد فهم

مسرحيتان

الطبعة الأولى ٢٠٠٨.

يطلب من دار ميريت

٦ (ب) شارع قصر النيل، القاهرة

تليفون / فاكس: ٢٥٧٩٧٧١٠ (٢٠٢)

www.darmerit.org

merit56@hotmail.com

رقم الإيداع: ٢٠٠٨/١٥٨٩٨

الترقيم الدولي: 977-351-436-6

السيد فهم

الشرقة

ومسرحية أخرى

الحقيقة ..
كلمة من عمر الزمان..
كلمة تابهة..
زي موجه..
وسط بحر ملوش أمان..
زي دم بيجري فينا ..
زي نور قدام عتينا..
زي شمس بتلاقينا..
مهما ليل الحيرة كان..
الحقيقة ..
ياللي بتسأل هيه فين؟..
الحقيقة عايزة قلب يحس بيها
مش عتinen ..
عايزة ضمير لساها بينبض بالحياة..
الحقيقة..
روح بتبحث عن كيان.

السيد فهميم

شخصيات المسرحية:

- راشد : رجل أعمال - في الأربعين من عمره.
وفاء : زوجته - شابة جميلة .
عوض : الخادم
سالي : سكرتيرة حسناء.
عبد المواقح : المحامي .
مشيرة : فتاة حسناء.
سعدية : الدادة.
سامي : صديق راشد - شاب خفيف الظل .
صالح : شقيق راشد - في الخمسين
نافع : الطبيب .
المقنع : وشخصيات أخرى مقنعة.

الفصل الأول

المشهد الأول

حجرة نوم ... السرير في صدارة المسرح ... راشد ممدد علي
السرير مغطيا جسده بملاءة شقافة ... للرجل المقنع يقف عند
رأس السرير في صمت وجمود كالتمثال .

الإضاءة شاحبة... دخان كثيف يكاد يحجب الرؤية حيث تبدو
الشخصيات كأشباح .

دقات عنيفة علي باب الحجرة وعلي الجدران... صرخات ...
تشنجات ... يستقض راشد مفزوعا من نومه ... يتلفت يمينا
ويسارا في قلق .

راشد : (في ترقب وحذر) مين؟! ... مين!؟

(تتصاعد الدقات رويدا رويدا)

راشد : (صارخا) مين!!؟

المقنع : (لازال جامدا) مسكين ... مسكين يا راشد .

راشد : (يقفز في رعب) مين ؟ ... انت مين ؟

(ترداد الدقات عنقا)

راشد : (في هلع) عايزين مني ايه؟ ... سيبوني في حالي .

المقنع : مسكين ... مسكين يا راشد .

(تبلغ الأصوات نروتها - تهتز الأبواب والجدران بشدة - يقتحم
الحجرة عدد كبير من الشخصيات المقنعة التي تخترق الباب و
الجدران بأقنعة مخيفة وملابس عجيبة رجالا ونساء - يدورون
حول راشد في وحشية ويرقصون في جنون - يحاولون الفتك
به)

راشد : (يحاول الإفلات منهم) لأ.. لأ.. ابعدوا عني ..
سيبوني .. ياخونة.. يا أندال.

(يحاول اللوذ بالفراش لكنهم يلحقون به ويحاصرونه)
المقنع : (لازال في مكانه) مسكين ... مسكين يا راشد.

(ينقضون علي راشد في وحشية)
راشد : (يصرخ في ألم) آآه ... آآه .

(يظلم المسرح فجأة ولازلنا نسمع صوت المقنع كالفحيح مختاطا
بصرخات راشد)

المقنع : مسكين ... مسكين يا راشد.

راشد : خونة ... أندال... كفاية ... حرام عليكم ...
سيبوني في حالي ... آآه .

(يضاء المسرح بغتة علي منظر حجرة النوم السابق ...
الجدران والباب كل شيء يبدو سليما وكأن شيئا لم يكن...
لا أثر لأي مقنعين ... راشد نائم في سريره وقد هب توا من
النوم في رعب)

راشد : (فزعاً) لأ .. لأ ... سيبوني ... ابعدوا عني .
(تدخل وفاء قلقة وقد استيقظت علي صوت راشد)

- وفاء : (في قلق) راشد !!... مالك يا راشد ؟... في ايه ؟
 راشد : (يدور بعينه في الغرفة دهلا.. لا يتكلم)
 وفاء : راشد.
 راشد : (يحلق في وجهها كأنه انتبه لوجودها) وفاء ؟!
 وفاء : أيوه يا راشد .. وفاء .. مرانك .. حبيبك.
 (يدخل عوض مندفعاً بملابس نومه البسيطة المكونة من سروال واسع وصديري .. يمسك بيده مقشة في تأهب لمعركة)
 عوض : في ايه يا راشد بيه ؟ .. بتزق كده ليه يا سعادة البيه ؟
 وفاء : (مستكرة) عوض ؟!
 عوض : خدامك ياست هانم.
 وفاء : ايه اللي في ايدك ده ؟
 عوض : مقشة يا وفاء هانم.
 وفاء : ليه ؟.. وايه اللي انت لابسه ده ؟!
 عوض : (في حرج) لامؤاخذة يا ست هانم .. أصلي اتخضيت علي راشد بيه .. مالحقش ألبس هدومي.
 وفاء : طب روح دلوقتي.
 عوض : وسعادة البيه ؟
 وفاء : مفيش حاجة .. روح كمل نومك.
 راشد : (يلتقط أنفاسه بصعوبة) مية .. عايز مية.
 وفاء : كباية مية بسرعة يا عوض.
 عوض : حاضر يا هانم. (يخرج مسرعاً)

- وفاء : مالك يا راشد ؟ .. في ايه ؟
 راشد : فظيع .. فظيع يا وفاء .. بشع.
 وفاء : هو ايه ده يا راشد؟ .. قلقتني.
 راشد : كابوس فظيع .. فظيع.
 وفاء : ثاني يا راشد ؟
 راشد : كل مرة بيزيد بشاعة.. المرة دي قدروا يوصلولي
 فعلا .. وهنا في بيتي .. في سريري .. اخترقوا كل
 الحواجز .. مافيش حاجة قدرت تمنعهم .. وانا كنت
 لوحدي .. مافيش حد جنبي يحميني منهم.
 وفاء : هما مين دول يا راشد؟
 راشد : مش عارف .. بيطاردوني في كل مكان .. كانوا
 هنا .. في كل حطة .. في كل ركن .. في الدولاب ..
 عالسريير .. علي الأرض .. عالحيطان .. في السقف
 .. في كل حطة.
 وفاء : طب اهدا يا راشد .. ده مجرد كابوس.
 راشد : كنت الأول يادوب باحس بيهم .. شامم ريحتهم ..
 حاسس بأنفاسهم .. بعد كده بدأت اسمعهم .. سبيت
 لهم اوضة نومي .. مافيش فائدة .. صوتهم بدأ
 يعلي .. ويعلي .. ما بقيتش قادر أطيقه .. حتي لو سديت
 وداني .. كنت باحس انهم جايبين من جوة .. من ..
 من جوة وداني نفسها .. أو من جوايا أنا نفسي ..
 بس ما كنتش باشوفهم .. النهاردة شوفتهم .. قدروا

- يوصلولي يا وفاء .. أروح منهم فين قوليلي؟!
 وفاء : مانت مش عايز تسمع كلامي.. ياما قولت لك ارجع
 نام في مكانك .. (برمقها بنظرة عتاب .. بتتردد)
 وبعدين فيها ايه لما تعرض نفسك علي ..
 راشد : (مقاطعا في حدة) علي شكتور نفساني .. مش كدة ؟
 وفاء : وفيها ايه يا راشد؟
 راشد: قولت لك ميت مرة أنا مش عيان .
 وفاء : والكوايس اللي كل ليلة دي ؟
 راشد: هو كل من شاف كابوس بقي مجنون يا وفاء؟
 وفاء : ومين قال ان كل من راح لدكتور نفساني مجنون
 ؟.. مش أنت اللي تفكر بالشكل ده.
 راشد: أرجوكي .. كفاية كلام في الموضوع ده .. أنا ما
 صدقت فقت من الكابوس.
 وفاء : اعذرني يا راشد .. أنا خيفة عليك.
 راشد: ما تخافيش أنا كويس .. كويس جدا.
 وفاء : طب بلاش عشان خاطري .. عشان خاطر سامح ..
 ابننا .. فيها ايه لما نطمن؟!.. مش يمكن نلاقي حل
 للكوايس دي عند الدكتور؟
 راشد: تاني يا وفاء؟.. انسي الموضوع ده خالص .. انا
 مش رايع لدكاترة .. مش رايع لدكاترة.
 وفاء : طب وطبي صوتك .. أحسن الولد يصحي.. ده أنا
 ماصدقت راح في النوم.

- راشد : امازل - ادة بتاعته فين؟
- وفاء : سعية؟ .. ما انت عارف ان سمعها تقيل.. زمانها في سابع نومة.
- راشد : مش عارف سر تمسكك بيها!!.. ما الدادات كتير.
- وفاء : كفاية ان الولد بيحبها.. وهي بتحبه..(صوت بكاء طفل) أهو صحي ، هاروح اطمئن عليه. (تخرج بسرعة)
- راشد : (بيتلع ريقه بصعوبة) مية.. كباية مية .. عوض .. انت يا عوض.
- (يدخل عوض مسرعا وقد ارتدي ملايسه كاملة حاملا صينية عليها كوب ماء)
- عوض : امرك ياسعادة البيه .. اصلي كنت بالبس هدمي .. ألف سلامة يا بيه.
- راشد : (غاضبا) أنا مش عيان.
- عوض : وهيه السلامة وحشة؟!
- راشد : قولت لك أنا مش عيان يا عوض.
- عوض : بس باين عليك ياسعادة البيه.
- راشد : هو إيه ده اللي باين عليا؟
- عوض : العيا .
- راشد : يووووه .. أنا ناقصك أنت كمان!.. أنت إيه اللي جابك دلوقتي؟ .. روح شوف شغللك.
- عوض : والمية؟

راشد : مية ايه؟!
عوض : عشان تَبل ريقك بعد السرعة اللي اتسرعتها..
انقضل يا سعادة البيه.

(راشد يتأمل كوب الماء وينظر لعوض في ريبة)

راشد : اشربها أنت يا عوض .
عوض : مش عطشان يا بيه.
راشد : (في إصرار) اشربها يا عوض..
عوض : مايصحش يا بيه.
راشد : قولت لك اشربها .. اشرب.
عوض : حاضر .. أمرك يا سعادة للبيه.
(يتناول الكوب .. يقربه من فمه في بطم وراشد يراقبه في حذر
وتوجس .. لا يكاد عوض يتجرع جرعة واحدة حتى يخطف
راشد الكوب من يده ويفرغ مافيه من ماء في فمه في جرعة
واحدة)

عوض : (في دهشة) إحنا فينا من كده؟
راشد : (يعيد الكوب للفارغ بيروده) بتقول ايه؟
عوض : باقول بالهنا والشفة يا بيه.
راشد : قولت لك ميت مرة أنا مش عيان.
عوض : وماله يا بيه، الشفا حلو برضه.. ربنا يشفيننا ويشفي
كل مريض.
راشد : أنا عايز أعرف مين اللي فيمك أنى عيان؟! ..
الهانم ، مش كده؟

- عوض : لأ يا بيه مش كده.. الست هانم ما قالتش حاجة ..
دى حتى كل ما أسألها عن سعادتك .. تزعمق لي
وتقولني مالکش دعوة.
- راشد : امال جالك منين أني متهيب عيان.
- عوض : وشك بيقول كل حاجة يابيه.. لوتك مصفر.. وعينك
حمرا ..والعرق بيشر من جبينك .. ودايما زهقان
ومش طابق حد.. ويتقوم كل ليلة من النوم مفزوع
وبتصرخ زي العيل الصغير.
- راشد : أنا عيل ؟!
- عوض : لا سمح الله يابيه ... أنا قولت زي العيل.
- راشد : وكمان بتكررها !!... أنت قليل الأدب.
- عوض : وماله يابيه .. مقبولة منك .. بس روق دمك كده ..
الزعل مش حلو عشائك.
- راشد : انت عايز تجنني ؟
- عوض : بعد الشر عليك يابيه.
- راشد : اطلع بره .. غور من وشى.
- عوض : (في هدوء) ربنا يزيج عنك يابيه .. تحب اجيب لك
دكتور؟
- راشد : انت هاتعيني بالعافية !.. غور من وشى قولت
لك..مش عايز أشوف وشك خالص.
- عوض : (خارجا بخوف) حاضر يابيه.. بس هدى
أعصابك.. ده انت حالتك صعبة قوى ..ربنا يشفيك

يابيه. (يخرج)

راشد : (في ثورة) أنا مش عيان .. قول للي مسلتاك عليا

ان أنا مش عيان .. مش مجنون .. ومش هاروح

للكاترة .. ايه يعني شوية كوابيس بتجيلي ؟ ..

مالناس كلها بتشوف كوابيس ، ما حدش بيقول

عليهم مجانين .. اשמعني انا ؟! ..

طب مش نايم يا وفاء .. ومش راجع أوضتي ..

هافضل صاحي ليل ونهار عشان ما اشوفش

كوابيس.

(تغير مفاجئ في الإضاءة حتى تصبح اقرب لجو الكابوس -

نسمع صوت المقنع عميق ومسبق بضحكة سخرية)

ص.المقنع: ولو .. حتى لو فضلت صاحي .. مسكين.

راشد : (مأخوذاً) ايه ده ؟ .. الصوت ده جاى منين؟

ص.المقنع: مسكين يا راشد.

راشد : انت مين ؟ .. الصوت ده سمعته قبل كذا .. الصوت

ده كان فى الكابوس.

(تبدأ الدقات والصرخات والأصوات فى الظهور)

ص.المقنع: مسكين .. مسكين يا راشد.

راشد : (في رعب) لأ .. أنا مش خلاص صحيت!! ..

المفروض انى دلوقتي صاحي .. (ينادى) عوض ..

انت يا زفت .. عوض.

(تتغير الأضاءة بغتة لتعود الى الإضاءة العادية)

عوض : (قادمة بسرعة) خير يا سعادة البية ؟.. النوبة جت تانى؟

راشد : نوبة إيه أنت كمان؟

عوض : امال حضرتك كنت بتصرخ ليه؟

راشد : أنا صرخت ؟!

عوض : آه.. دى باينها اشتغلت.. جايز بقه انا كان بيتهيألى
واللا حاجة.. تصبح على خير يابيه.

راشد : رايح فين .

عوض : هاروح أنام يا بيه.

راشد : الهانم فين؟

عوض : (فى بساطة) بتتيم البيه.

راشد : بيه !!.. بيه مين؟!

عوض : البيه الصغير .. سى سامح بيه .. ربنا يخليه لكم يا

سعادة البيه .. ده الخالق الناطق سعادتك .. ده حتى

بيصيحى من النوم يصرخ زى جنابك تمام ..

تكونشى دى وراثة يابيه؟

راشد : وبعدين معاك بقه! .. روح.. روح كمل نومك.

عوض : أمرك يابيه .. انت الشافى يا رب. (يخرج)

(فور خروجه يفاجأ راشد بصوت المقنع وتغير سريع فى

الاضاءة)

ص. المقنع : مسكين .. مسكين يا راشد.

راشد : (صارخا) عوض.

- عوض : (يعود مسرعا) أيوه يابيه.
- راشد : سيبتى ليه ؟ .. قصدى .. انت رحى قين؟
- عوض : مش سعادتك قولتى روح نام!!
- راشد : لا استى هنا .. ما تسببش .. قصدى يعنى ..
- عوض : أونسك يعنى.
- راشد : أيوه .. خليك معايا شوية .. أقعد.
- عوض : مايصحش يا سعادة البيه.
- راشد : قلت لك أقعد.
- عوض : حاضر (يجلس على الأرض) ... مالك ياسعادة البيه؟! .. فى حاجة قالقاك؟
- راشد : اسمع يا عوض .. افرض انك .. مثلا .. يعنى .. كنت نايم.
- عوض : أيوه كده يابيه فضفض .. خلى الهم ينزاح.
- راشد : وبعدين معاك ؟!
- عوض : حاضر يابيه .. هافرض انى كنت نايم. (ينام)
- راشد : مش انت .. اى واحد.
- عوض : حضرتك مثلا.
- راشد : (حانقا) اى حد .. كان نايم .. وبعدين شاف حلم مزعج حبتين.
- عوض : كابوس يعنى .
- راشد : كابوس .. وبعدين صحى منه.
- عوض : يقف يمينه .. ويقف شماله .. ويحمد ربنا ويقول اللهم

- اجعله خير .
- راشد : ماهي المصيبة انه مش عارف .
- عوض : مش عارف ايه ؟
- راشد : مش عارف اذا كان صحى فعلا واللا لسه نايم .
- عوض : مش فاهم ولا مؤاخذه يابيه!!
- راشد : مش متأكد اذا كان صحى وفاق ..واللا لسه عايش
- في الكابوس .. يعرف ازاي انه صحى ؟
- عوض : بسيطة .. يسأل اللي حواليه .
- راشد : واذا كان ما فيش حد؟
- عوض : ايه !!.. عايش لوحده ؟!
- راشد : تقريبا .
- عوض : يبقى ينزل الشارع يدور علي أى حد يسأله .
- راشد : واذا ما لاقاش؟
- عوض : يشاور لأى اتوبيس زحمة وينحشر وسط الركاب ..
- مانقوليش بقه مالقاش ركاب!!
- راشد : مالقاش .
- عوض : ازاي بقه ؟.. مش الأتوبيس ماشى ؟
- راشد : بأقصى سرعة .
- عوض : يبقى لازم يكون له سواق .
- راشد : مافيش .
- عوض : ايه ؟.. فى أتوبيس يمشى لواحد كده .. من غير
- سواق؟!

- راشد : ما فيش حد خالص .
- عوض : لا يا بيه .. في الحالة دي بقه .. ببقى كابوس
رسمي. (مشيرا للجنون)
- راشد : ويصحى ازاي يا عوض ؟
- عوض : لازم حد يصحبه .. يقرصه .. يضربه .. أى حاجة
تفوقه من نومه.
- راشد : (في حزم) عوض.
- عوض : ابوه ياسعادة البيه ؟
- راشد : (يمد له نراعه) اقرصنى يا عوض.
- عوض : تتقطع ايدى يا بيه.
- راشد : قلت لك اقرصنى .. عايز ايتأكد انى فعلا صحيت..
انى فعلا فقت من الكابوس.
- عوض : ربنا يشفيك يا بيه.
- راشد : قلت لك اقرصنى .. مستنى ايه؟
- عوض : حاضر يا بيه .. بس من غير زعل. (ينقض على
نراع راشد ب تلقائية ينهشها بأسنانه)
- راشد : (في ألم) آه .. باقولك اقرصنى .. مش افترسنى
- عوض : زيادة توكيد يا بيه.. دى حالتك متأخرة قوى.
- راشد : يعنى ايه ؟ .. انا صاحى ؟! .. فايق ؟!
- عوض : ما انت لو سألتنى م الأول كنت قولت لك.. بس
برضه ما كنتش ها تصدقنى .
- راشد : ولما أنا صاحى .. امال ايه اننى بيحصلى ده ؟

- عوض : ربنا يزيح عنك يابيه.. اروح أنا بقه؟
 راشد : روح .
- عوض : (خارجا) حاضر .. ربنا ...
- راشد : (في وعيد غاضب) ها..
- عوض : (مكملا في خوف) يشفيني.. (يخرج)
- راشد : يعني طلعت صاحي أهه يا راشد .. امال واهم
 نفسك ليه!!.. اعقل بقه ..
- ايه اعقل دى ؟ .. هو أنا مجنون؟ .. قصدى فوق
 .. ده مجرد ارهاق .. أهم حاجة شيل الأوهام دى
 من دماغك .. احسن بعدين تصدق .. كله من وفاء
 ، عايزة تقنعنى انى مش طبيعى.
- (فجأة تتغير الاضاءة مع ظهور صوت المقنع)
- ص.المقنع: مسكين .. مسكين يا راشد.
- راشد : (فزعاً) ايه ده بقه؟!.. عوض .. يا عوض..
- (يدخل عوض مسرعاً يحمل عصا غليظة)
- عوض : أمرك يا سعادة البيه .. المرة دى عامل حسابى.
- (يضرب راشد على رأسه بالعصا - يسقط راشد
 مغشياً عليه)
- عوض : ها ؟ .. اتأكدت انك صاحي؟ .. يابيه !! .. راشد
 بيه !!.. اصحى يابيه .. فوق يا سعادة البيه .. يابيه

إفلام

المشهد الثاني

شركة استثمارية- مكتب راشد -الأثاث فخم ينم عن وجهة
ونوق رفيع- راشد جالس على مكتبه في إرهاب باد يطالع بعض
الأوراق أمامه- طرقات لطيفة على الباب ثم تدخل سكرتيرة
حسنة.

راشد : أيوه يا سالي .. في حاجة؟
سالي : الأستاذ عبده المقواح يا فندم .
راشد : مقواح؟!
سالي : أيوه يافندم .. المحامي الجديد.
راشد : آه .. (ينظر في ساعته) .. خليه يتفضل ..
(تسحب السكرتيرة في هدوء - تفسح الطريق لعبده)
عبده : متشكر .. (يدخل)
راشد : أهلا وسهلا .. شرفت يا أستاذ عبده.
عبده : (في أدب واحترام مبالغ فيه) أنا آسف .. آسف جدا
.. أنا في غاية الأسف والله.
راشد : آسف ؟ .. علي إيه ؟

عبده : أنا عارف إن سعادتك بتحب الالتزام بالمواعيد جدا .. وعارف الدقة المتناهية في ضبط ساعة جنابك .. وأنا آسف فعلا عن تأخري عن الموعد المحدد بيننا .. لكن ده كان غصب عني والله.. ظرف طارئ سعادتك .

راشد : لا تأخير ولا حاجة .. اتفضل اقعد ..
عبده : (بإصرار) لا يا فندم ..أنا فعلا اتأخرت .. عشر ثواني ..

راشد : مش هاتفرق كثير ..اقعد .
عبده : لأ تفرق .. الثانية ممكن تنقذ بنى آدم يا فندم .. أنا دلوقتى ضحيت بعشر بنى آدمين .. الثانية سعادتك ممكن تفرق فى حالة تلبس .. ممكن تسمح لمجرم يهرب بجريمته .. الثانية سعادتك ..

راشد : خلاص يا أستاذ .. ماحصلش حاجة .
عبده : وأنا لسه هاستنى لما يحصل ؟! .. دول عشر ثوانى يا عالم .

راشد : المهم انك وصلت بالسلامة .. اتفضل اقعد بقه عشان نشوف الشغل .

عبده : مش قبل ما سعادتك تغفر لى التأخير ده ..وتأكد لى ..وتبرهن لى انك فعلا سامحتني سعادتك ..وغفرت لى ..

راشد : (مقاطعا) سعادتك ..

- عبده : خصوصاً إن ده أول لقاء بيني وبين سعادتك .
 راشد : والله مسامحك .. بس اقعد .
- عبده : لا..لا ..دى مجاملة ..مش طالعة من قلب سعادتك
 .. سعادتك خايف تكسبنى وتخرجني عشان دى أول
 مرة ..بس أنا مش عايز سعادتك تاخد عنى فكرة
 غلط ..
- ده أنا مثال للالتزام ..نموذج فى الدقة .. آية فى
 التحبب ..ده أنا محبها خالص .. على الآخر
 سعادتك .
- راشد : (فائد الصبر) يا أستاذ مقاوح .. ممكن نتفضل تقعد
 ..أنا عارف انك مثال للدقة والالتزام ... عشان كدة
 اتصلت ببك .. لانى اكتشفت ان المحامى اللي كنت
 باتعامل معاه كانت بتفوته بعض التفاصيل
 ..وبصراحة بدأت أقلق منه ..انت سيد العارفين .
- عبده : ما هو عشان كدة أنا مصر انك تغفرلى تأخيري ..
 دى مسألة سمعة سعادتك .
- راشد : مسامحك يا سيدى .. بس خيلنا نشوف الشغل .
- عبده : أنا تحت أمر سعادتك .. بس أولا .. وقبل أى شئ
 .. نسمح سعادتك .. تطلع على المذكرة دى ؟!
- (يخرج ورقة من حقيبته .. يقدمها لراشد الذى يتأملها بدهشة)
- راشد : ايه دى ؟!
- عبده : دى مذكرة تفصيلية عن سبب تأخيري سعادتك .

- راشد : مذكرة عشان اتأخرت عشر ثواني ؟! .. امال لو ما جيتش خالص كنت عملت ايه ؟!
- عبده : كنت قدمت المذكرة دى فى القسم سعادتك .
- راشد : لا ده انت الظاهر عليك فعلا محامى قره زى ما سمعت عنك .. بصراحة لما اتأخرت عليا شوية بدأت أشك فى كدة .. انما انت اثبتت انك فعلا أهل للثقة .
- عبده : دى شهادة أعتز بيها سعادتك .
- راشد : ممكن بقه نشوف شغلنا ؟!
- عبده : قوى .. قوى .. بس لما سعادتك توقع على المذكرة دى بالعلم .
- راشد : بسيطة .. هات .. (ينظر لعبده بريبة ثم يضع المذكرة جانباً) .. والا أقولك سببها دلوقتى .. لما أقرأها بالتفصيل .
- عبده : اللى تشوفه سعادتك .
- راشد : (يتناول أوراقاً أمامه) أولا .. أنا عايز آخذ رأيك فى الشيك ده .. فيدنى بخبرتك .
- عبده : (يتناول الشيك .. يفحصه بدقة مبالغ فيها) سعادتك شاكك انه ممكن يكون مضروب ؟! .. اطمئن سعادتك الشيك سليم مية المية .
- راشد : ما أنا عارف انه سليم .. ده ممضى قدام عنيا ..
- عبده : (يتفحص غاضباً) ايه ده يا راشد بيه ؟ .. كنت بتخبرني ؟ .. سعادتك بتشكك في قدراتي ؟

راشد : اقعد يا مقاوح .. ماتفهمنيش غلط .. انا مش عايز أعرف انه سليم واللا لأ .. أنا عايزك تتأكد لي من الرصيد .. خصوصا ان المبلغ اللي قدامك مش قليل.

عبده : طبعا يا راشد بيه.. خمسين ألف جنيه مبلغ مش قليل.

راشد : (يخطف الشيك بدهشة شديدة) انت قُولت كام ؟! .. دقق كويس يا أستاذ .. اتأكد من المبلغ .

عبده : (يعيد النظر) أيوه .. أيوه .. آسف .. الأصفار لخبطتني .. قصدى أقول .. خمسميت ألف جنيه .. ودا طبعا مبلغ كبير ..نص مليون .. عندك حق سعادتك .. لازم نتأكد من الرصيد.

راشد : نص مليون ايه ؟! .. بص كويس يا عبده وعد الأصفار اللي قدامك.

عبده : بصراحة .. أصل أنا مش متعود على الأرقام دى قوى .. بس التقط يحل المشكلة .. آه خمسة مليون جنيه .. فعلا .. انا آسف.

راشد : يا أستاذ .. الشيك اللي فى ايديك بخمسين مليون جنيه .. والتقط بيقول كده كمان.

عبده : ما انا قُولت لسعادتك .. أنا ما ليش فى حكاية الأرقام دى .

راشد : ما علينا .. عايزك تتأكد من الرصيد ده.

- عبده : أمر سعادتك .. دى مسألة بسيطة جدا .
 (يدس الشيك في حقيبتة - راشد يعترضه)
 راشد : لا .. لو سمحت هات الشيك.
 عبده : امال هاستعلم عنه ازاي سعادتك ؟
 راشد : انقل بياناته عندك .. جرى ايه يا أستاذ مقاوح !!
 عبده : عند سعادتك حق .. (ينقل بياناته) ده حتى يبقى ثقيل عالشنطة ..
 (يضحك ببلادة)
 راشد : (ياخذ الشيك) ده كان أولا .. ثانيا .. في حتة أرض عايز أشتريها .. ودى صورة من عقد ملكيتها للمالك الحاللى .. اللى المفروض انى هاشتريها منه .. عايزك بقه ..
 عبده : (مقاطعا) معلوم .. معلوم .. سعادتك طبعا عايزنى أتأكد من صحة ملكية الشخص للأرض .. مش كده سعادتك ؟
 راشد : تمام .. بالإضافة لكدا .. عايزك تتأكد لى من البيانات الشخصية للمالك .. يعنى الاسم رباعى .. تاريخ الميلاد .. الرقم القومى .. العنوان.
 عبده : دى مسألة بسيطة خالص .. لكن ماتأخذنيش سعادتك .. ده مش حرص من سعادتك مبالغ فيه حبتين ؟!
 راشد : الاحتياط واجب يا أستاذ .. وانت سيد العارفين.
 عبده : طبعا .. طبعا .. دقة سعادتك طلعت أكثر مما

- تَوَقَّعت بمراحل يا راشد بيه ..
- ده أنا اللي بيقولوا عليا مقاوح وكهين .. ما جيش
في دماغ سعادتك حاجة .
- سوء الظن من خير الفطن . : راشد
- عند سعادتك حق .. تؤمر بحاجة ثانية سعادتك ؟ : عبده
- بالنسبة للورثة . : راشد
- ورثة سعادتك ؟ : عبده
- لأ يا أستاذ .. ورثة مالك الأرض . : راشد
- لكن ده لسه علي قيد الحياة سعادتك . : عبده
- زيادة اطمئنان .. مش جايز يكون كاتب لحد منهم : راشد
- حاجة والللا محتاجة .. خصوصاً الأرض دى .
- انا أول مرة أشوف حد فى حرص سعادتك . : عبده
- ده أسلوبي فى الشغل . : راشد
- وأنا تحت أمر سعادتك .. ما عليا الا التنفيذ . : عبده
- في حاجة أخيرة . : راشد
- أؤمر سعادتك!! : عبده
- يا ريت تجيبلى مستخرج رسمى من شهادة ميلاد : راشد
- المالك ..
- بسيطة . : عبده
- وشهادة ميلاد أبوه . : راشد
- (بدهشة) أبوه ؟! : عبده
- ويا ريت أمه كمان . : راشد

- عبده : **(فأعزرا فاه)** ليه سعادتك ؟! .. حضرتك شاكك فى بنوته؟!
- راشد : وأنا دخلي ليه بينوته ؟
- عبده : أمال لزومها ليه شهادة ميلاد أبوه ؟! .. والا أمه دى كمان ؟!
- راشد : للتأكد من اسمه الرباعي .. وبعدين اسم الأم أحيانا بيثبت حاجات كثير .
- عبده : يخرب بيت دماغ سعادتك .
- راشد : ليه ؟
- عبده : لأمواخذة يا باشا ... أصلك عقدتني سعادتك .
- راشد : لو مش هاتقدر .. بلاش .. أشوف محامى تانى .
- عبده : وليه سعادتك ؟ ... وحياة شرف المهنة .. مايقاش عبده المقاوح إن ما جبت لك قراره .. لو عايزنى أجيب لسعادتك شهادة ميلاد الداية اللي سحبتة .. أجيبها لك سعادتك .
- راشد : مش للدرجة دى .. بس ياريت الحاجات اللي طلبتها تكون جاهزة فى اقرب وقت .
- عبده : اطمئن سعادتك .. أنت تؤمر واحنا ننفذ .
- راشد : شرفت يا أستاذ .. مع السلامة .
- عبده : **(في خروج)** الله يسلم سعادتك .. وبياركلنا في دماغ سعادتك .. والمخ اللي جوه دماغ سعادتك .. يا سلام على دقة سعادتك .. وحرص سعادتك .. وتحبيك

سعادتك ..

راشد : أما نشوف آخره سعادتك .

(صوت جلبه بالخارج .. مشيرة في حوار بالغ الحدة مع سالي)

مشيرة : يعنى إيه ما ينفعش ؟

سالي : قولت لحضرتك ما ينفعش تقابليه دلوقتى ..

مشيرة : أنا مش جاية أشحت منه .. هوه فاكر نفسه إيه ؟

سالي : لو سمحتي ما تعلقش صوتك .

مشيرة : ما هو لازم يسمعنى.

سالي : مش كده يا آنسة.

مشيرة : (تفتح المكتب) وسعى كده .. بكرة الدور يبجي

عليكى انتى كمان.

سالي : ما يصحش كده يا آنسة .

راشد : إيه ده ؟ .. فى إيه؟

سالي : سوري يا راشد بيه .. هيه اللي ..

راشد : مشيرة ؟! .. انتى ازاي تتهجمي عليا بالشكل ده ؟!

سالي : حاولت أمنعها يا فندم .. بس.

مشيرة : (مقاطعة) تمنعي مين يا ماما ... يعني هادخل

الجنة؟!

راشد : لو سمحتى يا مشيرة .. اتفضلى من غير مطرود .

مشيرة : ومن غير مطرود ليه ؟! ... مانت سبق وطردتني.

راشد : وايه اللي رجعت تاني ؟

مشيرة : عشان أفهم ... من حقي أعرف إيه اللي عملته

- يستحق اني انطرد من شغلي كده من غير أي
مقدمات ولا سابق انذار !!... ممكن حضرتك تقولي
انا غلط في ايه بالظبط؟!
- راشد : ما غلطيش يا مشيرة ..
- مشيرة : امال ايه اللي حصل ؟!
- راشد : استغنيا عن خدماتك يا ستي .
- مشيرة : كده بكل بساطة ؟... والسنين اللي قضيتها في خدمة
الشركة!.. وتعبى..واخلاصي .. كل ده راح فين ؟!
- راشد : كنتي بتاخدي مرتب مفيش بنت في سنك تحلم بيه
... مابخلتش عليكى بأي حاجة.
- مشيرة : وانا كمان مابخلتش علي الشركة بأي مجهود.
- راشد : خلاص ... نبقى خالصين.
- مشيرة : لأ يا راشد بيه.. انت عارف كويس اني كان قدامي
عروض كتيرة ورفضتها عشان مصلحة الشركة.
- راشد : ومستتية ايه ؟... شوفي مصلحتك.
- مشيرة : فرق كبير قوى لما أكون سايبه الشركة بمزاجي
وبارادتي ، ولما أكون مطرودة منها ... أنت
ضيعت مستقبلي يا راشد بيه.
- راشد : بس كده ... سالي.
- سالي : أمرك يا راشد بيه.
- راشد : اعلمي للآنسة شهادة خبرة ، وبالصيغة اللي هي
عايزاها.

- مشيرة : هوه ده في رأيك تمن إخلاصي للشركة ؟!
- راشد : هاتي م الآخر يا مشيرة ... عايزة كام ؟
- مشيرة : كام ؟!...لاهو انت فاكربي جاية أساومك ، واللا عايزة منك فلوس ؟!
- راشد : أمال جاية ليه ؟.. وما تقوليليش إخلاصي للشركة والكلام الفاضي ده.. كل واحد إخلاصه لنفسه ..نفسه وبس.
- مشيرة : مش جديدة عليك.. طول عمرك ماتحيش غير نفسك .. مصلحتك فوق كل شيء.
- راشد : لأ !! .. انتي زودتيها خالص..
- مشيرة : انت لسه شوفت حاجة ؟ .. أنا بقه هاخليك تمشي تكلم نفسك .. هاخليك تمام وعنيك مفتوحة ... مش هاتدوق طعم النوم..صدقني يا راشد .. هانتدم .. هانتدم يا راشد.

إظلام

المشهد الثالث

ردهة أو حجرة استقبال في فيلا راشد - باب يؤدي إلى الحديقة
و عدة أبواب تؤدي إلى باقي أجزاء الفيلا - وفاء في حوار مع
سعدية التي تحمل الطفل في حنان.

وفاء : مش هاوصيكي يا سعدية.. خدي بالك من سامح.
سعدية : (يسبوا أن سمعها ثقيل) مش فالح ؟!... ليه ياستي
كفا الله الشر!! .. رينا يجعله ولد ويملا بلد قادر يا
كريم.
وفاء : مش فالح ليه يا دادة!! (ترفع صوتها) باقولك
خدي بالك من سامح .. سامح.
سعدية : ده في عنيا يا ست هانم.
وفاء : علي العموم أنا مش هاتأخر .
سعدية : يتبخر!!... ده أنا أخطه في نني عنيا ... اخبيه
جوه قلبي .. آل يتبخر آل... (تداعب الطفل) يا
أختي اسم الله .. اسم الله. (تخرج)
(يظهر راشد خارجا من حجرة المكتب)

- وفاء : راشد ؟!... صاحى بدري يعني !!
- راشد : الكلام ده لو كنت نمت اصلا... انتي خارجة واللا
ايه ؟
- وفاء : أيوه .. رايحة لماما.
- راشد : سلميلي عليها.
- وفاء : دي نفسها تشوفك قوى .. ماتيجي معايا نزورها.
- راشد : بعدين يا وفاء .. انتي عارفة اني مشغول اليومين
دول
- وفاء : ما أنت علي طول مشغول يا حبيبي... باي بقه
عشان ألحق ارجع بسرعة.
- راشد : مع السلامة.

(تخرج وفاء يدخل عوض)

- عوض : سامي بيه عايز يقابل حضرتك يا سعادة البيه.
- راشد : سامى ؟!...خليه يتفضل .
- سامى : (قادم من الخارج) مش قولتلك ؟! .. أهو قالك خليه
يتفضل .. البيت بيتى .. فهمت يا بنى آدم .. يرضيك
كده يا سى راشد .. أقوله راشد موجود ؟!..يقول لى
استنى لحظة أبلغه يمكن مش عايز يقابلك .. ما داهية
لستكون مش عايز تقابلنى بصحيح ؟!..ايه ده يا
راشد ؟! من امتى وأنا باستأذن فى الدخول عندك ..
- راشد : ماعلش يا سامى ..دى اجراءت امن جديدة أنا اللي
منبهه على عوض ما يدخلش أى مخلوق الفيلا من

غير اذن .

عوض : صدقتنى بقة يا سامى بيه ؟! .. أنا عبد المأمور .

. سامى : مأمور .. عسكرى أنا القوانين دى ماتمشيش عليا ..

راشد ده أخويا .. فاهم يعنى ايه أخويا ؟!

راشد : وأكثر كمان يا سامى .. الصداقة اللى بينا أكثر من
الاخوة ميت مرة .

سامى : ما أنا عارف يا راشد .. عشان كدة جايك النهاردة
أتخانق معاك .

راشد : ليه كده بس يا سامى .. أنا عملت فيك ايه ؟!

سامى : بقى يا راجل يا نذل ما تسألش فيا الفترة اللى فاتت

دى كلها ولا تعبرنى ولو بتليفون حتى .. لا .. لا

.. اخص على دى صداقة .. الله .. انت ما طلبتليش

حاجة اشريها لحد دلوقتى ليه ؟! .. اجرى يا واد يا

عوض اسمع كلام البيه وهات لى حاجة ساعة

.. واللا أقولك خليها شاي .. خليه اتنين شاي ..

عوض : أمرك يا سامى بيه . (يخرج)

سامى : شايف طلعت أجدع منك ازاي ؟! .. طلبت لك شاي

معيا .

راشد : شكرا يا سيدى .. بس اتفضل أقعد الأول عشان

نعرف نتكلم .. أنت ابن حلال .. جيت فى وقتك .

سامى : ليه ؟! .. انتو ناويين تتعدوا بدرى النهاردة ؟!

راشد : يا أخى انت مش هاتبطل هزار أبدا ؟!

- سامی : أنا ما باهزرش .. انتوا ناويين تغدوني النهاردة
واللا لا ؟
- راشد : بطل هزار بقه وخلينا نتكلم جد ... (يخرج عليه
سجّاره يتناول سيجارة يبحث عن القداحة علي
المنضدة أمامه - ينادي) عوض.. يا عوض.
- سامي : ايه .. بتنادي عليه ليه ؟ ... ماتسييه يعمل الشاي ..
واللا ناوي تلغيه كمان ؟!
- عوض : (من الداخل) أيوه يا سعادة البيه ؟!
- راشد : فين اللواعة ؟
- عوض : ولواعة ايه يا بيه ؟!
- راشد : اللواعة الذهب اللي كانت هنا ؟!
- عوض : هنا فين ؟!
- راشد : هنا .. على الترابيزة دي ؟ ..
- عوض : ما خدتش بالي بابيه .. وأنا باروق ماشوفتهاش.
- راشد : دي كانت هنا دلوقتي.
- عوض : افنكر كويس يا سعادة البيه.
- راشد : تقصد ايه ؟!
- عوض : يعني ... يمكن تكون تهيوأت.
- راشد : اخرس.
- عوض : الله !!! وأنا قولت حاجة بابيه ؟!
- سامي : ما تنور كويس يا راشد يعني هاتكون راحت فين ؟
- راشد : أنا متأكد انها كانت علي الترابيزة دي .. جنب عليه

- السجاير .. انا لسه مولع بيها سيجارة من شوية .
 عوض : عدم المؤاخذه يا سعادة البيه ، حضرتك ما دخنتش
 النهاردة سجاير خالص .. دي أول سيجارة حضرتك
 تولعها.
- راشد : انت بتقول ايه؟ .. انت بتراقبني؟!
 عوض : اراقبك ايه يا سعادة البيه؟!
 سامي : (يفحص علبة السجاير) فعلا علبة السجاير كاملة.
 راشد : أمال عرفت ازاي إن دي أول سيجارة ؟
 عوض : من الطفاية يابيه .. ما فيهاش ولا عقب سيجارة
 واحد من ساعة ما نضفتها بنفسي الصبح.
 سامي : (يفحص الطفاية) فعلا يا راشد .. الطفاية نضيفة ..
 باقولك ايه .. دور كويس علي الولاة وسيب
 الرجال يروح يعمل لنا كباية الشاي .
 راشد : (يسبح في جيوبه بضجر) أنا متأكد يا سامي .. انا
 عمري ما حطيت ال... (بيتر جملمته فجأة وتتسمر
 يده داخل جيبه ويخرجها ببطء ممسكة بالقداحة).
 عوض : (مهلا) الله أكبر .. يحيا العدل .. جالك كلامي
 يابيه؟
 سامي : ظلمت الرجال يا راشد ... روح يا عوض جهز لنا
 الغدا.
- عوض : مش كان شاي من شوية ؟!
 راشد : حاجة غريبة !!

عوض : ولا يهملك ياسعادة البية .. انا برضه مسامحك ..
مهما كان انت سعادة البية وأنا خدامك .. ما أقدرش
أقولك غير... ربنا يشفيك يا سعادة البية.

(وينطلق خارجا)

راشد : (غاضبا) قولت لك ميت مرة انا مش عيان .. شايف
يا سامي؟! كله من وفاء .. هيه اللي مفهامم اني
عيان

سامي : وايه يعني! .. هو العيا عيب؟!!

راشد : دول فاهمين اني مجنون.

سامي : مجنون؟! .. لا يا راشد .. أنت مكبر الحكاية قوي

.. بقي مراتك هاتقول الكلام ده ؟ .. أنت مش

هاتبطل العادة الهباب دي ؟ .. طول عمرك سيئ

الظن بالناس.. (كمن تذكر شيئا) آه صحيح

.. فكرتني ، ايه حكاية مشيرة بقة؟!!

راشد : هيه كلمتك؟!!

سامي : ايوه يا فقري .. بقة ياراجل حد يضيع كنز زي ده

من ايده؟! .. دي البت زي لهطة القشطة .

راشد : خلاص شغلها معاك .

سامي : ياريت .. بس هيه ترضي .. واهو كله سياحة.

راشد : بصراحة البنت ممتازة وأثبتت كفاءتها.

سامي : ولما هي ممتازة ومالية دماغك قوي كده .. طردتها

ليه؟

- راشد : عشان غبية..نسيت حدودها واتعدت الخط الأحمر..وقربت زيادة عن اللزوم.
- سامي : مش باقولك فقري ... ياريت يا خويا تقرب كمان وكمان ... من بكرة الصبح هاعينها عندي سكرتيرة خاصة.. خاصة جدا .
- راشد : علي فكرة .. مشيرة ما لهاش في الكلام الفاضي اللي في دماغك ده.
- سامي : والله العظيم أنت حيرتني معاك.. برضه هاشغلها.
- راشد : سيبك من مشيرة دلوقتي وخليك معايا.. انا عايزك في موضوع مهم.
- سامي : خير؟!
- راشد : انت الوحيد اللي أقدر أقوله الكلام ده .. حتي وفاء .. هاتقول عليا مجنون.
- سامي : في ايه يا راشد؟! .. قلقتني .
- راشد : مش عارف.
- سامي : نعم يا خويا!؟
- راشد : ماهي دي المصيبة يا سامي .. انا فعلا مش عارف.
- سامي : مش عارف ايه بالظبط ؟
- راشد : بس حاسس .. حاسس دايما بالقلق .. حاسس ان في حاجة خطيرة بتحصل ..أو هاتحصل .. حاسس دايما ان في حد بيدبرلي حاجة.
- سامي : حاجة ايه؟

- راشد : ما انا قولتلك مش عارف.
- سامي : ما تعقل بقه ياراشد ... ايه التخريف ده !!
- راشد : حتي انت ياسامي ؟!
- سامي : ماهو لو تفهمني ايه اللي مضايكك بالظبط .. كنت عرفت أرد عليك كويس .. انما ايه اللي مش عارف .. وحاسس .. فهمت أنا ايه دلوقتي غير مش عارف؟!
- راشد : بأه أنا قولت مافيش غيرك هافهمني ويقف جنبني!
- سامي : اقف جنبك دي سهلة .. انما أفهمك !! .. صعبة قوى دي.
- راشد : أنا قلقان قوى يا سامي.
- سامي : مش جديدة عليك .. ما انت طول عمرك قلقان وموسوس.
- راشد : متهيألي دايما ان في حد بيراقبني .. ان في عيون كثير متربصة ليا في كل مكان أروحه .
- سامي : أيوه .. أيوه .. ومتوقع في أي لحظة قنبلة تنفجر جنبك .. واللا رصاصة تنشك .. مش كده ؟
- راشد : تمام كده.
- سامي : شوقته .
- راشد : هو ايه ده ؟
- سامي : الفيلم اللي انت بتحكيه.
- راشد : سامي !! ... انا باتكلم جد .. انا حاسس ان في حد

بيدبرلي حاجة خطيرة.. سامي : حد مين ؟!
راشد : ما انت عارف ان أعدائي كثير .. والطمعانيين فيا
أكثر.

سامي : انت اللي مكبرها حبتين.
راشد : انا احساسى عمره ماخيب ياسامى.
سامي : مانتقلش يا راشد .. زى ما لك اعداء .. برضه لك

اصدقاء وناس كثير بتحبك .. احنا جنبك على طول،
بس انت اللي الشغل لاهيك حبتين (يرن تليفونه
المحمول) آلو .. أيوه يا شريف .. الجروب وصل ؟..
نص ساعة بالكثير وأكون عندك.. باي ... ماعلش
يا راشد .. عندي شغل مهم .. هاعدي عليك بعدين .
راشد : مش قولت هانتغدي معايا ؟

سامي : حظك وحش .. مالكش نصيب تضايقني النهاردة
..باي .

راشد : مع السلامة.. ابقى اتصل.
سامي : أكيد.. (كمن تذكر شيئاً) آه .. نسيت أقولك حاجة
مهمة جداً.

راشد : إيه هي ؟!
سامي : يا ريت تعرض نفسك على دكتور . (يخرج)
راشد : (غاضباً) إيه ؟!!

إظلام

المشهد الرابع

نفس المنظر السابق - راشد خارجا مندفعاً من حجرة جانبية وخلفه وفاء بملابس المنزل.

- راشد : (في ثورة) كفاية بقه يا وفاء .. أرجوكي .. كفاية حرام عليكى .
- وفاء : انت اللي حرام عليك اللي بتعمله في نفسك ده.
- راشد : وانا كنت اشتكيت ؟
- وفاء : أنا حاسة ببك يا راشد ... وعارفة انك بقالك أكثر من أسبوع ما دقتش طعم النوم .. والدليل انك كل ليلة تنام في مكان مختلف.
- راشد : ما هو مرواح لدكاترة مش رايح.
- وفاء : ليه يا راشد ؟
- راشد : عشان أنا مش عيان يا وفاء.
- وفاء : طب عشان خاطري .. خدني علي قد عقلي .. هاودني يا أخي .. ريجني.
- راشد : والناس تقول عليا ايه؟ ... انتي عايزة تفضحيني ؟

- وفاء : أنا يا راشد ؟ .. الله يسامحك .. بقه عشان قلبي عليك .. وعازاك ترتاح .. انت ليه مش عايز تفهمني ؟!
- راشد : فاهمك .. صدقيني فاهمك .. بس مش عايز اتعبك معايا .. وانت مش راضية تريح نفسك وتريحيني.
- وفاء : كل ده عشان عايزاك تروح لدكتور يطمنا عليك !!
- راشد : قولتك ميت مرة ده مجرد أرق .. ارهاق ذهني .. عشان في حاجات كتير شاغلاني .. وتابعة دماغي .
- وفاء : طب ما تشركني معاك .. شاركني في همومك.
- راشد : مش عايز أشغلك معايا يا وفاء .. دي هموم شغل ..
- امال سامح فين ؟
- وفاء : نايم يا سيدي .. انت مشغول عنه بالشركة .. وهو مشغول عنك بالنوم.
- راشد : يعني مش هاعرف ألاعبه الليلا دي .. يللا .. للصباح رباح.
- وفاء : مش هاتطلع تمام؟
- راشد : لأ .. انا هاسهر شوية .
- وفاء : راشد .. أرجوك ما تسهرش للصبح زي كل ليلة.
- راشد : حاضر ياوفاء .. هاحاول أنام .. تصبحي علي خير.
- وفاء : (في صعود للسلم) وانت من أهله.

راشد يستلقي على أحد المقاعد في اجهاد .. يمسك جبهته في
ارهاق .. يسترخي بجسده حتي يكاد ينعس لكنه ينتفض فجأة كأنه
يقاوم النوم .. يتلفت يمينا ويسارا في قلق .. ينهض كي يطفىء
بعض الأنوار حتي تصبح الإضاءة خافتة .. يدير جهاز كاسيت
على موسيقي هادئة ثم يجلس في استرخاء .. لحظات .. يداعب
النوم عينيه .. تصمت الموسيقي بغتة ويضاء المسرح اضاءة
كاملة .. يفيق راشد ويدور ببصره في دهشة حيث لا يوجد أحد).

راشد : إيه ده ؟ .. مين اللي قفل الكاسيت؟! .. مين اللي قاد
النور؟! .. (مناديا) .. عوض ..!! انت صحبت يا
عوض ؟ .. سعدية؟! .. وفاء ..!! (ينهض بقلق
متجها نحو الكاسيت .. يفاجأ بالاضاءة كما كانت
عليه .. وينبعث صوت الموسيقي من جديد .. يرتد
راشد فرعا .. يهز رأسه بشدة كمن يريد أن يفيق
.. يتلفت في خوف وقلق)

راشد : غريبة ..!! ... مش معقول كل ده يبقى تهيؤات ..! أنا
كنت باحلم واللا إيه؟! .. معقول هاتحرك وأنا نايم ؟!
(يعود الي المقعد ثانية ويتخذ وضع الاسترخاء من جديد -
تستمر الموسيقي برهة دون انقطاع وفجأة تبدأ تدريجيا في
التغير إلى نقات ترتفع رويدا رويدا ثم لاتلبث أن تصحبها بعض
الصرخات)

راشد : (ينتفض فرعا) إيه ده بقه ؟! .. الأصوات دي مش
معقول تكون متسجلة علي الشريط !!

(يُندفع نحو الكاسيت - ولكن قبل ان يصل اليه)
تقطع الأصوات وتعود الموسيقى الهادئة من جديد)
راشد : لأ بقه .. ده أكيد هزار .. عوض .. يا عوض ..
وفاء .. مين اللي هنا ؟! .. معقول اللي بيحصل
ده!!؟

(يعود الي مقعده في قلق - لايلبث ان يغلبه النعاس - تتغير
الإضاءة فجأة الي جو اشبه بالحلم)

صوت (في سخرية) مسكين .. مسكين يا راشد.

المقنع :

راشد : مين ؟! .. انت مين ؟! .. انت فين ؟! .. مين ده اللي
بيتكلم ؟!

ص.المقنع : مسكين ... مسكين.

راشد : انت مين ؟ .. المهزلة دي لازم تنتهي فورا .. أنا

لازم اعرف انت مين وعايز مني ايه؟

(يتجه إلى مفتاح الإضاءة بعصبية - ينطفئ النور تماما حتى يعم

الظلام - تملأ أصوات الصرخات والدقات والاستغاثات - راشد

يصرخ بغضب)

راشد : انت مين ؟ .. أنا عارف الصوت ده كويس .. ولازم

اعرف انت مين؟

(إضاءة خافتة تظهر أشخاص مقنعة تطارد راشد كما كان في

(الكابوس)

راشد : (في هستيرية) انتوا مين ؟ .. ودخلتوا هنا ازاي؟ ...

أنا متأكد ان انا دلوقتي صاحي .. وبكامل وعيى ..
 وهاكشفكم يا مجرمين .. عايزين توهمونى اني
 اتجننت... لكن ده بعدكم .. انا لازم اكشف الأفتنة
 دي ... لازم اكشفكم واحد واحد.
 (يظهر المقنع في عمق المسرح)

المقنع : مسكين .. مسكين يا راشد.
 راشد : وانت ؟.. لازم أعرف انت مين .. اكيد انت اللي
 جاي بهم .. انت السبب في ده كله.
 المقنع : مسكين .. مسكين يا راشد.
 راشد : لازم اكشف قناعك انت الأول ... انت مفتاح اللغز.
 (يحاول الوصول الي المقنع ولكن اليقين يمنعه - يحاصرونه
 في دائرة محكمة - يحاول الإفلات منهم دون جدوي)
 راشد : سيبوني .. ابعدوا عني .. عايزين مني ايه ؟ .. حرام
 عليكم .. سيبوني في حالي .. (ينقضون عليه -
 يصرخ بألم) لأ.. لأ.. آآآ.

... (إظلام سريع لحظات وتعود الاضاءة الخافتة كما كانت وصوت
 الموسيقى الهادئة ينبعث من جديد- راشد ملقى علي المقعد
 ينتفض جسده في ألم وكان وحوشا ضارية تنهش جسده- لا أثر
 للمقنعين)

راشد : حرام عليكم.. سيبوني بقه.. عايزين مني ايه؟!..
 آآآ.. (يستيقظ فجأة كمن كان في حلم).. ايه
 ده!!!؟.... مستحيل .. انا متأكد اني كنت صاحي ..

ايوه متأكد.. مستحيل أكون نمت!.. اللي شوفته كان
حقيقة مش كابوس.

(يتجه الي الكاسيت- يضيء المكان اضاءة كاملة- يفحص
الكاسيت كما يتفحص الشريط الموجود به)... كل شيء تمام ..
كل حاجة طبيعية.. الظاهر اني فعلا مرهق من قلة النوم.. لازم
اطلع انام شوية احسن كده ممكن اتجنن فعلا.
(يطفيء النور ويتجه الي الطابق العلوي حيث حجرة نومه -
وسط الظلام نسمع أصوات حركة مبهمة - حديث هامس مميز
صوت مشيرة وصالح في زي المقنع)

صالح : برافو عليكم .. اهو طلع عشان ينام.
رجل ١: احنا تحت أمرك يا باشا.
مشيرة : ماتضيعوش وقت .. يلا قوام.
صالح : هاتوا الأوراق من المكتب بسرعة .
رجل ٢: حاضر يا باشا.
صالح : خدوا بالكم .. مش عايز أي غلطة ورايا.
رجل ١: عيب يا باشا .. هيه دي أول مرة ! (يدخلون حجرة
المكتب)
صالح : انتي متأكدة ان الأوراق دي هنا في المكتب ؟
مشيرة : أكيد .. عمره ما كان بيشيل أوراق زي دي في
الشركة.
صالح : أنا مش عارف من غيرك كنت هاعمل ايه يا
مشيرة.

مشيرة : بالعكس .. ده انت اللي خدمنتني .. انا مستعدة أعمل
أي حاجة تقلق نومه ونقل راحتته ... لازم ينم
عالي عمله معايا.

صالح : هما اتأخروا ليه جوه ؟!

مشيرة : هاندخل اطمن عليهم.

(تفاجأ برأشه عند باب المكتب)

راشد : اطمني .. انا قافل عليهم كويس.

مشيرة : (بدهشة) انت ؟!

صالح : انت لسه ما نمتش ؟!

راشد : مش قولت لك قبل كدا.. مش هانام .. مش هانام

خالص عشان ما أشوفش كوابيس.

مشيرة : وانت فاكرك انك دلوقتي صاحي ؟!.. فاكرك انك فوقت

من الكابوس؟

راشد : العبوا غيرها .. ما خلاص .. لعبتكم انكشفت.. انا

سمعت كل حاجة.

صالح : (بهدهوء عجيب) سمعت ايه؟

راشد : كل اللي قولته انت و الهانم .. ورجالتك اللي انا

حابسهم جوه.. لحد ما أبلغ البوليس طبعاً ... بس

مش قبل ما أعرف الأول .. انت مين ؟! .. وعاليز

مني ايه بالظبط؟!

صالح : (يضحك بسخرية) مسكين .. مسكين يا راشد.

راشد : كفاية ... كفاية بقه أو هام..

- مشيرة : مش قوت لك هاتندم يا راشد بيه ؟!
- راشد : كان عندي حق يوم ما طردتك من الشركة .. جاية
 تطعنيني في ضهري يا مشيرة؟ .. ومين ده اللي انتي
 بعيني عشانه ؟
- صالح : انت اللي بعث الدنيا كلها بحبك لنفسك.
- راشد : انت مين؟! .. (يهجم علي صالح فجأة) انا لازم
 اعرف انت مين.. لازم أكشف القناع ده .. لازم
 اعرف مين اللي مستخبي وراءه .. لازم.
- (صالح يحاول المقاومة ، لكن راشد يتمكن منه وينزع القناع عن وجهه ليبري وجهه)
- راشد : (يرتد بدهشة بالغة) مين !!!... صالح !!!..
 مستحيل!!
- صالح : ايوه صالح.
- راشد : طب ليه !!!... ليه يا صالح ؟ ... فهمني... عملت
 فيك ايه عشان تعمل كده ؟!.. ده أنا أخوك .. أخوك
 يا صالح.
- صالح : أخويا .. كنت عملت ليا ايه عشان أبقى
 عليك ؟!.. أخويا وسابيني مرمي أنا وعيالي بناكل
 في طوب الأرض من الجوع؟.. وأنت هنا ولاداري
 بأي حاجة.. مرتاح ولحنا شقيانين .. شعبان ولحنا
 ميتين م الجوع .. دقيان ولحنا عريانين.
- راشد : مش ذنبي اني غني وانت فقير.

- صالح : انت عارف كويس قوي ان انا ليا النص في كل اللي عندك .. بعد ما نهبت حقي في شركة ابونا الله برحمه.
- راشد : انت ناسي ان انا اللي كنت شايل الشركة كلها علي كتافي .. وانت رحت اتجوزت واتلهيت في مراتك وعيالك وسبت كل حاجة؟!
- صالح : عشان ما عجبنيش اسلوبك في الشغل .. وصفقاتك المشبوهة.
- راشد : ولوقتي عاجباك ثروتي !! .. بعد ماعملت الملايين دي كلها ... جاي انت طمعان فيها... وعايز تنهبها عاجاهز.
- صالح : انا جاي آخذ حقي وحق ولادي في مال ابويا.. اللي انت استوليت عليه.
- راشد : وكنت فين من زمان ؟ .. ايه اللي جد دلوقتي ؟
- صالح : (بتأثر) ولادي هايضيعوا مني يا راشد .
- راشد : تقوم تسرق أخوك؟!
- صالح : ما فيش حد بيسرق حقه..
- راشد : (بتناول سماعة الهاتف) والله البوليس هو اللي يقدر يفتينا في الحكاية دي .. ياتري هايقول كده لما أبلغه انك اتهجمت عليا في فيلاتي وفي نص الليل انت وشوية مجرمين مأجرهم !!!
- صالح : (يخطف الهاتف من يده) مش هاتلق يا راشد ..

لأنني هاخلف عليك نلوقتني .
(يهجم عليه - يتعاركان بشراسة - يفتح باب المكتب فجأة اثر
محاولة من أعوان صالح لفتحه - يخرج الرجال ويتحدون مع
صالح ضد راشد الذي يسقط اثر ضربة علي رأسه)
صالح : (يضحك بسخرية) مسكين .. مسكين يا راشد.

انظلام

المشهد الخامس

نفس المنظر السابق - راشد ملقي علي المقعد - الوقت مبكر -
يستيقظ راشد فجأة يتلفت يمينا ويسارا بدهشة - يمسك رأسه
بالم

راشد : وفاء !! .. يا وفاء !! عوض ..

(تظهر سعدية حاملة الرضيع)

سعدية : (تهدده) ياتي كميلة .. انجعة .. انجعة.

راشد : سعدية .. سعدية (يلوح بيديه في ضيق) يا سعدية.

سعدية : (تنبيه لوجوده) انت هنا يا سعادة البيه ؟

راشد : أيوه .. فين وفاء هاتم ؟!

سعدية : سمير غانم ؟!

راشد : يووه .. انا ناقصك انتي كمان ؟

سعدية : هو مين ده اللي راح اللومان ؟

راشد : لومان ايه .. (ينادي بعصبية) عوض .. يا عوض.

سعدية : والله ما انا فاهمة حاجة. (تخرج وهي تلاعب

الرضيع)

عوض : (قادما من الداخل) أيوه يا سعادة البيه .. خير ؟!

- ! في حاجة؟! : راشد
- الهائم فين ؟ : عوض
- لسة نايمة يا سعادة البيه.. تحب أصحابها : لحضرتك؟! : وفاء
- (من الطابق الثاني) ما لوش لزوم يا عوض .. انا صحبت.. : عوض
- أي أوامر تانية يا بيه؟ : راشد
- اعلمي فنجان قهوة بسرعة. : عوض
- حاضر يا سعادة البيه.. (يخرج) : وفاء
- ايه ده يا راشد؟! .. انت برضه نمت هنا !!؟ : راشد
- تقريبا .. ما انا كان لازم اعرف الحقيقة. : وفاء
- حقيقة ايه؟ : راشد
- اللى كان بيحصلى .. الكوابيس و الأحلام المرعبة.. : وفاء
- أنا مش فاهمة حاجة .. انت شوفت كابوس تانى ؟! : راشد
- المرة دى حقيقة .. مش كابوس .. اقعدى بس وأنا أقولك كل حاجة .. (تجلس على أقرب مقعد) انتى عارفة الحاجات اللى كنت باشوفها فى الكوابيس دى .. الوجوه والأقنعة والصرخات .. كل ده كان حقيقى .. مش حلم . : وفاء
- حقيقى ؟! .. ازاي اذا كنت انت وحدك اللى بتسمعها؟! : راشد
- كانت خدعة .. حيلة دنيئة لابتراز أموالى و نهبها .

وفاء : تقصد ان حد كان قصده يوهمك بالحاجات دى؟!..
بس ازاي .. دى حاجات ينشوفها فى الأقلام و بس
يا راشد .

راشد : بس ده اللي حصل بالفعل .. أنا ليلة امبارح اتأكدت
من كل حاجة .. سمعتهم بودانى دول .. وكشفت
لعبتهم الدنيئة .

وفاء : الكلام ده كان هنا؟!!

راشد : فى نفس المكان اللي أنا فيه ده ..

وفاء : وهما راحوا فين دلوقتى؟!!

راشد : هربوا المجرمين بعد ما ضربونى على دماغى ،
فأغمى عليا .

وفاء : (تفحص رأسه بقلق) ضربوك؟! .. وريني راسك
كدا .. وانت دلوقتى عامل ايه؟!!

.. حاسس بحاجة؟! .. لازم تطلب دكتور يا راشد .

راشد : أنا كويس جدا .. المهم أبلغ البوليس الأول قبل ما
المجرم ده يهرب .

وفاء : انت عرفت شخصيتهم؟!!

راشد : مش هاتصدقى يا وفاء .. آخر شخص يخطر على
بالك .

وفاء : مين؟! ..

راشد : أخويا ..

وفاء : (بدهشة بالغة) مين؟!!

- راشد : صالح أ خويا .
- وفاء : (بدهشة) انت بتقول مين يا راشد ؟!
- راشد : مش قولتلك مش هاتصدقى ؟! .. آخر واحد كنت أتوقع انه يحقد عليا ويطمع فيا .. تخيلي يا وفاء انه متفق عليا هو ومشيرة .. البنت اللي كانت عندي في الشركة .. و جايب شوية بلطجية عشان يساعده في سرقتي .. وابتزاز أموالى .. بس أنا حبستهم في المكتب ده .. بس للأسف قدر يكسروا القفل بتاع الباب وهاجمونى كلهم على خوانة (أثناء حديثه يتجه الى باب المكتب) .. مش ممكن !! .. مستحيل ؟! .. أنا ما شوفتش مجرمين بالدقة دى .. تخيلي يا وفاء انهم ما كسروش قفل الباب ؟! .. بس ازاي قدروا يفتحوه ..
- (وفاء متسمة في مكانها بدهشة)
- راشد : وفاء ؟! .. مالك يا وفاء ؟! ما بتردش ليه ؟! ..
- وفاء : راشد ؟! .. انت فاهم الكلام اللي بتقوله ده ؟! ..
- راشد : وفاء ؟! .. بقولك متأكد .. أنا عارف انك بتعزى صالح قوى .. بس للأسف هيه دى الحقيقة .
- وفاء : انت متأكد ان اللي شوفته كان صالح أخوك .. مش حد يشبهه مثلا ؟!
- راشد : جراك ايه يا وفاء ؟! .. أنا هاتوه عن صالح ؟! ..
- يا ريت كان حد تانى .. (بالهم) تخيلي يا وفاء ..

كان عايز يقتلنى .. واحتمال كبير يكون افكرنى مت
فعلا لما ضربونى على راسى ووقعت مغمى عليا ..
أنا لازم أبلغ البوليس .

وفاء : بلاش ياراشد .. عشان خاطرى .

راشد : (يتناول سماعة الهاتف) يقولك كان عايز يقتلنى يا
وفاء .. أى نعم هوه أخويا شقيقى .. بس مش معنى
كده انى أسويه يكمل جريمته .. لازم البوليس
يتصرف معاه .. على الأقل يحمينى منه .

وفاء : أرجوك يا راشد .. بلاش .

راشد : الله ؟! .. جراك ايه يا وفاء ؟! .. أنا عارف يا
حبيبتى ان قلبك كبير ... بس فى حالة زى دى لازم
قرار صارم .

وفاء : طب أجل موضوع البوليس ده لبعدين يا راشد
... عشان خاطرى .

راشد : أنا مش فاهم انتى رافضة ليه أتصل بالبوليس ؟!
.. محد عارف هوه بيفكرلى فى ايه دلوقتى ؟!

وفاء : مفيش لزوم للبوليس يا راشد .. أرجوك .

راشد : أنا فهمت قصدك يا حبيبتى .. انتى بتفكرى فى
أولاده .. مش كده ؟! .. بس احنا مش هانكون
باقين عليه وقلبنا على أولاده اكتر منه .. أنا داخل
المكتب أشوف يمكن يكونوا خدوا ورق أو مستندات
مهمة والا حاجة .

(يخرج الى حجرة المكتب)

وفاء : (لازالت فى زهولها) مش ممكن .. مستحيل ..

أعمل ايه ؟! .. أتصرف ازاي دلوقتى ؟! .. يا رب
(صوت الجرس - يظهر عوض من المطبخ حاملا

القهوة)

وفاء : حط القهوة هنا و شوف مين يا عوض .

عوض : أمرك يا هانم . (يخرج حيث الباب الكبير) .

(بعد لحظات) ده سامى بيه .

وفاء : خليه يتفضل .

سامى : (يدخل - لعوض) مش قولتلك .. أنا مش عايز اذن

.. صباح الخير يا وفاء .

وفاء : صباح الخير يا سامى .. اتفضل .. جيت فى وقتك .

سامى : انتوا ايه حكايتكم معايا اليومين دول ؟! .. هوه أنا

دايما جاى فى وقتى كده ؟!

عوض : أى أوامر يا وفاء هانم ؟!

وفاء : شوف سامى بيه يشرب ايه ؟!

سامى : لأ متشكر .. ملوش لزوم .. أنا هاشرب القهوة دى .

عوض : بس دى بتاعة راشد بيه .

سامى : ابقى اعمله غيرها يا أخى .. ما البن عندكوا كتير .

وفاء : روح انت دلوقتى يا عوض .

عوض : أمرك يا هانم . (يدخل)

سامى : أمان فين راشد ؟!

- وفاء : جوه فى المكتب .. سامى ، أنا عايزاك فى موضوع مهم جدا .
- سامى : خير ؟! .. أكيد بخصوص راشد .
- وفاء : (بحزن) أيوه .
- سامى : ما أنا عارف .. ما هو قاللى امبارح .
- وفاء : قالك ايه ؟!
- سامى : كلام فارغ .. انتى عارفة راشد طول عمره شكاك وسئ الظن .. دايما يكبر المسائل ويبروزها فى اطار تانى خالص .. يعنى مثلا فنجان القهوة اللي أنا شربته بداله ده.. دلوقتى يعمل عليه حكاية .
- وفاء : و ما كلمكش عن حكاية الكوايس ؟!
- سامى : هيه دى أول مرة ؟! ... هو ده اللي فلقك بالشكل ده؟! .. ما تشغليش بالك.. أزمة و هاتعدى .
- وفاء : الموضوع أخطر من كدة بكثير يا سامى .. راشد ما بقاش طبيعى خالص .. عقله بقى بصورله حاجات غريبة جدا .. وكل ما أقوله روح لدكتور .. يتضايق و يزعل منى .
- سامى : أنا رأيى تسبيه على راحته .. كل رجال الأعمال كده .. النجاح سبب لهم داء اسمه الوسواس .. ايه هو ؟! .. مش عارف .. بس أنا سمعت كده .
- وفاء : أرجوك يا سامى .. أنت أقرب واحد لراشد .. ما فيش حد فى الدنيا بيتق فيه ويظمن له قدك .. أنا عايزاك

- تسمعنى كويس و أرجوك حاول تساعدنى .(تبكى)
سامى : ياه للدرجة دى ؟!.. الموضوع الظاهر كبير قوى ..
قوليلى يا وفاء .. بصراحة ..
.. راشد ببشك فيكى انت كمان ؟!
وفاء : (مستنكرة) لأ طبعا .. ايه الكلام ده يا سامى ؟!
سامى : امال ايه الحكاية ؟!
وفاء : راشد عايز يتصل بالبوليس ويبلغهم ان فى حد عايز
يقتله و يسرق ثروته .. وبيأكد انه شافه ليلة امبارح
و قامت بينهم معركة .
سامى : برافوا عليه انه قدر يكشف المجرم ده .
وفاء : انت عارف المجرم ده بيقى مين ؟!
سامى : أيا كان .. لازم ياخذ جزاءه ...مين ؟!
وفاء : (مواجهة لسامى كمن يلقي بقتيلة) صالح .. أخوه
راشد .
سامى : (يذعر واضح) مين ؟! .. صالح مين ؟!
وفاء : بقولك صالح أخو راشد .
سامى : انتى بتتكلمى جد ؟!.. راشد قالك كده ؟!
وفاء : واتصل فعلا بالبوليس .
سامى : (يستغرق فى ضحك هستيرى) صالح ؟! .. أخوه
.. مش ممكن .
وفاء : انت بتضحك على ايه ؟! .. نعمل ايه فى الكارثة
دى ؟!

- سامى : (مستمرا فى الضحك) وعازي يبلغ البوليس !!؟
 وفاء : أيوه .. (يضحك بشدة) بزمك دى حاجة تضحك ؟!
 سامى : آمال أعمل ايه بس .. مش بدل ما اتجنن ! .. انتى متأكدة انه قالك صالح أخوه ؟!
 وفاء : وبعدين معاك بقه !! .. آمال أنا ايه اللى تاعب أعصابى ..
 سامى : لا .. احنا لازم نلاقى حل فى المشكلة دى ؟! .. ده شئ زاد عن حده ..
 (يدخل راشد فى تلك اللحظة حاملا بعض الأوراق)
 راشد : سامى ؟! .. كويس انك جيت .
 سامى : عارف .. جيت فى وقتى ..
 راشد : هيه وفاء قالتلك ؟!
 سامى : (بتريده) أيوه . قالتلى .. صحيح الكلام ده يا راشد ؟!
 راشد : أيوه .. تصور يا سامى ؟! .. أخويا .. ابن أمى وأبويا ؟!
 سامى : راشد ؟! .. انت بتتكلم جد والا بتهزر ؟!
 راشد : جرى ايه يا سامى .. ودى فيها هزار ؟! .. ما تفهميه يا وفاء .
 وفاء : أفهمه ايه بس يا راشد ؟!
 راشد : بس الحمد لله .. الأوراق كلها كاملة .. ما لحقوش ياخذوا حاجة مهمة ..
 الأوراق دى لازم أحفظها فى مكان أأمن من هنا ..

أنا بأفكر أحطها ودبعة في البنك .

سامي : راشد ؟! .. بقولك إيه .. الحكاية دي مش داخله
دماغى خالص .. قول انك بتهزر .. بتشغلنا ؟! ..
قول بس (يضحك بتصنع) بتهزر مش كده ؟! .. لا ..

بس حلوة .. يا رجل ده احنا صدقنا

راشد : (بغضب) جرى إيه يا سامي ؟! .. فى إيه يا وفاء؟! ..
.. ما لكم .. تصرفاتكم كده مش عاجباني .. او عوا
تكونوا مش مصدقيني!! .. على العموم دلوقتي
البوليس هايكشف كل حاجة و يؤكد كلامى .

وفاء : راشد ؟! .. أرجوك يا راشد .

راشد : أرجوك يا راشد .. أرجوك يا راشد !! ... عمالة
تترجيني من الصبح ... عشان إيه ؟! .. مش عارف .
سامي : قلبها عليك يا أخي .. ده جزاءها !! ... ماتريحها بقه
وقولها انك بتهزر .

راشد : انتوا فاكريني مجنون ؟! .. والا عايزين تجننوني
فعلا ؟! .. بقولكم شوقته بعيني .. وشايل القناع من
علي وشه بايديا دول .

سامي : صالح ؟!

راشد : أيوه .. صالح أخويا .. وكان معاه مشيرة هانم .

سامي : بس ده مستحيل .

راشد : ليه ؟ ... اذا كان بيكرهني وعايز يورثني بالحيا ؟!

- سامي : باقولك مستحيل.
- وفاء : ارجوك يا سامي بلاش.
- سامي : لا يا وفاء .. لازم يعرف .. ده اذا كان فعلا بيتكلم جد.
- راشد : قصدك ايه انا مش فاهم حاجة ... في ايه يا وفاء؟
- سامي : صالح مات .
- راشد : ايه ؟
- وفاء : (بوجوم وخرن) ايوه يا راشد.
- راشد : يعني ايه ؟
- وفاء : (تبكي) عرفت ليه ماكنتش عايزاك تتصل بالبوليس؟
- سامي : صالح أخوك مات من سنتين يا راشد.
- راشد : مستحيل ... واللي حصل لمبارح ده ؟
- سامي : كان وهم ... كابوس.
- راشد : كابوس؟
- سامي : ايوه يا راشد.
- راشد : ازاي ؟ .. يعني صالح أخويا .. اللي انا شوفته امبارح بعنية دول .. وحاول يقتلني ..
- وفاء : (بصوت مختنق) ميت يا راشد.
- سامي : والدليل ان ما فيش حاجة ناقصة من أوراقك.
- وفاء : وباب المكتب اللي ما اتفتحش.
- راشد : (متمتما بدهشة) والخزنة .. انا اللي لسه فاتحها دلوقتي .. (في حيرة) طب ومشيرة !!؟

سامي : عقلك الباطن صورلك كده .. عشان عارف انك ظلمتها.

وفاء : راشد .. ارجوك .. عشان خاطري لازم دكتور.

راشد : (في ألم ومعاناة) أرجوكي يا وفاء .. أرجوكي ..

سببيني لوحدي ..

وفاء : راشد !!

راشد : سببيني أرجوكي.

(وفاء ذاهلة - تنصرف بهدوء)

سامي : وانا كمان .. مش عايزني امشي!! .. ساكت ليه ما

ترد عليا!!

راشد : أرجوك يا سامي .. دماغي هاتفجر .. مش قادر

اتحمل.

سامي : يبقي لازم تساعدنا عشان نقدر نقف جنبك ونخرجك

من الأزمة دي.

راشد : انت كمان يا سامي؟! .. انا مش مجنون .. مش

مجنون ..

سامي : ومين قال انك مجنون يا راشد؟

راشد : الهانم .. وتلاقبها مفهماك كده انت كمان .. قوللي ..

قالتلك ايه عني بالظبط؟

سامي : (غاضبا) طول ما الشك ده مالي نفسك ، عمرك ما

هاترتاح .. طول ما الكلام عندك بيتفسر بألف معني،

هاتفضل تعبان .. مش لازم كل كلمة يكون وراها

معاني مستخبية .. أو أي تصرف بريء تكون وراء
خيانة.. أو قصد خسيس .. فكر بعقلك يا راشد
وحاول توزن الأمور صح.

راشد : قصدك ايه ؟!.. انا شخص غير مترن؟!

سامي : وغير طبيعي كمان.

راشد : (بحدة) سامي!!

سامي : والكوابيس اللي بتشوفها دي وهم بتعذب بيه نفسك

.. خيال نسجته بارادتك .. كدبة ضحكت بيه علي

نفسك وصدقته .. لحد ما بقت حقيقة في عقلك

الباطن بتسيطر عليك.. لكن للأسف .. عقلك الواعي

كمان مش قادر يقلت من جبروت الشك اللي جواك

.. بدأ هو كمان يصدق أوهامك ويبروزها .. مش

كده وبس .. ده كمان عايز الناس اللي حواليك

تصدق .. وده مستحيل طبعا.. ما حدش هايعيش في

أوهامك دي غيرك .. لأن كل اللي حواليك مترنين

.. عارفين الحد الفاصل بين الوهم والحقيقة.

راشد : (بمعاناة) ارجوك .. كفاية.

سامي : لأ.. مش كفاية.. لازم تسمعي .. طول ما بترفض

تسمع ، عمرك ما هاتفوق .. انت مش سامع غير

صوتك انت بس .. مش هاتفوق غير لما تسلم ..

وتوافق تسمع .. وتشوف .. تسمع صوت اللي

حوالك .. وتشوف بعينونهم جنب عنك.

(يخرج سامي في هدوء - راشد وحيدا لم ينتبه لخروج)

راشد : حاولت .. حاولت كثير .. ما سمعتش .. ويوم ما سمعت ، ما سمعتش غير صريخ .. زن في وداني .. وش فظيع .. دق عالحيطان .. وعالبيان .. فوقي وتحتي .. في كل مكان .. ما قدرتش أقاوم .. سديت وداني .. وبحالقت عنيا .. حاولت أشوف .. ماقيتش قدامي غير وشوش لابسه قناع فوق قناع .. فوق قناع .. وشوش عجيبة .. لأ .. غريبة .. لأ .. رهيبة مرعبة .. دي مش وشوش .. دي وحوش .. جاية تنهش في لحمي .. جاية تنتقم مني .. مع اني ما عملتلهاش حاجة .. كنت دايما باسع صوت بيحزني .. صوت غريب، لكن عارفه كويس .. مش شايفه .. بس حاسس بيه .. حاسس ان ملامحه مش غريبة عني .. نفسه كان بيخرج ممزوج بأنفاسي .. دقات قلبه بنفس ايقاع دقات قلبي .. بعيد بس أقرب من روحي .. أناديه .. مايردش عليا .. أصرخ .. انت مين؟! .. مايجاوبنيش .. أترجاه .. خد يايدي .. ساعدني .. يبعد بعيد ويسيني ليهم .. أسد وداني واغمض عنيا واصرخ .. اصرخ بعلو صوتي .. أقوم من نومي مفزوع .. أفتح عنيا .. ألاقيني لوحدي .. برضه لوحدي .. نفس الأصوات .. نفس الشوشوش .. قصدي نفس الوحوش .. ما بقيتش

عارف أي حاجة .. غير اني لسه في وحدتي ..
تعبان .. غلبان .. عاجز .. مغلوب علي أمري.

(تتغير الإضاءة - صوت المقنع)

ص.المقنع: مسكين .. مسكين يا راشد.

راشد: (صارخا) انت مين ؟ ..

ص.المقنع: مسكين .. مسكين يا راشد.

راشد: انت فين ؟ .. رد عليا .. ساعدني .. ما تسينيش
لوحدي .

(يظهر المقنع - يقترب من راشد في جو أشبه بالحلم - ينحني

علي راشد ويحتويه بعطف)

المقنع: من هنا ورايح مش هاتكون لوحدك .. انا معاك يا
مسكين.

ستار

الفصل الثاني

المشهد الأول

حجرة نوم راشد - الوقت ليلا - ظلام دامس - يعلو صوت شخير راشد و تقلبه في فراشه كمن يحلم - شبح شخص يتسلل على أطراف أصابعه داخل الغرفة - يقترب من فراش راشد بحذر بالغ ينتبه اليه راشد فينتفض مفرعا من نومه ممسكا الرجل .

راشد : ايه ده ؟! .. انت مين ؟! .. وبتعمل ايه هنا ؟!

الرجل : أنا .. أنا .. (مرتبكا)

(راشد يضئ الحجرة بفتة)

راشد : مين ؟! .. عوض ؟!

عوض : أيوه يا سعادة البيه .. أنا عوض .

راشد : وبتعمل ايه في أوضتى في ساعة زى دى ؟!

عوض : لأ أبدا .. مفيش حاجة .. أنا كنت ..

راشد : (مقاطعا بحدة) كنت ايه ؟! .. انطق ..

عوض : روق بس يا سعادة البيه هدى أعصابك .. أنا

هافهمك كل حاجة .

راشد : انطق ..

- عوض : كنت باطمئن عليك يا سعادة البية .. بشوفك نايم
واللا لأ.
- راشد : نعم يا خويا ؟!
- عوض : أى والله العظيم يا بيه .. قلقت عليك .. فحبيت
أطمئن علي سعادتك .
- راشد : عايز تفهمنى انك سبت أوضتك ، و جاي تتسحب في
عز الليل عشان تطمئن عليا ؟!
- عوض : بحبك يا سعادة البية .. على العموم أنا راجع
أوضتى .
- راشد : (بوقفه) استنى هنا .. انت فاكرنى هاصدق الكلام
الفارغ ده ؟! . (بغضب) انت كنت هنا بتعمل ايه ؟!
- عوض : ما أنا قولت لحضرتك .
- راشد : كنت بتقرب من سريرى .. و فى عز الضلمة زى
اللى عايز يعمل عملة أو يرتكب جريمة ..
- (صارخا) كنت عايز تقتلنى يا عوض ؟
- عوض : أنا ؟! .. ايه الكلام ده يا بيه ؟! ..
- راشد : (منقضا عليه) آه يا خاين ياندل .. ده جزاات انى
مأمن لك ومسكنك فى بيتى .. انطق مين اللى
باعتك ؟!
- عوض : (يحاول الإفلات) ربنا يهديك يا سعاة البية .. هيه
النوبة جت تانى واللا ايه ؟!
- راشد : اخرس يا حيوان .. أنا مش هاسيبك غير لما أعرف

حكايتك ايه بالظبط ؟!

عوض : (**يَقُلْتُ مِنْهُ**) حكايتي ايه يا سعادة البيه .. والله العظيم أنا ما فاهم حاجة .

راشد : انطق .. قول حكايتك ايه بالظبط ؟!

عوض : وعائز حكايتي في ايه ؟! .. هاتعملها فيلم ؟!

راشد : انت هاتستهبل ؟!.. أنا من زمان وأنا مش مرتاحلك .

عوض : ليه يا سعادة البيه ؟! .. ده أنا حتى طيب وحبوب .

راشد : انت مين بالظبط ؟! .. وعائز ايه مني ؟!

عوض : أنا خدامك يا سعادة البيه .. وعائزك ترتاح .. ربنا

يهديك يا سعادة البيه .. ارجع نام في سريرك و

اتغطى كويس .. اعتبر نفسك ما شوفتتش ..

اعتبرني عفريت واللا أى حاجة .. (**بشكل مسرحي**)

انصرفي .. انصرفي يا روح عوض .. انصرفي

بسلام .. خللي البيه ينام .. حاضر .. حاضر ..

هانصرف أهه .. أنا منصرف .. تصبح على خير

يا سعادة البيه.. أنا منصرف أهه .

راشد : (**ينقض عليه بوحشية**) تعالى هنا .. أنا مش

هاسيبك غير لما أعرف ايه اللي بيدور في دماغك

بالظبط .

عوض : (**ممسكا رأسه بخوف**) ايه ؟ .. لأ يا بيه سيب

دماغي في حالها .. بعدين نتطرطش .

راشد : (**يتناول شمعاداتا ذهبيا ينهال على رأس عوض به**)

يوحشية / أنا مش هارحمك يا مجرم .. مش
هاسيك يا خاين .

عوض : (صارخا باللم) آى .. ليه كده يا بيه مش قولت لك
هانتطرطش ؟ ..

(يسقط مغشيا عليه - اظلام لحظات ثم يضاء المسرح على
نفس المنظر السابق - راشد نائم فى فراشه يعلو شخيرته لحظات
ثم يستيقظ قلقا متلفتا يمينا ويسارا فى دهشة .)

راشد : (مغادرا فراشه) اللهم اجعله خير ... عوض ... يا
عوض .

وفاء : (قادمة من الخارج) انت صحيت يا راشد ؟!

راشد : صباح الخير يا وفاء .. هيه الساعة كام دلوقتى ؟!

وفاء : واحدة ونص ..

راشد : ياه ... الظاهر انى نمت كثير النهاردة ... تصورى

يا وفاء ! .. دى أول مرة أنا بالعمق ده من أكثر

من أسبوعين ؟!

وفاء : كويس .. أفهم من كده ان ليلة امبارح ما كانش فيها

كوابيس ؟!

راشد : الحمد لله .. أول مرة أتهنى بالنوم .. عشان تتطمنى

يا ستى و تبطللى تكلمينى فى حكاية الدكتور دى

تانى .

وفاء : أنا مش فاهمة انت ولخذ الموضوع ده بحساسية ليه

كده ؟! .. الناس كلها بتروح تعمل تشيك آب على

- صحتها كل فترة من باب الاطمئنان مش أكثر .
- راشد : جرى ايه يا حبيبتي ! .. انتى ها تشككىنى فى
صحتى واللا ايه ؟! .. ما أنا قدامك أهه كويس و
عال العال .. و ان كان على الكابوس اياه .. أهو
بطل يجيلى .
- وفاء : و حكاية صالح دى ؟!
- راشد : انتى لسه فاكرة ؟! .. ما احنا لتقنا .. كان كابوس .
- وفاء : انت مش شايف انه كان غريب فعلا انك تتسى ان
أخوك الوحيد ميت بقاله سنتين وتتكلم عنه كأنه فعلا
حى ؟!
- راشد : (بضيق) وفاء .. قولنا كان كابوس .. مجرد
كابوس .
- وفاء : أنا باتكلم عن موقفك انت لما فقت منه .. انت فعلا
عاشت الكابوس فى الواقع .
- راشد : لسه مصرة تحسسينى دايما انى مجنون ؟!
- وفاء : ما تفهمنيش غلط يا راشد .. أرجوك .
- راشد : أرجوكى انتى ؟! .. أنا بما صدقت يوم عدى من
غير كابوس .
- وفاء : أنت متأكد يا راشد ؟!
- راشد : متأكد من ايه ؟!
- وفاء : انك ليلة امبارح نمت فعلا كويس ؟! .. متأكد انك
فعلا ما حلمتش بأى كوابيس ؟!

- راشد : (متوترا) قصدك ايه ؟!
- وفاء : (وكانها تخترق فكره) ليلة امبارح ..
- راشد : (بعصية) أحلفك يا ستى انى امبارح نمت كويس
- ..مفيش غير ... (بتر جملة بحده) .. أرجوكى ..
- أرجوكى بلاش يا وفاء .
- وفاء : (مقاطعة بنفس الحدة) كمل .. سكت ليه ؟!..مفيش
- غير حلم واحد مش كده ؟!
- راشد : حلم يا وفاء .. مش كابوس .. فيها ايه دى كمان ؟!
- ..بلاش أحلم عشان خاطرك !
- وفاء : أنا متأسفة .. مش قصدى .. طب احكىلى .. شوفت
- ايه ؟! .. حلمت بايه يا راشد ؟!
- راشد : (متذكرا الحلم) حلم غريب .. حاجة كدة مالهاش
- لازمة..لو قولتلك هاتضحكى.
- وفاء : قول يا راشد .. أنا فعلا عايزة أضحك .. احكىلى
- الحلم ..
- راشد : (ضاحكا بتوتر)آل ايه عوض دلخل أوضتى فى نص
- الليل يتسحب زى الحرامية.. افكرته جاي يموتنى
- .. فقممت من نومى مفزوع ومسكت فيه .. وهوه
- يصترخ..وفى الآخر رحت ضاربه على دماغه ..
- وفاء : (بالهم) كفاية .. كفاية يا راشد أرجوك .
- راشد : فى ايه يا وفاء .. أنا افكرتك هاتضحكى !!
- وفاء : راشد .. أرجوك .. اسمع كلامى ولو مرة واحدة

- ..بلاش نروح للدكتور .. نطلبه بيحي هنا .
- راشد: (بثورة) في ايه يا وفاء ؟! .. مالك ؟! .. انتي لليومين دول مش عاجباتي .. وايه إلحاحك العجيب ده ؟! ..ليه مصره دايما تطلعيني مش طبيعي ؟! .. ما هو مش معقول تكوني قاصدة تجنيني فعلا .
- وفاء : أنا خايفة عليك يا راشد .
- راشد : من ليه ؟!
- وفاء : من نفسك .. خايفة عليك منك .
- راشد : (بجنان مشوب بالقلق) وفاء !!... في حاجة انت مخيباها عليا؟ .. مش كذا؟! ..
- .. ليه هيه ؟! .. صارحيني..
- وفاء : حاضر يا راشد.. هاقولك .. (تتجه بصمت الي باب الحجرة تنادي) عوض .. يا عوض.
- راشد : بتنادي عوض ليه؟
- وفاء : دلوقتي هاتعرف .. (عوض بالقرب من الباب) تعالي يا عوض ادخل ما تخافش.
- (يدخل عوض مترددا في خوف وقد ربط رأسه بضمادة تخفي اصابته بالغة)
- راشد : (في دهشة) ايه ده ؟! .. ايه اللي في دماغك ده يا عوض؟!
- عوض : (في نعر) لا يا سعادة للييه .. مفيش حاجة في دماغي .. دي .. دي وحة .. وحة طالعالي علي

- كبر .
- راشد : الجرح اللي في دماغك ده من ايه يا عوض؟! ..
انطق .. قول!!
- عوض : أقولك ايه يا سعادة البيه ؟! .. ده انا صوتي اتبج ليلة
امبارح .. اقولك يا بيه بلاش .. هانتطرتش .. وانت
ولا هنا.
- راشد : (صارخا) يعني ايه الكلام ده ؟! ..
- وفاء : انت اللي ضربت عوض امبارح بالشمعدان في
راسه.
- راشد : مستحيل ... ده كان حلم.
- عوض : اللي غايطني انك سيبتي سايح في دمي ورجعت
نمت في سريرك وقعدت تشخر كمان ولا انت
هنا... لحد ما الست وفاء هانم الله يسترها مالحقتني
وقامت باللازم.
- راشد : انت بتخرف تقول ايه ؟! .. اكيد دي خدعة ..
مؤامرة .. أنا لازم أشوف الجرح ده بنفسي.
- عوض : (برعب) ايه ؟! ... الحقيني يا وفاء هانم.. ده عايز
يفتح دماغي ثاني!!
- وفاء : أرجوك يا راشد .. هيه دي الحقيقة... اللي شوفته
ده ما كانش حلم .. كان حقيقة.
- راشد : مش ممكن !! .. مستحيل!! ... طب ازاي ؟! ..
- وفاء : عرفت انا ايه اللي معذبني ؟! ... حالتك دي ما

يتسكتش عليها بعد كده.

عوض : أي والله ياسست هانم .. قوليله .. المرة دي فتح
دماغني .. مين عارف للمرة الجاية هافتح ايه
تاني؟!!

وفاء : خلاص يا عوض .. روح انت دلوقتي .

عوض : حاضر يا هانم .. واحد غيري ما كانش قعد في
البيت ده دقيقة واحدة بعد كده .. اتما العشرة ما
تهوش غير علي ولاد للحرام .. قلبي معاك يا سعادة
البيه .. ربنا .. (راشد يزجره بغضب) .. ربنا
يشفيني .(يخرج مسرعا)

وفاء : قولت ايه يا راشد !؟

راشد : مش عارف .

وفاء : نطّلب الدكتور يجيك هنا .. وتكون الجلسات سرية
.. كانه أي صديق جاي يزورك.

راشد : (يدفن رأسه بيديه) اللي تشوفيه يا وفاء .. أنا

خلاص .. ما بقيتش عارف أي حاجة .. مش
عارف اذا كنت دلوقتي صاحي واللا لسه نايم !!...
مش عارف حتى أنا قاعد معاك واللا بيتهيلالي !؟
... حاسس كأني تايه .. ضايع وسط أحلامي.

انظلام

المشهد الثاني

حجرة المكتب _ مكتب ضخم في الصدارة - مكتبة انيقة تحوي
عدد من الكتب والمراجع-خزانة صغيرة في أحد الأركان ...
تدخل وفاء ومعها الدكتور نافع.

- وفاء: اتفضل يا دكتور.
نافع: متشكر يا هانم .. آمال فين المريض؟
وفاء: أرجوك وطي صوتك.
نافع: حاضر .. بس ليه؟
وفاء: لأنه مش مقتنع انه مريض.
نافع: مفهوم .. مفهوم.. معظم المرضى النفسيين مش
مقتنعين انهم غير أسوياء.
وفاء: أرجوك يا دكتور .. مش هاوصيك عليه.
نافع: اطمني يا هانم.. ده شغلي.. انا فهمت دلوقتي ليه
حضرتك أصريتي ان الجلسة تكون هنا في البيت،
مش في العيادة عندي .
(يدخل راشد في ملابس رسمية)

- راشد : صباح الخير .
- وفاء : صباح الخير يا راشد .. أعرفك بالدكتور نافع .
- نافع : دكتوراه في الأمراض النفسية والعصبية .
- راشد : (بضيق بالغ) أهلا وسهلا .
- وفاء : طيب .. أسببكم أنا عشان تاخذوا راحتكم .
- نافع : اتفضلني حضرتك .. وكوني مطمئنة تماما .
- وفاء : (في خروج) يا ريت تتعاون مع الدكتور يا راشد ..
- عشان خاطري . (تخرج)
- راشد : (يتأمل نافع) أهلا وسهلا .
- نافع : (بابسامة عريضة) أهلا بحضرتك .. اتفضل أقعد
- فين ؟!
- راشد : (ببرود) في أي حنة .
- نافع : (يجلس) مرسية .. اتفضل استريح .
- راشد : مش عايز اتهدب .
- نافع : اللي يريحك .
- راشد : انت بتبصلي كده ليه ؟
- نافع : بلاش أبصلك خالص .. لو ده هايرحك .. تحب
- أودي وشي للحيلة؟!
- راشد : انت بتهاودني ؟! .. واللا بتحاول تراضيني
- وخلص؟!
- نافع : ريلاكس .. هدي أعصابك يا راشد بيه عشان نعرف
- نتكلم .

- راشد : أنا هادي جدا يا دكتور .. والا انت فاكروني
مجنون؟
- نافع : مجنون؟! ... مين قال كده؟!
- راشد : امال انت هنا بتعمل ايه ؟ .. مش حضرتك بتاع
مجانيين برضه؟!
- نافع : (باتفعال) لأ.. من فضلك .. لو سمحت.. أنا
دكتوراه في الأمراض النفسية والعصبية .. مش
بتاع دي اللي انت بتقولها.. يعني ايه بتاع
مجانيين!!!
- راشد : خلاص يا دكتور انا آسف .. ما أقصدش أضايقك..
بس انت فعلا تخصصك كده.
- نافع : في تخصص في الدنيا اسمه بتاع مجانيين ؟! .. عيب
يا أستاذ .. ده أنا دكتوراه .. دكتوراه.. مش ماجستير
واللا دبلومة.. ودكتوراه بطلوع الروح مش أي
دكتورة.
- راشد : طب اهدي يا دكتور .. انا آسف.. حقك عليا.. قولي
بقه قالتلك ايه بالضبط؟
- نافع : هيه مين دي ؟
- راشد : مراتي.
- نافع : وصفت لي حالتك.. لكن ده مايمنعش اني أسمعك .
- راشد : قالتلك اني مجنون ؟! .. مش كده؟!
- نافع : مانتقل بقه يا راشد بيه وخليني أشوف شغلي.

- راشد : أعقل!!.. أهو .. يبقي فعلا فهمتك اني مجنون.
- نافع : يا سيدي كلنا مجانين ... إلي أن يثبت العكس..
- اثبت لي بقه انك عاقل.
- راشد : ما تثبت هيه ان أنا مجنون!!
- نافع : أحلفاك بابه إن المدام ما جابتش سيرة الجنان دي خالص .. كل اللي كلمتني عنه الكوابيس اللي انت بتشوفها..و..
- راشد : سكنت ليه؟!.. وابه يا دكتور؟!.. كمل أرجوك.
- نافع : ومعايشتك لبعض الكوابيس دي في حياتك الواقعية .. مثلا .. حكاية أخوك اللي مات من سنتين وافتكركه جاي يفتلك.. والخدام اللي انت ضربته وافتكركت ان ده مجرد حلم.
- راشد : دي قالتلك كل حاجة !.. وبالتفصيل كمان!!
- نافع : ده ما يمنعش اني لازم أسمع منك شخصيا.. وانك لازم تكلمني بكل صراحة.. عشان أقدر أساعدك.
- راشد : ومن قالك اني محتاج مساعدة?!
- نافع : ماتحاولش تخدع نفسك.. انت عارف كويس ان حالتك مش طبيعية ..وانها كل يوم بتزيد سوء .. وانك في قرارة نفسك عايز حد يخرجك من الحالة دي.
- راشد : انت بتكلمني كأني فعلا مريض!!
- نافع : عشان هيه دي الحقيقة.. مهما حاولت تهرب منها.

- راشد : أرجوك يا دكتور !!
- نافع : أرجوك انت.. دي فرصتك الوحيدة .. مفيش حد غيري هابقدر يساعذك.
- راشد : وانا ما طلبتش مساعدتك.
- نافع : انت مش واعي لتصرفاتك .. في قوة خفية كامنة جواك هيه اللي بتدفعك لأي تصرف .. قوة حكمت عقلك الباطن وقدرت تسيطر عليه ونفذت منه لعقلك الواعي .
- راشد : انت كلامك زيه !.. كلكم بتكلموني بنفس المنطق .. عايزين تقنعوني بشيء واحد بس .. ان أنا مجنون.
- نافع : الشك اللي جواك ده هوه اللي هابقضي عليك.
- راشد : من فضلك يا دكتور تنهي المهزلة دي حالا ... أنا وافقت اقبالك بس عشان اسكت وفاء .. انما مش هاسمحلك بأي تجاوز.
- نافع : التجاوز هو صميم شغلي يا راشد بيه .. لأنني باتعامل مع حالات تجاوزت كل حدود العقل والمنطق.. ولازم أخترق عقولها بكل تجاوز عشان أقدر أحط ايدي علي الخلل واقدر أعالجه.
- راشد : من فضلك يا دكتور .. لتاني مرة تتجاوز وتتهمني بالخلل العقلي.
- نافع : ما تحاولش تهرب.

راشد : (صارخا) أنت عايز مني ايه ؟ .. عايزين مني ايه ؟!
 (تتغير الاضاءة فجأة بجو أشبه بالحلم - ترتفع الدقات و
 الصرخات المعتادة رويدا رويدا - يظهر مجموعة المقنعين في
 حركات وحشية)

نافع : (بلهجة و صوت عميق) عايزين نساعدك .
 ص المقنع : مسكين .. مسكين يا راشد .
 راشد : انتوا مين ؟! .. أكيد دى مؤامرة .. أنا متأكد إنها
 مؤامرة دنيئة ..
 نافع : وليه ما يكونش كابوس .
 راشد : كابوس ؟! ..
 نافع : أو هو ده الواقع فعلا .. مين عارف .
 راشد : انتوا عايزين تجننوني .. أيوه عايزين توصلوني
 للجنون .

نافع : مسكين .. مش دارى باللى انت فيه .
 راشد : كلكم خونة .. كلكم أندال ..
 المقنع : مسكين .. مسكين يا راشد .
 راشد : خونة .. أندال .
 نافع : اهدى يا راشد .. خلينا نشوف شغلنا .. امسكوه .
 (المقنعون يحيطون براسه وهو يصرخ في وحشية - يعد نافع

حقنة خاصة يخرجها من حقيبته ويقترب من راشد)
 راشد : ابعدوا عنى .. سيبوني .. يا وفاء .. الحقيني يا وفاء
 .. عوض .. يا عوض .

نافع : (بعد للحقن) ريلاكس .. ريلاكس.

راشد : خونة .. أندال .. خونة .

(يدفع نافع بالحقنة في نراعه - يصرخ راشد بألم ، اظلام

تدريجى)

نافع : دلوقتى هاتبقى أفضل .. أفضل بكثير .

ص المقنع : مسكين .. مسكين يا راشد .

(اظلام)

(اضاعة مباغتة - راشد ملقى على أحد المقاعد فى حجرة
المكتب - يصرخ بألم منتبها كمن استيقظ من حلم - لوجود نافع
أو المقنعين)

راشد : عوض .. يا عوض .

(يدخل عوض معصوب الرأس)

عوض : أبوه يا سعادة البيه .. انت صحيت ؟!

راشد : (بدھشة و ألم) هوه أنا كنت نمت ؟!

عوض : ده أنا كنت لسه هاشيك أطلعك فوق .. عالموم

لحنا لسه فيها .. حضرتك كمل نوم .. أو اعمل

نفسك نايـم كده وكده يعنى .. وأنا أشيك على

ضهرى لحد سريرك فوق .. لحنا لينا كام سعادة

البيه .. بس اوعى تعملها عليا .. مش عشان حاجة

لا سمح الله .. (مشيرا لرأسه) ده بس عشان الجرح

- .. حضرتك عارف .. التلوث والماكروبات .
- راشد : (طول حديث عوض يحاول الانتباه) أنا نمت امتى ؟
و ازای ؟
- عوض : نوم العوافى يا سعادة البيه .. حد بيعرف نام امتى
واللا ازای ؟!
- راشد : والدكتور .. مش اسمه نافع برضه ؟! ..واللاده
كمان كان وهم .
- عوض : نافع ايه يا سعادة البيه ؟! هو دخل هنا نافع ..خرج
من عند حضرتك مش نافع فى حاجة خالص .
- راشد : قوللى يا عوض .. ايه اللى حصل بالظبط .
- عوض : الست وفاء سابنكم مع بعض جوه المكتب وفضلت
قاعدة بره .. ساعة، ساعتين .. وفجأة... (يصمت)
- راشد : ايه ؟! .. كمل .. سكت ليه ؟!
- عوض : أنا بأقول ايه يا سعادة البيه .. ما تكمل نومك
وأشيلك أنا و خلاص .
- راشد : (مهذب) انت هاتكمل واللا لا ؟! .ايه اللى حصل ؟!
- عوض : (خائف) حاضر .. وفجأة ... سمعناك بتصرخ
وتزعق ..اطلع بره .. طلّعوا الرجل ده بره .. أنا
مش مجنون يا ناس .. أنا أعقل منكم .. وكلام تانى
كده ما يصحش أقوله .
- راشد : ليه ؟! .. قولت ايه تانى ؟!
- عوض : يعنى .. كلام قبيح بصراحة .. لا ثقافتى ولا أخلاقى

- ! .. تسمح لى أقوله .. وبصرراحة كده أنا ما فهمتوش
 راشد : ويعدين .. ليه للى حصل .
- عوض : (كمن يسرد فيلما سينماليا) انفتح الباب ..
 وبصيت لقيت ..
 راشد : لقيت ليه ؟!
- عوض : (يقنى بيلامة) بصيت .. ولأول مرة أنا بصيت ..
 ولأول مرة لقيتتى باشوف وبابص .
- راشد : انت هاتغنيها .. شوقت ليه يا عوض .. أرجوك .
- عوض : الله .. انت زعلت يا بيه .. ده أنا كنت عايز
 لأضحكك ولأخفف عنك شوية .
- راشد : ليه .. انت شوقت ليه يا عوض .. كلمنى بصراحة
 عوض : لا أبدا حضرتك ماسك فى خناق الليه للدكتور
 ومبهدله على الآخر .. ده انت عملت فيه عمال ..
 ده حلف ميت يمين انه مش مهوب هنا تانى .
- راشد : ولل كلام ده كان لمتى ؟!
- عوض : من حوالى ساعتين .. وبعدها حضرتك رحت فى
 للنوم مكانك كده .
- راشد : وللحقنة ؟! .. والناس للى كانوا هنا ؟!
- عوض : حقنة ليه يا سعادة الليه .. وناس مين ؟! ما كانت
 فى أى حد خالص غير للدكتور وأنا والهانم
 و حضرتك .
- راشد : أنا .. أنا مش فاهم حاجة .. نص الكابوس حقيقي

والنص الثاني خيال .. أنا تعبنا قوى يا عوض ..
أنا .. (بيكى)

عوض : (يريت عليه بخان) ألف سلامة عليك يا سعادة
البية .. ان شاء الله العدوين.

راشد : عوض .

عوض : أمرك يا راشد بيه .

راشد : (بخزن واستسلام) ادعيلي بالشفاء يا عوض .

إفلام

المشهد الثالث

حجرة الاستقبال - راشد ملقي علي مقعد في شروء... يحدث نفسه.

راشد : يعني ليه ؟! .. بقيت مجنون رسمي ؟! ... كلهم طلّعوا صبح ، وأنا الوحيد الغلطان ؟! .. طب ليه ؟! .. كل ده بيحصل لي ليه ؟! .. وايشمعني أنا بالذات ؟! .. بس أنا مش مجنون .. مش مجنون .. وأنا متأكد من ده كويس .. أنا واعي لكل اللي بيحصل حواليا.. لأ .. أكيد في حاجة غلط.. في حلقة مفقودة مش قادر أوصل لها.. أكيد في تفسير منطقي لكل اللي بيحصل ده.. بس أوصل له ازاي ؟! .. وألقاه عند مين ؟!

ص المقنع : (كأنه يأتي من بئر سحيق) مسكين .. مسكين يا راشد.

راشد : انت فين ؟! .. سيببتي ورحت فين ؟! .. انت مش قولت انك مش هاتسيبني لوحدي ثاني ؟!

(يظهر المقنع يهدوء)

- المقنع : وأنا فعلا جنبك .. دائما معاك.
راشد : انت ايه؟! حلم؟! علم؟! ... خيال؟! .. حقيقة؟! ..
كابوس؟! (بيأس) مش عارف .. ما بقيتش عارف
حاجة خالص.
المقنع : مش يمكن ده اللي عايزين يوصلوله?
راشد : هما مين ؟
المقنع : اللي عايزين يوهموك انك مجنون.
راشد : ازاي؟!
المقنع : لعبة يلعبوها !!
راشد : لعبة ؟!
المقنع : عشان يقضوا عليك.
راشد : ليه ..؟ ده انا باحبهم.
المقنع : ويا تري هما كمان بيحبوك ؟!
راشد : أكيد.
المقنع : عشان كده عايزين يدمروك!!
راشد : يدمروني ؟!!
المقنع : (يبتعد فسي هدوء عجيب حتى يختفي وهو يردد)
مسكين .. مسكين يا راشد.
راشد : يدمروني ؟! .. طب ليه ؟!
(تظهر وفاء في تهيف للخروج)
وفاء : (تنادي) سعدية .. يا سعدية .. وبعدين بقه؟! .. سعدية.

- عوض : (قادمنا من الخارج) أيوه يا ست هانم... حضرتك بتنادي علي مين ؟! .. والله لو فضلتي تنادي للسنة الجاية... دي منفضة للدنيا كلها.
- وفاء : امال هيه فين ؟
- عوض : مع البيه الصغير في الجينة... تحبي أندهالك ؟
- وفاء : لا .. روح أنت .. أنا كده كده خارجة.
- (يخرج عوض)
- راشد : انتي خارجة واللا إيه ؟!
- وفاء : ماما تعبانة قوي ولازم أروح أشوفها.
- راشد : ألف سلامة عليها.. السكر برضه ؟
- وفاء : أكيد .. دي حتي كان نفسها تظمن عليك ما قدرتش تخرج.
- راشد : (بضيق) إيه ؟! .. انتي قولتيلها اني عيان ؟!
- وفاء : يعني..
- راشد : (غاضباً) يعني إيه ؟!!
- وفاء : اظمن يا راشد .. قولتلها تعب بسيط.. انا عارفة انك مش عايز حد يعرف حالتك.
- راشد : ومالها حالتي ؟! .. إيه !.. خلاص بقيت مجنون ؟!
- وفاء : وبعدين معاك يا راشد .. أنت عارف اني ما أقصدش كده .
- راشد : آسف يا مدام .. اصل أنا بقيت عقلية مختلة .. مش قادر أوزن كلامي.

وفاء : أرجوك يا راشد .. لو مش عايزني أروح لماما
بلاش .. لو ده يريحك.

راشد : لأ يا ستي روعي .. وابقى سلميلي عليها.. وبلاش
تجيبوا سيرتي .. أرجوكي.

(يدخل عوض حاملا صينية عليها كوب ماء وعلمة دواء)

عوض : الدوا يا راشد بيه.

راشد : (بضيق) يادي الدوا !!؟

وفاء : راشد .. أرجوك .. الدوا ده آخر أمل لدينا.

راشد : (بشك) آخر أمل في إيه !!؟

وفاء : في شفاك طبعا.

راشد : (بلهجة مصرية) اطمني .. اطمني خالص يا ..

حبيبتي.. مع السلامة ..

روحي انتي عشان ما تتأخرين.

وفاء : (في خروج) مش هاوصيك علي البيه يا عوض.

عوض : مع السلامة يا ست هانم ..البيه في عنيا.. اتفضل
الدوا بابيه.

راشد : حطه هنا .. انا هاخذه براحتي .. وروح انت.

عوض : امرك يا سعادة البيه. (يهم بالخروج - يرن

جرس الباب)

راشد : شوف مين الأول.

عوض : حاضر .. (يتجه الي الباب) ده سامي بيه..

(يدخل سامي)

- راشد : سامي ؟ .. أهلا وسهلا.
- سامي : عارف .. عارف .. جيت في وقتي .. ما لوش لزوم
يا عوض.
- عوض : هوه ايه ده؟
- سامي : انك تعمل قهوة أو شاي .. عشان انا مستعجل جدا.
- عوض : ليه بس كده يابيه .. كنا عايزين نعمل واجب.
- (يدخل)
- سامي : طمني يا راشد .. اخبارك ايه؟!
- راشد : الحمد لله .. النهاردة أفضل بكثير.
- سامي : الحمد لله .. كده أقدر أسافر وانا مطمئن عليك.
- راشد : تسافر؟!
- سامي : سفيرة سريعة كده .. بيزنس.
- راشد : بيزنس وللا .. ؟!
- سامي : (ضاحكا) يعني .. من ده علي ده.
- راشد : فين؟!
- سامي : روما .. مش هاتأخر .. أسبوع بالكثير.
- راشد : اتصل أول ما ترجع.
- سامي : ده أكسيد .. اشوف وشك بخير .. أصل معاد الطائرة
- خلاص .. عايز حاجة من روما؟
- راشد : مرسية .. مع السلامة.
- سامي : (فسي خروج) آه .. مش هاوصيك يا راشد .. تاخذ
الدوا في معاده .. ده آخر أمل لينا.

(يخرج سامي تاركا راشداً في دهول أثر جملة الأخيرة)

راشد : آخر أمل في إيه ؟

ص. وفاء : في شفاك طبعاً.

(يتأمل راشداً الدواء في شك وريبة - ينظر حيث مضى سامي)

ص المقنع : (بسخرية) بيجبوك .. يا مسكين.

(يضع الدواء جانباً - يتجه إلى التليفون - يبحث في الدليل -

يطلب رقماً)

راشد : الو .. المطار؟ .. لو سمحتي من فضلك .. في رحلة

طلعة روما النهاردة؟ ..

طلعت من ساعة؟! .. مافيش رحلة ثانية؟ ..

الفجر؟! .. طيب انا عايز لتأكد من حجز باسمي ..

أيوه .. سامي عبد الرحمن حسن .. (ينتظر لحظات)

أيوه يا آنسة .. مفيش؟! .. مفيش أي أماكن ..

مرسيه.

(يضع السماعة ويطلب رقماً آخر بتوتر)

راشد : آلو .. أيوه يا حماتي .. انا راشد .. ازيك وازاي

صحتك؟ .. الحمد لله .. وفاء عندك ؟ .. إيه ؟ ..

شهرين ؟ .. بقالك شهرين ما شوقتيهاش؟! .. لا أبداً

.. تلاقيا في الطريق .. انا حبيت بس أطمئن علي

صحتك .. مع السلامة.

(يضع السماعة في دهول - يسمع صوت المقنع)

ص المقنع: مش قولت لك .. لعبة.
راشد: (في غضب) خونة .. اندال .. خونة.

إسلام

المشهد الرابع

حديقة الفيلا - شرفة الي حجرة وفاء - شجرة ضخمة بجوار
الشرقة - الوقت ليلا سامي يتسلل في حذر بالغ مقتربا من
الشرقة - يطلق صغيرا مميزا أو يلقي بحجر صغير الي الشرقة -
تظهر وفاء في رداء نومها.

وفاء : سامي ؟ .. اتأخرت ليه؟

سامي : خفت آجي بدري حد يلمحني.

وفاء : اشمعني النهاردة ؟

سامي : مش عارف .. قلبي مقبوض .. ده أنا حتي فكرت
ما جيش.

وفاء : أخص عليك .. أهون عليك؟!؟

سامي : ما هو ده اللي خلاني آجي .. ما أقدرش أبعد عنك
يوم.

وفاء : بجد يا سامي؟

سامي : عندك شك في كده؟!؟

وفاء : ما هو ده اللي مصبرني .. ده الأمل اللي انا عايشة
عليه.

- سامي : هانت يا وفاء ..فاضل عا الحلو دقة.
- وفاء : امتي بقه يا سامي ؟ .. انا خلاص زهقت .. مش عارفة اعمل معاه ايه ثاني!!
- سامي : هو فين دلوقتي ؟!
- وفاء : نايم في أوضته.
- سامي : انتي متأكدة.
- وفاء : طبعا .. ده أنا حاطاله الحباية بنفسي.
- سامي : انتي متأكدة يا حبيبتي انه بياخد الحبوب بانتظام؟
- وفاء : طبعا .. هوه بعد اللي ورينا هوله ده يقدر يرفض أو يقاوح!
- سامي : عال .. عال .. فاضل خطوة واحدة .. ونوصل لهدفنا.
- وفاء : المصحة ؟
- سامي : ودي مش سهلة يا حبيبتي .. خصوصا مع شخصية زي راشد .
- وفاء : طب والعمل؟
- سامي : نكمل اللعبة لآخرها.
- وفاء : ولو كشفنا؟!
- سامي : ما حدش ها يصدق.
- وفاء : رينا يستر.
- سامي : أهم حاجة يأخذ الحبوب بانتظام.
- وفاء : باحاول معاه بكل جهدي.

سامي : لو قدرتي تحطيهاله في الأكل .. في الميه حتى ..
المهم انه ياخذها.

وفاء : وعوض ؟!

سامي : ماله ؟ .. إحنا مش مظبطينه !

وفاء : خايفة يكشف سرنا.

سامي : ما تتسبش انه مشاركنا في كل حاجة .. يعني اللي

هايضرنا يضره .. وبعدين انتي بقيتي شكاكه كده

ليه ؟ .. انتي اتعديتي من راشد واللا ايه؟

وفاء : اصل انت بعيد يا سامي .. انا اللي في وشه ليل

ونهار.

سامي : وصدق اني دلوقتي في روما ؟

وفاء : أكيد صدق .. ايه اللي يخليه يشك!

سامي : عندك حق .. هاشي أنا بقه .. أشوفك بكرة؟

وفاء : لأ .. بلاش أنا أخرج بكرة .. تعالي أنت أحسن.

سامي : ماشي .. هاجيلك زي دلوقتي .. اشوف وشك بخير.

وفاء : خد بالك من نفسك يا سامي.

سامي : ما تقلقيش عليا .. ادخلي إنتي أوضتك .. تصبحي

علي خير.

وفاء : وانت من أهله.

(تدخل وتغلق شرفتها - فور اختفائها يظهر راشد فجأة ليفاجئ

سامي)

راشد : (بغضب هائل) خاين.

- سامي : راشد .
- راشد : حمد الله عالسلامة .. رجعت من روما امتي ؟!
- سامي : ما أنا لسه كنت ها..
- راشد : (مقاطعا) كفاية .. عايز تقول ايه تاني؟
- سامي : راشد .. أنا ..
- راشد : أنت نذل .. جبان .. خاين.
- سامي : أنت فهمت ايه ؟
- راشد : ده أنا شوفت بعنيا .. وسمعت بوداني .. يا ريت كان حد قالني ما كنتش هاصدق.
- سامي : أنت أكيد فاهم غلط.
- راشد : عايز تخدعني تاني ؟ .. ده أنت الوحيد اللي عمري ما شكيت فيك .. آخر واحد كنت أتخيل انه يخوني ..
- ومع مين ؟! .. وفاء ؟! .. مراتي !!!
- سامي : راشد أنت بتقول ايه ؟
- راشد : (صارخا) ليه ؟ .. عملت فيك ايه؟!
- سامي : راشد .. ما تخلّش الشك يسيطر عليك.
- راشد : يا ريت كان في مجال للشك .. كنت كدبت نفسي.
- سامي : طب اهدا بس وأنا أفهمك كل حاجة.
- راشد : ما أنا فهمت كل حاجة .. عايزين تجننوني وترمونني في مصحة .. عشان تحجروا عليا وتورثوني بالحب .. حرام عليكم ده أنا كنت فعلا قربت أصدق اتني مجنون/ سامي : (يضحك بعصبية) أنت

- صدقْت؟ ... ده إحنا كنا بنهزر معاك يا راجل.
- راشد : (يهجم عليه بوحشية) تاني ؟!! .. عايز تخدعني تاني؟ .. أنت إيه ؟ .. جنسك إيه ؟!
- سامي : (في دفاع) راشد .. اعقل يا مجنون.
- راشد : (يخنقه بوحشية) هوه في مجنون بيعقل يا غبي ؟
- سامي : (يكاد يخنق) هاموت .. هاموت يا راشد .. راشد.
- راشد : ده أقل عقاب تستحقه يا كلب.. لازم تموت .. ومرة واحدة مش كفاية .. لو أقدر أموتك تاني وتالت وألف .. لكن للأسف .. هيه موتة واحدة بس.
- سامي : (يتنفس بصعوبة) راشد.
- راشد : مش عايز اسمع صوتك .. مش عايز اسمع اسمي علي لسانك .. يا خاين .. يا نذل.
- (يخسرج سامي ثم يسقط جثة هامدة .. راشد يتركه يسقط في دهول - ينظر الي شرفة وفاء بوحشية)
- راشد : أما انتي يا خاينة .. حسابك هايكون أشد... وأمر.

إفلام

المشهد الخامس

حجرة الاستقبال- عوض وقد أزال الضمادة من علي رأسه -
يتجه الي باب الفيللا لثر رنين الجرس- يدخل الدكتور نافع.

- عوض : دكتور نافع ؟! .. انت لي للى جابك تاني ؟!
نافع : و انت مالك انت يا بارد ؟!
عوض : اسمع نصحيتى ولفد بجلدك .
نافع : (يسخل) ما تعطلنيش يا اسمك ايه انت .. راشد بيه
موجود ؟!
عوض : انت مش كنت حالف انك ماتعبتش هنا تاني ؟!
نافع : وانت مالك انت .. رجعت فى كلامى يا أخى .. بلغ
البيه لى موجود .
عوض : ما بلاش .
نافع : انت ايه حكايك يا جدع انت ؟! .. عايز تمشيلى
ليه ؟!
عوض : قلبى عليك .. عايز أكسب فيك ثواب .
نافع : كتر خيرك .. نادى راشد بيه بقه خلىنى أمشى..

وراي ا عيادة.

عوض : طب ما تمشى .. خير البر عاجله .. قضا أخف من قضا .

نافع : (ينظر له بريبة) ابقى فكرنى لما أخلص مع راشد بيه .. ابقى اكشف عليك .

عوض : ده فاكرنى مجنون .. انت حر .. أنا خلصت زمتى من ربنا .

(صوت راشد من الطابق العلوى)

راشد : مين يا عوض ؟

عوض : ده الدكتور .. بتاع المجانين .. استلقى وعدك يا حلو . (يفر خارجا) .

نافع : ايه اللى حصل للجدع ده .. ما كان كويس المرة اللى فانت .

(يقاچا برشد نازلا من الطابق العلوى بملابس عجيبه كما يتراءى للمخرج وللممثل - ينزل فى حركات بهلوانية مبالغ فيها - يبدو أنه يتصنع الجنون)

راشد : (متصنعا الجنون) ايه ؟! .. مش عارفنى ؟! ..

والا بتشبه عليا ؟! .. أنا بقه عارف كويس .. انت

دكتوراه .. دكتوراه فى السايكولوجيا مش كده ؟!

نافع : ايه اللى انت عامله فى نفسك ده يا راشد بيه ؟!

راشد : ده لبس الشغل .

نافع : شغل ؟!

- راشد : آیوه .. انت مش عارف انی بسبس مان .
- نافع : قصد حضرتک بیزنس مان ؟.
- راشد : لا یا غبی .. بسبس .. بسبس مان .. زی بات مان .. وسویر مان .
- نافع : و امان .
- راشد : غلط .. بقولک بسبس مان .
- نافع : خلاص فہمت .. یعنی رچل أعمال .. ما انا عارف.
- راشد : رچل أعمال ایہ یا جاہل .. انت ما بتعرفش انجلیزی ..
- نافع : کنا بناخده فی ثانوی .. بیزنس مان یعنی رچل أعمال .. انا فاکرہا .
- راشد : بقولک بسبس مان .. یعنی راجل قطة .
- نافع : ما تبطل هزار بقہ یا راشد بیہ و خلینا فی الجد .
- راشد : ما انا باتکلم جد .. انا دلوقتی قطة .. لا انا قط ..
- دکر .. ممکن آخریش و ممکن اہیش و ممکن أعور کمان . (یموء بشراسة)
- نافع : یا حفیظ .. ولیہ الاذیۃ بس یا راشد بیہ ؟!
- راشد : ما تخافش .. تعالی جنبی .. انا مش هأذیک .. طول ما انت متعاون مش هأذیک.
- نافع : (محاو لا تہدنتہ) ریلکس .. ریلکس ..
- راشد : انت فاکرنی مجنون ؟!

- نافع : لا سمح الله .. ده انت رجل .. قصدى قط قد الدنيا .
 راشد : مرسيه .. شكلك كده ناوى تتعاون معايا .
 نافع : نتعاون يا فندم .. أنا أفضل للتعاون .. بس من غير
 نونوه من فضلك .
 راشد : عايزك تجاوبنى .. ويكل صراحة .. ادوك كلام ؟!
 نافع : هما مين دول ؟!
 راشد : اللي جايينك هنا .. دفعواك كلام ؟!
 نافع : وليه الاحراج ده بس ..
 راشد : انطق .. اتكلم . (يموء مهيدا)
 نافع : حاضر .. حاضر .. هاقولك .. أنا فى الحقيقة لسه
 ما خدتش أتعابى .
 راشد : يعنى بتعترف ؟!
 نافع : أعترف بيايه ؟!
 راشد : انك مشترك معاها فى اللعبة ..
 نافع : مع مين ؟!
 راشد : مع الفيران .. اللي فوق .. واللى تحت الحيطان .
 نافع : أنا مش فاهم حاجة .. فيران ليه ؟! .. ولعبة ليه ؟!
 راشد : لعبة القظ و الفار .. انما لأ .. قولهم ان أنا قط ..
 مش قطة .. أنا قط ذكر .
 نافع : الله ...!! ليه الألفاظ دى ؟! .. انت جرى لعقاك ليه يا
 راشد بيه ؟!
 راشد : مش هوه ده اللي انتوا عايزينه ؟!

- نافع : عايزين ايه ؟! .. أناجاي عشان أعالجك .
- راشد : (يضحك ببلاهة) ليه .. هو انت دكتور بطرى ؟!
- نافع : الله يسامحك .. بقولك أنا دكتوراه .
- راشد : بصراحة كده .. أنا مش مقتنع انك دكتور .
- نافع : نا (غاضب) لأ .. اسحبها من فضلك .. الا كده ..
- بتشكك فى مهنتى .. اذا كنت مش مصدقنى ..
- الكارنيه أهو .. وبطاقتى كمان . (يخرجها ويعطيها لراشد) .. صدقت يا سيدى .
- راشد : وايه اللى يضمن لى انها مش مزورة ؟!
- نافع : انت عايز تشككنى فى نفسى ؟!
- راشد : اثبت لى انك فعلا دكتور .
- نافع : واثبت لك ليه ؟! .. البينة على من ادعى .. اثبت انت العكس .
- راشد : طيب .. هانفرض جدلا .. انك فعلا دكتور .. جاي عشان تعالجنى .
- نافع : ونفرض ليه .. هيه دى الحقيقة .
- راشد : هل أنا فعلا مجنون ؟!
- نافع : ممكن توصل للجنون لو استمررت عالحال ده.
- راشد : بدمتك .. فى دكتور فى الدنيا يقول لمريضه الكلام ده، كده فى وشه ؟!
- نافع : فى حالتك انت بالذات لازم أقول كده فى وشك .. لأنك فعلا ممكن تتجنن لو فضلت تفكر بالوسواس

اللي جواك ده.. مش كده وبس .. ده في حاجة ألعن
من كده.

راشد : اني ارتكب جريمة؟!

نافع : غريبة.. عرفت ازاي اني هاقول كده؟!

راشد : لأنني فعلا ارتكبت جريمة.

نافع : (بسخرية) ايه ؟.. سرقت فار من علي سطوح

الجيران!.. والا عاكست قطة كانت ماشية في

الشارع ؟

راشد : قتلت قتيل.

نافع : بقول ايه يا راشد بيه .. بلاش هزار وخلينا في

شغلنا.

راشد : أنت مش مصدقني ؟ .. انا فعلا قتلت قتيل.

نافع : يا راجل .. علي كده بقه انت سوبر كات!!

راشد : انا ما باهزرش .. انا قتلت راجل .. بني آدم ..

ودفنته في الجنية.

نافع : يا نهار اسود .. انا ايه اللي كان جابني النهاردة؟

راشد : ها ...!! قولت ايه ؟

نافع : في ايه ؟!

راشد : في القتل؟! .. تفكر هابعدموني؟!

نافع : (في رعب) ها ؟!

راشد : والا هاخذ تأبيدة؟

نافع : ريلاكس .. ريلاكس. (يحاول الهرب)

- راشد : أنت لسه مش مصدقني ؟
- نافع : لا .. ازاي يا حبيبي... مصدقك طبعا.. أنا أقدر أكذبك !.. ولما دبحت الخروف..
- راشد : قصدك القتل..
- نافع : ولما دبحت القتل .. عملت فيه ايه بعد كده ؟!
- راشد : ما انا قولت لك .. دفنته في الجنية.. ثم انا ما دبحتوش .. انا خنفته.
- نافع : يستاهل .. يخطف ليه العضمة بتاعتك ؟
- راشد : عضمة ايه ؟! .. ده خطف حياتي.
- نافع : مفهوم.. مفهوم .. خطف حياتك .. يعني موثك الأول ، وبعدين رحى انت مموته .. دي قصاص دي .. مش كده ؟ .. (خائفا) ريلاكس .. ريلاكس.
- راشد : ما قولتلكش .. آخذ فيها ايه دي ؟ .. اعدام واللا تأبيده ؟
- نافع : عايز رأيي ؟ .. تأخذ حمام دافي .. زي الثلج.. وقرصين من العلاج اللي هاكتبهولك ده .. وتنام لك قيمة شهرين ثلاثة.. ريلاكس .. ريلاكس.
- (يخرج دفتر روشتات بيد مرتعدة ويكتب بعجلة)
- راشد : انت برضه مش عايز تصدقني ؟ .. باقولك قتلت قتل.
- نافع : ريلاكس .. ريلاكس.
- راشد : دكتور؟

ناقع : أنا من رأيي تشوفك دكتور ثاني أفضل .. والا أقولك .. بلاش دكاترة خالص .. دول حتي يعيوا ويجيبوا المرض .. ريلاكس .. ريلاكس ..

راشد : (يهجم عليه) يعني ايه ؟ .. أنا هوبليس كيس ؟
ناقع : لا يا بيه .. أنا ألي هوبليس .. أنا ألي مش نافع .. هاشوف شغلانة ثانية ..

ريلاكس .. ريلاكس .. (ينسحب بهدوء خائفا)
ماتز علش نفسك ابدًا .. ولا تتعب أعصابك .. ريلاكس .. (يقهر هاربا) الحقوني ..

راشد : (ينفجر ضاحكا فور خروجه) كده أنا بقيت مجنون رسمي .. بشهادة دكتور .. يعني غير خاضع لقوانين العقلاء ... ايه يعني كام شهر في مصحة .. ما عانش في حاجة ابقى عليها .. عليا وعلي أعدائي .. دلوقتي الدور عليها .. الخاينة .. لازم استنرجها للجنيّة عشان أدفنها جنبه ..

عوض : (قلاما في تساؤل) هو راح فين ؟

راشد : مين ؟

عوض : الدكتور .. كان بيصرخ ليه ؟

راشد : مسكين .. كان فاكرني مجنون ..

عوض : (متأملا ملابس راشد) معذور يا بيه .. ما غدوش نظر ..

راشد : يعني أنا كده شكلي عاقل ؟

- عوض : **(بخوف)** قطع لسان اللي يقول غير كده.. ده انت سيد العاقلين .. الجنان له ناسه يا بيه.
- راشد : **امال فين الهانم؟**
- عوض : **فوق مع سي سامح بيه.. أصل سعدية مأجرة النهاردة.**
- راشد : **(فجأة)** فين الرباط اللي كان علي دماغك.
- عوض : **(برعب)** خلاص يا بيه ما عدش له لزوم .. الجرح خف وبقي زى الفل .. بتسأل ليه يا سعادة البيه ؟!
- راشد : **باطمن عليك يا عوض .. انت عارف معزتك عندي.**
- عوض : **عارف.. من غير ما تقول يا سعادة البيه .. خيرك سابق (مشيرا لموضع الجرح)**
- راشد : **انت لسه شوفت حاجة ؟! .. أنا مش عارف أرد جمالك عليا ازاي ؟!**
- عوض : **عيب يا بيه .. ما نقولش كده .. ده أنا أفديك برقبتي.**
- راشد : **(بلهجة رهيبة)** مش كفاية .
- عوض : **(برعب)** رقبتي مش كفاية ؟!
- راشد : **لا .. أنا قصدي .. مش كفاية أشكرك بالكلام .. لازم أكافئك .**
- عوض : **ما نقولش كده يا سعادة البيه .. ده لحم كتافي من خيرك انت و الست هانم .. والله يا بيه اللي عايز**

- يتكأفاً بصحيح هيه وفاء هانم
 راشد : عندك حق .
- لو تعرف يا سعادة البيه معزتك عندها ؟!
 عوض : عارف .
- يا سلام .. أنا ما شوقتش حب زى كده .. دى
 عوض : بتحبك حب يا بيه !
- (متألماً) عارف .
 راشد : والا اخلاصها ووفاءها لجناياك .
- (صارخاً) عارف ..
 راشد : والا ..
- (مقاطعاً) كفاية بقه .. كفاية .
 عوض : فى ايه يا راشد بيه ؟! .. أنا قولت حاجة غلط ؟!
- لا يا عوض .. بس الحكاية انى تعبان شوية ..
 راشد : (يتصنع المرض)
- ألف سلامة يا بيه .
 عوض : يا ريت تعمل فىا معروف وتوصل الصيدلية تجيب
- لى الدوا اللى كتبهولى الدكتور فى الروشتة دى ..
 راشد : بسرعة يا عوض أرجوك .
- (مسرعاً يأخذ الروشتة) حاضر يا بيه .. مسافة
 السكة .. (يخرج)
- (يعتدل فى جلسته) عال عال .. لازم أنفذ الخطة
 راشد : دلوقتى .. قبل ما يرجع بالدوا .. وكأنى فعلاً رحت

- فی غیوبه .. لاشوقت وحسیت بحاجة ..
 (یتجه الى أحد المقاعد ویلقى بجسده علیه کمن یحلم - یتلوی
 ویتأوه بألم)
 راشد : (ممثلاً باتقان) لأ .. لأ .. سیبونی .. عایزین منی
 ایه .. یا خونة یا أندال .. عایزین منی ؟! .. وفاء ..
 الحقینی یا وفاء .. وفاء .. (صارخاً بألم) وفاء .
 وفاء : (مسرعة من الطابق الثانی - حاملة الطفل
 الرضیع) راشد ؟.. مالک یا راشد ؟!
 .. فی ایه ؟!
 راشد : (مسترسلاً) خونة .. أندال .. الحقینی یا وفاء ..
 وفاء .
 (وفاء تهدد طفلها وتضعه برفق علی أحد المقاعد وتتجه
 بلهفة الى راشد)
 وفاء : مالک یا راشد .. کابوس تانی ؟! .. راشد .. فوق یا
 راشد .. أنا وفاء .. مرأتک .
 راشد : (کمن یفقی من کابوس) وفاء ؟!
 وفاء : آیوه یا راشد .. امال فین الدكتور ؟!
 راشد : دکتور ایه ؟! .. أنا .. أنا .. شوفت ..
 (بیتر عبارته بألم) فظیع .. مش قادر أوصف لک یا
 وفاء .. کابوس رهیب .
 وفاء : بلاش تحکیه یا راشد .. انساه ..
 راشد : ده ما یتتسیش أبدا یا وفاء .. لازم تعرفیه .

- وفاء : لو كان ده يريحك .. قول .. شوفت ايه ؟!
- راشد : (بلهجة رهيبة) خيانة ..
- وفاء : خيانة ؟! .. من مين ؟!
- راشد : مش ها تصدق .. أشخاص عمرهم ما يخطروا على بالك .
- وفاء : اوعى تقول صالح تانى ؟!
- راشد : لأ .. المرة دى مش أخويا .. (متأثرا) المرة دى نفسى .. روحى .. روحى هيه اللي بتخونى يا ..
- (بصعوبة وحسرة) وفاء !!
- وفاء : خلاص .. ما تكلمش يا راشد .. اذا كان ده هابتعبك.
- راشد : لأ .. لازم أكمل .. لازم أكمل للنهاية ..
- وفاء : بلاش يا راشد .
- راشد : خايقة ؟!
- وفاء : مش عارفة .. قلبي مقبوض .
- راشد : احساس طبيعى . (بلهجة رهيبة)
- وفاء : قصدك ايه ؟!
- راشد : (مصححا) قلبك عليا .. مش كده ؟!
- وفاء : طبعا يا راشد .
- راشد : يبقى لازم تيجى معايا .
- وفاء : آجى معاك فين ؟!
- راشد : الجنينة .. فى حاجة لازم تشوفها .

- وفاء : (فرزعة) سامح يا راشد .
(تندفع نحو المقعد حيث الطفل)
- راشد : (مباغتاً) أسامح ؟! .. أسامح مين واللا مين ؟! ..
وأسامح ليه اذا كانوا ما رحمونيش .. أنا لا يمكن
أسامح أو أغفر تانى .
- وفاء : (تحمل الطفل بحضان) سامح ايننا كان هابقع من
عالفوتيه .
- راشد : (مشيحاً بوجهه) ايننا ؟!
- وفاء : شايف يا راشد ؟! .. شبهك الخالق الناطق .
- راشد : (بدهشة وشرود) شبهى ؟!
- وفاء : بس على صغير .
- راشد : أنا مش فاكـر شكلى كان ايه وأنا صغير .
- وفاء : تاخذ تشيله شوية ؟! .. من يوم ما اتولد وانت دايما
مشغول عنه .
- راشد : بعدين .. بعدين .. بس المهم تيجى معايا الجنينة قبل
ما عوض يرجع .
- وفاء : فى ايه يا راشد ؟! .. عوض فين ؟!
- راشد : عايز أوريكى حاجة مش لازم يشوفها عوض ..
حاجة تهملك وتهمنى .
- وفاء : انت بتخوفنى كده يا راشد !!
- راشد : لا .. لا ما تخافيش .. ده أنا هاوريكى حاجة عزيزة
عليكى جدا .. بتحبيبها أكثر منى كمان .. تعالى ..

ياللا ما تضيعيش وقت . (مشيرا للطفل) بلاش
بيجي معانا .. أرجوكى سبيه هنا .

وفاء : أنا مش فاهمة حاجة خالص .. (تضع الطفل برفق
على المقعد) بس لو ده حايريك .. خالص ..
ياللا بينا .

راشد : يا لالا .. يا وفاء . (يخرجان إلى الحديقة)
(نسمع بكاء الطفل فجأة - صوت وفاء وراشد من الخارج -
يفضل ان يتم تشخيص الحوار القادم خلف سلويت)

ص. وفاء : الولد يا راشد .

ص راشد : سبيه يعيط .

ص. وفاء : سامح يا راشد .

ص راشد : أسامح يا خاينة .. أسامح يا مجرمة .. يمكن أسامح
... نفسي بعدين لما افتكرك .. وافتكرو جبي اللى كان ..
.. فاهمة .. اللى كان ..

ص. وفاء : (متحشرجا) بتعمل ايه يا راشد .. اعقل يا راشد ..
هاموت يا راشد .. هاموت ..

ص راشد : أنا كنت فعلا مجنون وعقلت .. أنا دلوقتى عرفت
ووعيت لكل حاجة .. يا خاينة .. يا خاينة .

ص. وفاء : (تلفظ أنفاسها) ليه .. ليه يا راشد !!! ليه!!
(يعلو صوت بكاء الطفل - لحظات ويظهر راشد أمام باب الفيلا
- يدخل بتخاذل - يقاجأ بصوت الطفل - يتأمله بحسرة و حزن)
راشد : (للطفل) اسكت .. اسكت .. هاتفضل تصرخ

لإمتى؟! .. إيه؟! زعلان عليها؟! .. دى كانت
 خاينة .. مجرمة .. (الطفل يصرخ) قلت لك
 اسكت .. قلبك عليها ؟ .. وأنا .. ما صعبتش عليك
 ؟! .. مش أنا أبوك يرضه .. زى ما هيه أمك ؟! ..
 انطق .. اتكلم .. أنا أبوك واللأ لا .. قول .. أبوك
 واللأ لا .. قول حاجة بدل الصراخ ده .. طمنى ..
 طمنى بنوبك فيا ثواب ؟!

ص المقنع: (فجأة) مسكين .. مسكين يا راشد .
 راشد : (للطفل) انطق .. بطل عياط و كلمنى .. أنا أقربلك
 إيه ؟! .. أبوك واللأ لا ..

(يظهر المقنع بهدوء رهيب - يحمل راشد الطفل إلى مقدمة
 المسرح كمن يشيع جنازة - المقنع فى همس كالفجيج - اضاءة
 الكايوس)

المقنع : عايزه يقولك إيه يا مسكين ؟! .. ده زيك بالظبط ..
 مسكين .

راشد : (متأملا الطفل) ما هو لازم يتكلم .. لازم يدينى
 رد مفيد .. يا إما يسكت خالص .. لأنه لو عاش ..
 هايفضل صوته فى ودانى .. وصورته قدامى ..
 وطيفه بيطاردنى فى أحلامى .. لازم .. لازم ..
 (يطبق على الطفل بيديه بين صدره بقسوة - يصمت الطفل

بغثة)

راشد : إيه ؟! سكت إيه ؟! .. اتكلم .. قول .. انطق .. ما

- تسكتش كده .. لازم نقول حاجة .. لازم تظمنى ..
 طب صرّخ .. صرّخ تانى .. يمكن بعدين تعرف
 تتكلم .. صرّخ .. سكت ليه ؟!
- المقنع : إنت اللي خيّرته .. وهوه اختار يسكت .. ويموت
 فى صمت .
- راشد : (يخلص الطفل بيهلع) مات ؟! .. لا .. لا .. أنا ما
 .. ما كانش قصدى كده .. لا .. لا .
- المقنع : مسكين .. مسكين يا راشد .. (يختفى)
 (إضاءة مبالغتة - راشد مطبق على الطفل بكلمات يديه)
- عوض : (قادم من الخارج) مفيش فائدة ..
 راشد : عوض ؟! .. إنت رجعت .
- عوض : مفيش فائدة يا بيه .. مش لاقى الدوا ده أبدا .. لفيت
 أجزاخانات المنطقة كلها .. ما لقتوش .. بيقولوا دي
 شخبطة .. أنا هاطلع أدى الوشنة لوفاء هانم يمكن
 تعرف هيه تتصرف .
- راشد : لا .. وفاء .. لا .. هات الروشنة أنا هاجيبها
 بمعرفتى .
- عوض : (يلحق الطفل) ايه ده ؟! .. إنت شايل البيه الصغير
 بنفسك .. هات يا بيه عنك .
- راشد : لا .. سيبه .. سيبه يا عوض .. روح إنت .. روح
 إعمل أى حاجة ..
- عوض : هوه نايم واللا ايه ؟!

راشد : آیوه .. آیوه .. نايم .. نايم .. مش هايصحي دلوقتي.

عوض : طب عنك أنيمه .. هاتفضل حضرتك شايله كده لحد ما يقوم .. وبعدين لايعمل حاجة كده واللا كده .. يبهدل هدم حضرتك .. أى نعم هيه مش ناقصة بهلة بس الأصول برضه .

راشد : (بعصية) إنت بتتكلم كثير ليه .. قولتلك روح إنت شوف شغلك .

عوض : حاضر .. اللي تشوفه يا بيه . (يهم بالخروج - يسمع صوت جرس الباب)

عوض : مين ؟! .. آیوه جاي . (يخرج)

راشد : (بتوتر) مين ؟! .. مين يا عوض ؟! .. مين اللي بره ؟!

(يقفأ راشد بسامى داخل من باب القبلا)

راشد : (لازل حاضنا الطفل - بذهول) مين ؟! ..

سامى : إوعى نقوللى جيت فى معادك .. أنا جاي المرة دى بدرى ساعتين .

راشد : مستحيل .

سامى : إزيك يا راشد ؟! ..

راشد : (يفر منه) إنت مين ؟! .. سامى ؟!

سامى : لأ .. عفريته .

راشد : عفريته ؟!

- سامی : آیوه .. إنبت مش مصدقنى ؟! .. حتى أهه ..
 (محاولا إخافته) عو .
- راشد : مش ممكن .. مستحيل .
- سامی : للدرجة دى وحشتك ؟! .. مش مصدق إنى رجعت
 تانى ؟! عمر الشقى بقى .
- راشد : رجعت إزاي ؟!
- سامی : (ببساطة) بالطيارة .
- راشد : (بدهشة) طيارة ؟!
- سامی : آیوه .. طيارة الفجر .. أول ما وصلت جيت لك
 على طول .. آمال فين مراتك؟
 .. (يمد يده للطفل) شيلتك الواد وراحت فين ؟
- راشد : (خائفا) إبعد عنى .
- سامی : جرى إيه يا راشد ؟! .. إنت صدقت بجد إنى
 عفريت ؟!
- راشد : يعنى إيه ؟! .. إنت سامى بجد ؟!
- سامی : وبعدين معاك بقه ؟! .. هي دي كمان فيها شك! ..
 انت هاتشككني في نفسي واللا إيه؟
- راشد : (يقترب منه بحذر - يلمسه في خوف) مستحيل .
- سامی : صدقت يا سيدي؟!
- راشد : يعنى إيه ؟! .. انت لسه عايش؟
- سامی : جري إيه يا ابني انت .. ماتقولش في وشي .. كل
 ده عشان غبت عنك أسبوع .. كان نفسي تكون معايا

- في روما كنت هاتتبسط قوى .
 راشد : مستحيل .. مستحيل.
 سامي : مالك يا راشد؟
 راشد : ابعد عني.
 سامي : ده بدل ما تاخدني بالحضن.
 راشد : (مناديا بهلع) عوض .. يا عوض.
 سامي : بعته يجيب سجائر .. ده بعد اذنك طبعا.. (بدهشة)
 الله!!.. مالك يا راشد ؟!
 انت خايف مني واللا ايه ؟.. ده انا سامي ..
 صاحبك.
 راشد : (صارخا) سامي مات وشبع موت.. انا دفنته امبارح
 بايديا دول.
 سامي : وهونت عليك يا مفتري ؟
 راشد : ابعد عني.
 سامي : راشد بلاش هزار.
 راشد : (باكيا) كفاية .. حرام عليكم.. كفاية بقة.. عايزين
 مني ايه؟.. خدوا فلوسي اذا كان ده يريحكم.. خدوا
 ثروتي اذا كان ده هدفكم.. ارموني مطرح ما
 ترموني بس قولولي .. ربحوني .. رسوني علي
 بر.. قولولي جملة واحدة مفيدة .. انا صاحبي ولا
 نايم؟!
 سامي : لا بقة .. ده انت باينك فايق .. بقولك ايه ؟ انا تعبان

ومش فايق لحر كائك دي.. انا هاروح اناملي شوية..
وهارجع لك بعدين.. قال دفتنتي قال.

(يخرج)

راشد : (وحيداً) يعني ايه؟!.. اللي فات ده كله كان
كابوس؟!.. ووفاء؟!.. ده أنا لسه دافنها بايدي في
الجنيّة؟!.. (متأملاً الطفل) وسامح؟!.. ابني .. مش
معقول ده يكون كابوس.. ده بشحمه ولحمه بين ايديا
.. (برجاء للطفل) قول .. قول حاجة .. لأ ..
بلاش .. عيط .. صرخ .. أو حتي انتفس .. اديني أي
اشارة للحياة .. اصحي .. اصحي يا سامح..
اصحي يا ابني .. يا ضنايا.

(تتغير الإضاءة في جو الكابوس - يظهر المقنع يقترب من راشد
- يأخذ منه الطفل ويعطيه للمقنعين معه)

المقنع : مسكين .. مسكين يا راشد.
راشد : (بهستيرية) انتوا واخدين ابني علي فين؟!
المقنع : ماتضحكش علي نفسك .
راشد : يعني ايه ؟ .. قللي .. لازم تفهمني.. أنا في كابوس
.. مش كده ؟! .. انت دايما ما بتظهرش غير في
الأحلام والكوابيس ويس .. انا متأكد.

المقنع : مسكين .. مسكين يا راشد.
راشد : انا مش ممكن أسبيك قبل ما أعرف الحقيقة.. أنت
مين ؟ .. وليه ؟ .. وازاي؟!.. وامتي ؟.. لازم

أَكشَفَ القِنَاعَ ده عن وشك.. لازم أعرف.. لازم
 أفهم.. يا اما هاتجنن فعلا.. ده اذا كنت لسه ما
 اتجننتش.. (قسي ألم) أنا حاسس بضداع رهيب ..
 دماغى هاتفجر.. حاسس اني تايه.. اني بالف
 وادور حوالين نفسي .. وخيوط حواليا كثير .. في
 نسيج عجيب.. عمال يزيد.. ويزيد .. خيوط أشكال
 وألوان .. طالعة .. نازلة .. رايحة .. جاية ..
 دواير دواير .. مثلثات.. مربعات .. خطوط عمالة
 بتضيق.. نقط سودة عمالة تحجب عني النور ..
 شرقة .. أيوه .. شرقة حواليا بتضيق .. هاتخنقني
 .. هاتخنق .. حد يطلعني منها .. حد ينقذي .. حد
 يمدلي ايده .. حد ينور لي .. شوية نور .. شوية
 هوا..

- المقنع : مسكين .. مسكين يا راشد.
 راشد : (يتشبت به) لأ.. ما تسبنيش لوحدي .. وتهرب انت
 .. ماتسبنيش أغرق وانت تنفد بجلدك.
 المقنع : دلوقتي بعد ما ضيعت نفسك؟
 راشد : انت اللي ضيعتني.
 المقنع : أنا كنت دايما باحذرك.. عمري ما اتخليت عنك.
 راشد : كنت بتخوفني مش بتحذرنني.
 المقنع : شوفت ؟!.. انت اللي كنت دايما تفهمني غلط.
 راشد : انت اللي كنت دايما تسبني في اللحظة الحاسمة..

أدور عليك ألاقبك سراب..ولو كلمت حد عنك
يضحكوا عليا ويقولوا مجنون.

المقنع : وتقولهم ليه ؟ .. ده شيء بننى وبينك أنا وانت وبس.

راشد : يعني ايه ؟ .. انت ايه بالطبط ؟!

المقنع : أقرب واحد ليك .. انت فاكرني هاهرب يا

مسكين ؟ .. لأ .. ده انت بقيت غبي .. أنا عمري ما

هاقدر أسيبك .. أنا وانت في شرنقة واحدة .. انا

وانت واحد .. عمرنا ما نقدر ننفصل.

راشد : ما حدش هايصدق الكلام ده.

المقنع : اذا كنت انت شاكك فيه .. شكيت في كل اللي

حوالك .. دلوقتي بتشك في نفسك .

راشد : قصدك تقول ان انا دلوقتي باكلم نفسي ؟ .. يبقى انا

فعلا اتجننت .. لأ .. ده كابوس .. كابوس زي اللي

قبله .. انت وهم .. انت حلم .. انت كابوس .. ما

هو مش معقول تكون وفاء ماتت ! .. مش معقول

أكون دفنتها بايدي !

.. لأ .. سامي طلع عايش .. يعني أنا ما قتلتوش ..

يبقي كل اللي شوفته كان كابوس .. زي أي كابوس ..

معني كده انه بريء .. يبقى هيه كمان بريئة .. يبقى

لازم تعيش .. هيه دي النهاية المنطقية .. ان ده كله

يطلع كابوس .. وسامح ابني .. (يندفع نحو الطفل

يحملة في رجاء)

راشد : سامح نايم .. دلوقتي هايصحي .. هايغيظ زي
عوايده.. وانا هاصحي من الكابوس علي صوته ..
لأ.. علي صوت وفاء.. هانقولي .. مالك يا حبيبي
.. وعوض هايديلي بالشفاف .. (صارخا برجاء)
يارب .. يارب .. يارب يطلع كابوس .. يارب
يطلع كابوس..
(يحتضن ابنه في رجاء بينما تنزل)

الستار

عقلك فى راسك

مسرحية

شخصيات المسرحية :

جندى ١

جندى ٢

المجنوب

الزمان :

أمس .. واليوم .. وأتمنى ألا يكون غداً .

المكان :

بقعة ما من كرتنا الأرضية ..

المشهد الأول

ميدان قتال أو معسكر تدريب حيث نرى مجموعات من الجنود فى ملابس قتالية أثناء تلقيهم تدريبات فلسية على فنون القتال .
أصوات مختلطة لطلقات نارية - انفجارات مدوية - صراخ ..
إلخ ، مارشات عسكرية ودقات أقدام الجنود المنتظمة الإيقاع ..
يمكن أن يصور هذا التدريب ويعرض على شاشة عرض سينمائى .. أو يجسد من خلال سلويت " خيال ظل "
- أو بأى وسيلة يبتكرها المخرج .

تختفى أصوات الجنود رويداً رويداً ويظلم المسرح تماماً .. تنبت
بؤرة إضاءة يظهر داخلها جندي ١ وجندي ٢ ، يتحركان
بخطوات عسكرية رتيبة كعرائس الماريونيت أو كالإنسان الآلى
.. يقفان فى منتصف المسرح فى تحفز تام وهما يحملان
سلاحيهما .. صوت القائد يأتيهما من مكان مجهول وكأنه ينبعث
من أعماقهما فى صرامة وجدية .

ص. القائد: انتباه .

جندي ١ و ٢: تمام يا فندم .

ص. القائد: سنك !؟ .. (لا يجيبان) عنوانك !؟

(الجنديان في ذهول وارتباك - القائد في ظفر وسعادة)

- ص. القائد: عظيم .. برافو .. هو ده المطلوب .. تنسى اسمك .. تنسى سنك .. وعنوانك ..
- (في قسوة) تنسى نفسك .
- جندى ١ : (في حيرة) أنسى نفسي .
- ص. القائد: (في تأكيد) تنسى نفسك .
- جندى ٢ : (في دهشة) وأبقى إيه ؟!
- ص. القائد: تبقى نمرة .
- جندى ١ : أبقى نمرة ؟!!
- ص. القائد: (في عنف) أيوه .. نمرة .
- جندى ٢ : (في خوف وإذعان) نمرة .. نمرة .
- ص. القائد: نمرة رايحة .. نمرة جاية .. عين تراقب .. ودن تسمع .. إيد تتفذ .
- جندى ١ : واللسان .
- ص. القائد: عضو أخرس .
- جندى ٢ : يعنى إيه ؟!
- ص. القائد: يعنى تخرس .. الكلام ممنوع تماماً .. حتى لو كلمت نفسك ؟! (في صرامة وقسوة) حتى لو كلمت نفسك .. الكلام ممنوع تماماً .. حتى لو كلمت نفسك ..
- (صارخاً) مفهوم يا نمرة ؟!

جندی ۱ و ۲ : مفهوم یا فندم .

(یضاء المسرح حیث یتخذ کل من جندی ۱ وجندی ۲ موقعیهما
خلف أحد المتاریس أو الصخور .. جندی ۱ یراقب المعسكر
المقابل مستخدماً نظارات معظمة ، بینما جندی ۲ ینظف سلاحه
وقد وضع سماعات کاسیت علی أذنیه فی تمایل راقص مع
موسیقی غیر مسموعة لسواه)

جندی ۱ : (فی قلق وملل) أنا زهقت .. ملیت من
المراقبة .. لیل ونهار .. مفیش جدید .. ده
بیضرب فی ده .. وبعدين ده .. یرد علی ده ..
حرب دائرة بقالها .. ؟! .. (فی حيرة) بقالها
؟! .. حتی الإحساس بالوقت معدوم .. هوه
النهاردة کام فی الشهر .. ؟! .. شهر ؟! .. هو
إحنا فی شهر إيه أصلاً ؟! .. دی حاجة تلخبط
.. ما هو النهاردة زى إمبراح .. زى أول ..
زى السنة اللی قانت ..

(یرتفت لجندی ۲) لو سمحت یا .. من فضلك
.. یا دفعة .. یا زمل .. لو سمحت یا نمرة ..

(جندی ۲ لا یجیب وكأنه لم یرتبه لوجود جندی ۱)

جندی ۱ : (فی ضیق) هوه ما یردش لیه ؟! .. إنت یا
نمرة ؟! .. إيه ؟! أنا باکلم نفسی ؟! .. ماترد
علیا .

جندی ۲ : (فی یرود) ممنوع .

جندى ١ : (فسى ضجر) كل شىء ممنوع .. حتى الكلام
كمان ممنوع .. لأ .. فسى حاجة واحدة بس
مباحة .. (يصوب فوهة سلاحه فى تحفر)
للموت .

جندى ٢ : (بآلية عجيبة محنراً) الكلام ممنوع تماماً ..
حتى لو كلمت نفسك .

جندى ١ : (فسى اعتراض) يعنى الكلام ممنوع .. والبتاع
للى على ودنك ده مش ممنوع ؟!
هيه دى الأوامر .

جندى ١ : (فسى تسويد) وفيها إيه لما ندرش سوا ؟!
على الأقل نقضى على الملل ده .

جندى ٢ : أنا عن نفسى .. مش حاسس بأى ملل .. بالعكس
.. المكان هنا مسلى جداً .

جندى ١ : (يضحك بمرارة) مسلى ؟! .. إنت بتضحك
عليها .. واللأ على نفسك ؟! .. (ينهض بضيق
تاركاً موقعه) تقدر تقولى على حاجة واحدة
مسلية هنا ؟! .. الرصاص ؟! .. واللأ القنابل ؟!
.. واللأ الجثث المرمية فى كل مكان ؟!

جندى ٢ : (محنراً برعب) إيه ده ؟! .. إنت مجنون ؟!
إزاي تسبب مكانك مكشوف ؟! .. إرجع يا نمرة
.. ماتبقاش متهور .. لو حد لمحك هانروح فى
ستين داهية .

- جندى ١ : زهقت م القاعدة يا أخى .. إتحقت .. عايز أشم شوية هوا .
- جندى ٢ : (فى سخريه وتهكم) لأ حلوة دى .. حلوة قوى .. آل يشم هوا آل .. يا ابنى إنت نسيت إحنا فين ؟!
- جندى ١ : (بجديّة) فين ؟!
- جندى ٢ : (يقاجأ بالسؤال - يرد بتلقائية) فى حرب .
- جندى ١ : (يضحك بشدة) حرب ؟!
- جندى ٢ : (فى دهشة) أيوه .. حرب .. (فى قلق) إنت بتضحك على إيه ؟
- جندى ١ : (فى جدية مفاجئة) حرب مع مين ؟! .. وعشان إيه ؟!
- جندى ٢ : (فى ملع) ما أعرفش .. مش عارف .. ومش عايز أعرف .. ومش مهم أعرف .
- جندى ١ : ومالك خفت كده ليه ؟!
- جندى ٢ : عشان ممنوع .. ممنوع أعرف .. ممنوع أسأل عن أى حاجة .. ممنوع أفكر من أساسه .
- جندى ١ : ليه ؟!
- جندى ٢ : هوه إيه اللي ليه ؟!
- جندى ١ : ما سألتش نفسك ليه كل شىء ممنوع ؟!
- جندى ٢ : عشان ممنوع أسأل نفسى .. فهمت ؟!
- جندى ١ : برضه ليه ؟!

- جندى ٢ : لا بقه .. إنت باينك مش ناوى تعدى اليوم ده
على خير .. أنا غلطان إنى جاريتك م الأول .
- جندى ١ : ماتحاولش تهرب منى ..
- جندى ٢ : وأهرب منك ليه ؟! .. هوه أنا أعرفك قبل كده؟!
- جندى ١ : بسيطة .. نتعرف .
- جندى ٢ : وأنا مش عايز أعرفك يا أخى .. هوه بالعافية ؟!
- جندى ١ : (فى ود معتذراً) إنت زعلت واللا إيه ؟! ..
- خلاص .. أنا آسف .. بس ما تقلبش كده .. ده
أنا ما صدقت حد يكلمنى فى المعسكر ده .
- جندى ٢ : (فى سخط) لا .. مع نفسك بقه .. تكلمها..
- تسألها.. تقل أدبك عليها .. إنت حر فى نفسك ..
- وبعدين التعليمات واضحة.. واللا إيه يا نمرة ؟!
- جندى ١ : (فى ضجر) نمرة .. نمرة .. أنا زهقت من
الكلمة دى .. إيه ؟! مالناش أسامى نتتادى بيها
- ؟! .. آه .. بالمناسبة .. إحنا ما تعرفناش ..
- جندى ٢ : (فى دهشة) إيه ؟!
- جندى ١ : ما اتعرفناش .. اسمك إيه يا نمرة ؟!
- جندى ٢ : أنا ؟!
- جندى ١ : أيوه إنت .. إيه ؟! .. مش فاكتر اسمك ؟! ..
- واللا خايف تقولهلولى ؟!
- جندى ٢ : (فى اعتراض) وأخاف من إيه ؟! .. إوعى
تكون فاكترنى جبان !! لا .. أصل أنت ما

- شوفنتيش فى معركة .
- جندى ١ : حلو قوى .. اسمك ايه بقه ؟!
- جندى ٢ : (فى ارتباك) اسمى ؟!
- جندى ١ : أيوه .. اسمك .. ايه .. اسمك صعب للدرجة دى؟!
- جندى ٢ : (يهمس حرجاً) أقولك .. بس ما تضحكش عليا؟!
- جندى ١ : قول ما تخافش .
- جندى ٢ : فى الحقيقة .. مش فاكراه .
- جندى ١ : (مدهوشاً) ايه ؟! .. نسيته ؟! .. نسيته اسمك؟!
- جندى ٢ : تقريباً .. مش فاكراه غير نمرتى .
- جندى ١ : أنت بتتكلم جد ؟!
- جندى ٢ : من يوم ما جيت هنا وأنا نسيته اسمى ..
- جندى ١ : طيب .. بلدك ؟! .. عنوانك ؟!
- جندى ٢ : (فى ألم) مش فاكراه .. مش فاكراه حاجة خالص .
- جندى ١ : (فى شرود) مستحيل .
- جندى ٢ : (فى حزن وانكسار) أنا حتى مش فاكراه أنا جيت المعسكر ده إمتى .. راسى دى كأنها مليانة هوا .. كل شىء فى عقلى ممسوح .. مش فاكراه أى حاجة .. مفيش فى دماغى غير صورة الرصاص .. والقنابل .. وجثث الموتى ..

والباقى ضلّمة .. مش عارف إيه اللى حصل
لى .. أنا حتى مش فاكّر ملامحى .. صورتى فى
المراية تاهت من خيالى .. يعنى لو شوفتتى
دلوقتى .. مش هاعرفنى .. مش فاكّرنى ..
(يضحك بمرارة) تصور .. أنا مش فاكّرنى ..
أنا مش عارفنى من أساسه .

(فى شرود) غريبة !!

جندى ١ :

وأنت ؟!

جندى ٢ :

(فرعاً فى ارتباك) أنا ؟!

جندى ١ :

أيوه .. اسمك إيه ؟!

جندى ٢ :

(فى ألم) فكرك هاختلف عنك كثير ؟!

جندى ١ :

يعنى إيه ؟!

جندى ٢ :

الحال من بعضه .. أنا كمان .. لا اسم .. ولا
سن .. ولا عنوان .. مجرد نمرة .. مش فاكّر
غير نمرة .. مش فاكّر غير نمرة حفظوها لى
فى المعسكر .

جندى ١ :

(فى بكاء) يعنى إيه ؟! .. خدوا أسامينا مننا ؟!

جندى ٢ :

قصّدتك خدوا عقولنا .. برمجونا .

جندى ١ :

برمجونا ؟! .. هما مين دول ؟!

جندى ٢ :

مش عارف .

جندى ١ :

أمال مين اللى يعرف ؟! .. مين ؟!

جندى ٢ :

ما سبّش واحد فى المعسكر ما سألّتش ..

جندى ١ :

- جندی ۲ : إزای ؟! .. والكلام ممنوع.
- جندی ۱ : خالفت التعليمات .. ويا ريتتى وصلت لحاجة ..
- كلنا مجرد نمر .. أرقام يحرکوها زى ما هما
- عايزين .. وقت ما هما عايزين .. تمام زى
- عساكر الشطرنج .. من غير ما يكون لنا أى
- حق فى الاعتراض .. أو التفكير ..
- جندی ۲ : ليه ؟! .. ليه ؟!
- جندی ۱ : عشان لو فكرت .. هاتعجب .. ولو تعبت
- هاتشتكى .. وهما مش عايزينك تشتكى ..
- عايزينك تسمع وتنفذ وبس .. كأنك ترس فى آلة
- من غير مشاعر أو إحساس .
- جندی ۲ : (فى ألم ومعاناة) أنا ليه اللى خلانى أتکلم ؟!
- ما كنت مرتاح وفى حالى .. ياريتتى سمعت
- الأوامر والتزمت الصمت .
- جندی ۱ : تانى بنهرب ؟! .. بعد ما عرفت المصيبة اللى
- إحنا فيها ؟!
- جندی ۲ : مصيبة ليه ؟! .. أنا ما عرفتش حاجة .. بالعكس
- أنا تهت أكثر ما أنا تايه .. ومش عايز أتوه أكثر
- من كده .. أرجوك كفاية لحد كده ..
- جندی ۱ : أنت فاکر إنك كده ارتحت ومشاكلک اتحلّت ؟! ..
- لازم تواجه نفسك .
- جندی ۲ : (فى حدة) نفسى ؟! .. نفسى اللى مش

- عارفها؟! .. ده أنا حتى مش فاكّر شكلى إيه .
جندى ١ : خلاص .. دى البداية .. حاول تفكر ملامحك ..
نفكر ملامحنا .. يمكن نقدر نوصل لحاجة .
- إزاي؟! .. أنا مش معايا مرايا .. والأجسام
جندى ٢ : الموجودة هنا كلها طافية مافيهاش سطح عاكس
.. هانشوف وشوشنا فين؟! ..
- أنا عندى حل .
جندى ١ : إيه؟! ..
- عنك .
جندى ١ : إيه؟! ..
- وعنيا .
جندى ١ : إزاي؟! ..
- جندى ٢ : ممكن تشوف نفسك جوه عنيا .. وأنا أحاول
جندى ١ : أشوف نفسى جوة عنك .. ده الحل الوحيد ..
يللا .. ركز فى عنيا كويس .. فى الننى ..
حاول تشوف صورتك معكوسة جواها ..
(يقتربان فى محاولة للتبركيز فى عيون بعضهما
الآخر) ها .. شوفت إيه؟! ..
- جندى ٢ : (فى يأس) بأحاول أهه .. وأنت شوفت
نفسك؟! ..
- جندى ١ : غريبة .. مش شايف حاجة .. مش شايف أى
حاجة .

- جندى ٢ : ولا أنا .. أنت عنيك مدغششة .
- جندى ١ : لأ .. أنت اللي عنيك بايظة .
- جندى ٢ : ما تغلطش .
- جندى ١ : المفروض أشوف صورتى معكوسة فى عنيك .
- جندى ٢ : ما أنا كمان ما شوفتش حاجة .. مافيش حد
- أحسن من حد .
- جندى ١ : عندك حق .. كلنا فى الهوا سوا .. حتى ملامحنا
- .. مش لاقينها .
- جندى ٢ : أنا تعب .
- جندى ١ : لأ .. أرجوك .. لازم نحاول .. مرة واثنين
- وآلف .. ماحدش عارف لو فضلنا عالحال ده
- مممكن يضيع منا إيه تانى .
- جندى ٢ : ما إحنا ممكن نكتشف حاجات تانية ضاعت منا
- لو فضلنا نفكر بالشكل ده .
- جندى ١ : على الأقل نعرف .
- جندى ٢ : نعرف ؟! .. قصدك نعرف إننا مش عارفين ؟!
- جندى ١ : ليه لأ .. ونسور على اللي ضاع منا .. أول
- خطوة للبحث عن شىء مفقود منك .. إنك تعرف
- إنك فقدته .
- جندى ٢ : أنا مش فاهم حاجة .
- جندى ١ : يبقى حاول نفهم .. ما تقفش تتفرج وبس .. لأنك
- طرف فى معركة .. تقدر تقول لى إحنا بنحارب

- مع مين ؟! .. وضد مين ؟! .. وعشان إيه ؟! ..
تقدر تقول لى احنا فين ؟!
- جندى ٢ : (فى ارتباك) فين ؟!
- جندى ١ : (بإصرار) أبوه فين ؟! .. فى أى بلد ؟! .. فى
أنهو قارة ؟!
- جندى ٢ : (فى معاناة) لأ .. أرجوك .. كفاية كده ..
حرام عليك .. أنا مش حمل الأسئلة دى كلها .
- جندى ١ : ماتحاولش تهرب تانى .. أرجوك جاوبنى .
- جندى ٢ : لأ .. أنت شرير .. عايز تخوفنى .
- جندى ١ : أنت فعلاً خايف .. والدليل إنك خايف تتكلم ..
خايف تفكر .
- جندى ٢ : (فى ألم) أبوس إيدك كفاية .. أنت عايز منى
إيه ؟! .. عايز منى إيه ؟!
- جندى ١ : أنا زى زيك صدقنى .. لازم تساعدنى .
- جندى ٢ : وليه ما تفكرش أنت ؟! .. أسأل نفسك يا أخى .
- جندى ١ : حاولت وما عرفتش .. جايز لما نفكر سوا نقدر
نوصل .
- جندى ٢ : نوصل لإيه ؟! .. أنت أكيد حد مسلطك عليا ..
أنت جاسوس من القيادة عشان تجرجرنى فى
الكلام .. عايز تشوف آخرى إيه .. مش كده ؟!
- جندى ١ : أنا ؟! .. أنا يا نمرة ؟!
- جندى ٢ : ما نقوليش يا نمرة .

- جندی ۱ : آمال أقول لك إيه ؟!
- جندی ۲ : مالکش دعوة .. مالکش دعوة بيا .. فاهم ؟!
- مالك أنت ومال اسمي ؟! .. دلك إيه عشان تحشر نفسك فى خصوصياتى .
- جندی ۱ : (ينفجر بالضحك فى سخرية ممزوجة بالمرارة)
- جندی ۲ : بتضحك ؟! .. بتضحك على إيه ؟!
- جندی ۱ : (مازال غارقاً فى الضحك) على خصوصياتى دى .. أنت لك خصوصيات ؟! .. (يضحك بشدة) يا ابني ده أنت ناسى نفسك .. ناسى شكاك .. خصوصياتك آل (يضحك)
- جندی ۲ : (فى غضب وغضب) أنت قاصد تستفزنى م الأول .. عابز تلخبطنى .. تحيرنى .. أنا فعلاً نسيت اسمى .. وبقيت مجرد نمرة فى قائمة عساكر .. نسيت عنوانى .. حتى صورتى .. تاريخ ميلادى .. بس عارف احنا فين ؟!
- جندی ۱ : بجد ؟!
- جندی ۲ : أيوه .. أنا سمعتهم .. آه .. فى الطائرة .. جابوا سيرة فينتام .
- جندی ۱ : (ينفجر بالضحك) فينتام ؟! .. دى حرب انتهت من سنين .
- جندی ۲ : أرجوك .. ما تقاطعنيش .. ما تلخبطنيش .. قالوا فى المعسكر .. إننا رايعين .. كوسوفا ..

لأ .. سراييفو .. لأ .. لأ .. العراق .. لأ احنا
في الصومال .. لا .. لا .. جنوب لبنان .. في
.. فلسطين .. لأ .. (يرتعد بشدة) الدنيا برد ..
احنا في روسيا .. في الشيشان .. أف .. أف ..
أفغانستان .

جندى ١ : (يضحك بمرارة) مسكين .. مسكين يا نمرة ..

ماتت عيش نفسك .. مفيش فائدة .. ضعت في قلب
الدنيا الواسعة .. تهت في وسط الحرب القايذة .

جندى ٢ : يعنى إيه ؟! .. أنا تهت ؟! .. ضعت ؟! .. لأ ..

(فى ثورة وهياج) لأ .. أنا عايز اسمى ..

رجعولى اسمى .. (ينزع شارته) خذوا نمركم

مش عايزها .. ورجعولى تانى .

جندى ١ : (فى توتر) بتعمل إيه يا مجنون ؟!

جندى ٢ : سيبنى .. ابعده عنى .. مالكش دعوة بيا .

جندى ١ : اعقل يا نمرة .. لو حد لمحك م القيادة ها نروح

فى داهية .

جندى ٢ : داهية ؟! .. أكثر من اللي احنا فيها ؟! .. أنا

لازم أعرف دلوقتى حالاً .. أنا مين ؟! .. وليه ؟! ..

وعشان إيه ؟! .. وفين ؟! .. وإزاي ؟! ..

وإمتى ؟! .. أسئلة كتير فى دماغى لازم أأقيلها

إجابة .. وإلا دماغى هاتنفجر .

(فجأة تدوى أصوات انفجارات وطلق نارى .. صوت القائد
ينطلق فى كل مكان - صفارات إنذار من مصادر متعددة)

جندى ١ : إيه ده .. الظاهر فى غارة ..

ص. القائد: (قسى حسم) تحذير عام .. تحذير عام .. على

جميع القوات التأهب التام .. أكرر .. تحذير عام

.. (يكرر النداء وسط احتدام القتال)

جندى ١ : مكانك بسرعة يا نمرة .

جندى ٢ : مانتوليش يا نمرة .

جندى ١ : فوق بقه .. وخذ مكانك .. امسك سلاحك

ماتضيعش وقت .

جندى ٢ : مش قبل ما أعرف أنا إيه ؟!

جندى ١ : (يدفعه إلى مكانه فى عنف) ما احنا لو متنا

مش هانعرف حاجة .. (صارخاً بعنف) حاسب

يا نمرة .. خذ بالك .. (انفجار مدوى) ..

إظلام

المشهد الثانى

" نفس المشهد السابق - ميدان القتال وقد بدت آثار الدماء واضحة ، جثث الجنود متناثرة هنا وهناك ، جندي ١ و ٢ يرقدان فى إعياء ووهن شديد - إضاءة شاحبة بلون الدم "

جندي ١ : (يعتدل فى رقاذه فى ألم شديد) آه .. آه ..
(يتلفت فى قلق) إيه ده ؟! .. أنا فين ؟!
(يسعل) إيه الدخان ده كله ؟! .. مش قادر آخذ نفسى .. وإيه الريحه الفظيعة دى ؟! .. (يحاول النهوض يتعثر فى إحدى الجثث - يصرخ رعباً) آه ؟! .. إيه ده ؟! .. كل دى جثث ؟!
كل دول ميتين ؟! .. (فى رعب) هوه إيه اللى حصل ؟! .. (يفحص إحدى الجثث - يفاجأ بالرأس تنفصل فى يديه) لأ .. مش ممكن اللى بيحصل ده .. أنا أكيد فى كابوس .. (يتلفت فى حيرة) مفيش حد يكلمنى ؟! .. مفيش حد ببطلع فى الروح حتى ؟! .. مفيش طريق ؟! .. مفيش سكة .. مفيش أى معالم للمكان المخيف ده ؟! ..

- (يتعثر في جسد جندي ٢ الذي يصرخ في ألم
- ينتفض جندي ١ رعباً)
آآه .. : جندي ٢
- (في رعب) آه .. مين ؟! : جندي ١
- أنت اللي مين ؟! : جندي ٢
- (يتفقد وجهه في توتر) هوه أنت ؟! : جندي ١
- (في تلقائية) أيوه .. أنا .. (في استفسار
حائر) أنا مين بقه ؟ : جندي ٢
- مش عارف . : جندي ١
- (يضحك في مرارة) ما أنا عارف . : جندي ٢
- أنت بتضحك ؟! .. قوم شوف احنا فين ؟! : جندي ١
- فين ؟! : جندي ٢
- مش عارف . : جندي ١
- واحنا من امتي عارفين حاجة ؟! .. (يحاول
للنهوض) آه .. (في ألم) آه .. إيه الألم ده ؟!
.. (يتأمل يده في هلع) دم ؟! .. دم ؟!
واضح إنك نزلت كثير .. جرحك أكبر من
جرحي . : جندي ١
- أنت كمان مجروح ؟! .. ليه ؟! .. إيه اللي
حصل ؟! .. أنا مش فاكّر حاجة .. (يتلفت
بحيرة) إيه الجثث دي كلها ؟! .. آه افكرت ..
المعركة !!

- جندى ١ : قصدك المجزرة .
- جندى ٢ : شىء بشع .. شىء فظيع ..
- جندى ١ : الرصاص كان طائر فى السما زى المطر ..
والنار قيادة فى كل مكان .. ماكنش قادر أميز
مين معانا .. ومين علينا ..
- جندى ٢ : (يستأمل كفيه فى هلع) دم ؟ .. دم ؟ ! .. كل
شىء بلون الدم .. الأرض بلون الدم .. التراب
.. والسما .. والهوا .. حتى المية بلون الدم ..
لا .. دى عنيا هيه اللي بتنزف .. كل حنة فى
جسمى فيها جرح .. جرح كبير .
- جندى ١ : (يحاول سد أنفيه بكفيه فى معاناة) صوت
القنابل والرصاص غطى على كل شىء .. حتى
أنات الأكم .. الدمار كان بيزحف .. بيعوى زى
غول وسط غابة .. كان قاصدنى .
- جندى ٢ : ليه ؟ .. ليه ؟ ! .. ليه ده كله ؟ !
- جندى ١ : عشان دى حرب .. يعنى موت .. قاتل
ومقتول ..
- جندى ٢ : وليه ما أكنش أنا القاتل ؟ !
- جندى ١ : وليه ماكنش المقتول ؟ !
- جندى ٢ : عشان أنا ما أعرفش حاجة .. ماعملتش حاجة ..
عشان أنا ولا حاجة .. (بيكى) .. أنا ولا
حاجة ؟ !

يبقى لازم أموت زى أى حشرة .. لازم انداس
بالرجلين زى أى ورقة شجر انقطعت من
أصولها .. لازم أموت عشان أنا ولا حاجة ..
نكرة .. هاموشة فى دنيا واسعة مالهاش آخر ..
صرصرار فى غابة كبيرة .. مالهاش قانون ..
أموت ؟! .. إزاي ؟! .. وأنا أصلاً ما أعرفش
يعنى إيه حياة ؟!

جندى ١ : ماتجهش نفسك بالكلام .. جرحك بينزف .

جندى ٢ : (فى سرود) خطوا السلاح فى ايديا .. سألتهم

بدهشة .. إيه ده ؟! .. قالولى .. ماتخافش ..

شئ لزوم الشئ .. ماكنتش فاهم ساعتها ..

خدت السلاح وسكت .. دلوقتي بس فهمت ..

شئ لزوم الشئ .. السلاح .. لزوم .. الموت .

جندى ١ : (فى ألم ومعاناة) أرجوك .. جرحك بينزف ..

دلوقتي بيحجوا ينقذونا .

جندى ٢ : هما مين ؟! .. خلاص .. احنا انتهينا يا نمرة ..

مفیش أمل .. مفیش .. (يهوى فى إغماء)

جندى ١ : (فى ألم ورعب) لا .. لا يا نمرة .. دايماً فى

أمل .. مش لازم نستسلم .. اوعى تموت ..

ماتسبنيش لوحدى .. طيب .. مش نعرف الأول!

.. احنا مين ؟! .. وليه ؟! .. وفين ؟! ..

هانموت كده ؟! .. تايهين ؟ .. وأى توهة .. لا

اسم .. ولا سن .. ولا عنوان !؟
 (يبكى - يغمض عينيه فى ألم وينكفىء على
 جسد جندى ٢ فى إغماء)
 (لحظات صمت رهيب - يظهر من أقصى عمق المسرح ومن
 قلب الظلام ظل المجنوب - فى منظر مهيب مخيف وقد أخفى
 الظلام ملامحه فأضفى عليه غموضاً ورهبة - أشعث الشعر -
 ممزق الثياب - يتحسس الجثث ويقلبها بعصا غليظة فى يده ..
 إلى أن يصل إلى جسد جندى ١ و جندى ٢ .. يفحصهما فى
 فضول .. أثناء ذلك يصدر أصواتاً مبهمّة كالخوار أو الحشرجة)
 (يضحك بوحشية وهو يفحصهما فى جنون) الدماغ
 .. (يضحك) الدماغ .. (يتصنّت إلى رأس جندى ١) لسه ..
 لسه فيها .. (هامساً فى جنون) الدماغ .

إظلام

المشهد الثالث

" المكان أشبه بكهف أو مغارة فى بطن الجبل - عدة منافذ تؤدى إلى معمرات وسرايب داخل الجبل - إضاءة خافتة تنبعث من شعلة أو مصباح بدائى معلق على الجدار الصخرى " جندى ١ وجندى ٢ ممددان فى إعياء فى أرض الكهف - يتململان فى ألم - يفيقان من غيبوبتهما فى إرهاق وإعياء - ينهضان فى دهشة وحيرة ممزوجة بالآلم - لا ينتبه كل منهما لوجود الآخر "

جندى ٢ : آه ..

جندى ١ : آه .. آه يا دماغى .

جندى ٢ : آه يا ضهرى .. مفاصلى كلها سايبية .

جندى ١ : (يتأمل المكان فى دهشة) غريبة ؟! .. آمال

فين الجثث ؟! .. فين باقى الأموات .

جندى ٢ : (ينتبه فى زعر) آه صحيح .. أنا آخر حاجة

فاكرها وأنا باطلع فى الروح .. (يتأمل المكان

بفرع) تكونشى هيه دى جهنم اللى بيقلوا

عليها؟!

جندى ١ : وليه ما تكونش الجنة ؟! .. أنا ما عملتش حاجة

توديني النار .. بس الجنة هاتكون ضلمة كده ؟!
.. وخانقة كمان .. آمال فين الملائكة ؟! .. فين
الهور العين ؟!

جندى ٢ : مافيش حد هنا واللا إيه ؟!
جندى ١ : لازم يكون فى حد تانى .. (ينادى) يا ..
(يتوقف بحيرة) يا أى حد .. رد عليا .

جندى ٢ : (يتلفت فى دهشة) مين ؟!
جندى ١ : أنت اللي مين ؟!
جندى ٢ : إيس واللا جن ؟! .. ملاك .. واللا شيطان ؟! ..

وإن كنت ملاك .. من بتوع الجنة .. واللا من
بتوع الجحيم ؟!

جندى ١ : أنا بنى آدم .. إنسان .. وأنت ؟!
جندى ٢ : (يقترب منه) أنا كمان .. بنى آدم .. (يفاجأ
ببعضهما)

الاثنتان : (يهتفان فى خيبة أمل) أنت تانى ؟!
جندى ١ : أنت ورايا .. ورايا ؟!
جندى ٢ : أنت اللي كل ما أروح فى مصيبة .. ألاقك

قدامى .. أنت إيه ؟! .. موصوفلى ؟!
جندى ١ : (فى سخرية وتهكم) لأ .. مغرم بسواد عنيك .
جندى ٢ : وجايلك نفس تهزر كمان ؟! .. ده بدل ماتشوف
احنا فين ؟!

جندى ١ : فين ؟!

- جندی ۲ : (فی حقیق) تانی ؟! .. أسئلة تانی ؟! .. باقولك
 إيه .. أنا مش هارد على سؤال واحد بعد كده ..
 كفاية اللي حصل .. أنا مش ناقص وش .. الوش
 اللي في دماغى بكفينى سنتين قدام .
 جندی ۱ : ما هو لازم أسأل عشان أعرف .
 جندی ۲ : أسأل حد غيرى يا أخى .
 جندی ۱ : وهوه أنا شوفت حد تانى وما سألتوش ؟! .. ثم
 تعالى قولى !! .. أنت يا جدع أنت مش مت قدام
 عنيا
 جندی ۲ : ما حصلش .. أنت اللي مت الأول .. أنا أغمى
 عليا بس .
 جندی ۱ : بس أنا ما متش .. الجرح اللي فيا ماكانش جرح
 موت .
 جندی ۲ : يعنى إيه ؟! .. احنا لسه عايشين ؟! .. (فى
 سعادة غير مصدق) مش ممكن .. مش معقول
 .. تصور إننى افكرت إنى رحى النار ؟! ..
 الحمد لله .. أحمدك يا رب .
 جندی ۱ : (يتأمل يديه وجسده) واضح إننا هنا بقالنا كتير
 ..
 جندی ۲ : عرفت إزاي ؟!
 جندی ۱ : مش واخد بالك إن جراحنا مالهاش أثر ..
 جندی ۲ : آه .. صحيح .

جندی ۱ : یا تری مین اللى عالج جراحا ؟! .. ومين اللى
نقلنا هنا ؟! .. لازم يكون حد قريب من هنا ..
لكيد ..

جندی ۲ : معقول برضه .

جندی ۱ : لازم ندور عليه .. (مشيراً إلى أحد المنافذ)
دور عليه فى السكة دى .. وأنا هادور عليه ..
(يبتر عبارته فى حيرة) .. أدور فين ؟! .. إيه
السراديب دى كلها ؟! .. دى حاجة تحير ..

جندی ۲ : فعلاً .. لو كل واحد مشى فى اتجاه .. ممكن
نتوه من بعض .. وماحدش هاعرف إيه اللى
حصل للتانى .

جندی ۱ : مفيش حل غير إننا نستى هنا لحد ما اللى جانبنا
هنا .. يرجع تانى .

جندی ۲ : معقول برضه .

جندی ۱ : واللأ .. افرض إننا مخطوفين .. واللأ حد
أسرنا .. جايز ده سجن .. أو قلعة حصينة ..
لأ .. مش لازم نستى هنا .. لازم نتحرك قبل ما
حد ييجى .

جندی ۲ : يبقى رجلى على رجلك .. آه .. يانعيش سوا ..
يا نموت سوا .

جندی ۱ : المشكلة دلوقتى .. هانمشى فى أى اتجاه ..
السراديب كلها زى بعض .. مفيش أى علامة أو

دليل .

جندى ٢ : أنا أول مرة أشوف سجن مفتوح عالبحرى كده .. لا قفص .. ولا سجان .. ولا قضبان .. ولا حتى باب مقفول .

جندى ١ : ما هي دى المصيبة .. أكثر من باب مفتوح .. ولنا مطلق الحرية نختار أى واحد منهم .. ومع ذلك واقفين محتارين .. فعلاً الحرية أكبر سجن فى الدنيا .

جندى ٢ : حرية ؟! .. واحنا كده أحرار ؟!
جندى ١ : طبعاً .. قدامنا أكثر من باب مفتوح .. ولنا مطلق الحرية نختار أى واحد منهم .. ومع ذلك واقفين متكالبشين .. لأننا لازم نتحمل مسئولية الاختيار ده أياً كان .

جندى ٢ : ولو إنى مش فاهم حاجة .. بس حاسس إنك بتتكلم صح .

جندى ١ : (تبرق عيناه فجأة فى قلق) مش يمكن يكون اختبار ؟!

جندى ٢ : (فى عدم فهم) اختبار ؟!

جندى ١ : أو لعبة .

جندى ٢ : لعبة ؟!

جندى ١ : ليه لآ .. حد بيلعب بينا .. بيتسلى .. زى لعبة الفار والمناهة .

جندى ٢ : (فى مرح) آه .. فاكرها .. أنا كنت باحب اللعبة دى قوى .. الفار يفضل يلف ويدور حوللين نفسه .. تايه جوه المناهة .. و .. (فجأة يتسبه فى غضب) إيه .. قصدك إيه ؟! .. إتنا دلوقتى زى القيران ؟! .. وحد بيـ .. لآ .. ليه لآ ؟!

جندى ٢ : أنا لا يمكن أكون فار فى مناهة .. ولا فار فى بلاعة حتى .. أنا بنى آدم .. لإنسان محترم .
جندى ١ : قصدك نمره محترمة .

جندى ٢ : أى حاجة .. بس مش فار .. أنت عارف الفار آخر ما بيتعب ويتوه بيجراله إيه ؟! .. وحتى لو خرجنا من المناهة .. فكرك اللى بيلعب بينا هاسيينا ؟! ..

جندى ١ : (يقصص جدران الكهف بدقة) طبعاً لآ .. عشان كده أيا كان اللى أحنا فيه .. لازم نتحرك بسرعة.

جندى ٢ : أنت بتعمل إيه ؟!
جندى ١ : بادور على أى كاميرات مراقبة .. أو مفاتيح خفية .

- جندی ۲ : أنت مش بتقول لازم نتحرك بسرعة .. هانعمل
إيه بالكاميرات واللا المفاتيح .. مادام عارفين
أنه بيراقبنا.
- جندی ۱ : احنا لسه مش متأكدين .. ده كان مجرد احتمال .
- جندی ۲ : احتمال !؟ .. واحنا لسه هانخط احتمالات ..
لازم نقطع الشك باليقين ..
- جندی ۱ : عندك حق .. يللا بينا .. (يتحركان فى اتجاه
أحد السرايب - يتوقفان فجأة عند باب)
اشمعنى الباب ده بالذات اللي اخترناه !؟
- جندی ۲ : مش عارف .. تحب نروح فى اتجاه تانى !؟
- جندی ۱ : مش عارف .. خايف يكون التردد ده مش فى
صالحنا .
- جندی ۲ : خلاص .. نكمل .. مادام ده اختيارنا الأول ..
واللى يحصل يحصل .. هيه موة والا أكثر !؟
- جندی ۱ : عندك حق .
- (يواصلان اندفاعهما تجاه السرداب - فجأة ينبعث صوت وقع
أقدام مع حفيف وأصوات مختلطة مع صدى صوت - يتوقفان فى
ترقب وحذر تدور أعينهما على الأبواب فى تتبع للصوت)
- جندی ۲ : إيه ده !؟ .. سامع الأصوات دى !؟
- جندی ۱ : الظاهر فيه حد جاى .
- جندی ۲ : والعمل !؟
- جندی ۱ : نعرف الصوت جاى من أى اتجاه .. وبعد كده

- نفاجاً اللي جاى .
- جندى ٢ : وافرَض كان معاه سلاح ؟!
- جندى ١ : عندك حل تانى ؟!
- جندى ٢ : طبعاً لا .
- جندى ١ : الصوت جاى من هنا . (مشيراً لأحد الأبواب)
- جندى ٢ : (مشيراً لباب آخر) لا .. من هنا .
- جندى ١ : ركز كويس .. اللي عندك صدى صوت .
- جندى ٢ : وليه ما يكونشى اللي عندك أنت هوه اللي صدى ؟!
- جندى ١ : باقوا لك إيه .. خليك عندك .. وأنا عندى اللي يطلع من عنده يهجم عليه الأول والتانى يبقى يساعده .
- جندى ٢ : معقول برضه .
- جندى ١ : أنت ما عندكش غير الكلمة دى ؟!
- جندى ٢ : (مشيراً بالصمت) شوش .. الصوت قريب جداً .. خد بالك كويس .
- جندى ١ : (يتخذ مكانه فى ترقب) حاضر .
- (يتخذ كل منهما موقعه فى تحفز - يتصاعد الصوت تدريجياً فى اقتراب - يرقبان البابين وقد تقلصت عضلات وجهيهما .. يظهر المجذوب من باب مخالف تماماً لما يرقبان - يقف متأملاً الجنديين فى صمت وترقب - وهما لا يزالان ينصتان بتركيز شديد)

- جندى ١ : (بنصت فى دهشة) غريبة .. الصوت اختفى !!
- جندى ٢ : أنا مش سامع حاجة .. يمكن كان بيتهياً لنا ؟!
- جندى ١ : بيتهياً لنا لحننا الاثنين فى وقت واحد ؟! .. مستحيل .. الصوت كان حقيقى .
- جندى ٢ : امال راح فين ؟!
- جندى ١ : (ملتفتاً) مش عارف .
- (يفاجآن بوجود المجنوب - يصرخان فى رعب)
- جندى ٢ : (صارخاً فى خوف) مين ده ؟!
- جندى ١ : طلع لنا منين ده ؟! .. أنت مين ؟!
- جندى ٢ : (فى هلع) أنا ؟! .. أنت ؟! .. احنا ؟! ..
- (فجأة) إيه ؟! .. عايز متنا إيه ؟!
- جندى ١ : (يقترب من المجنوب فى حذر) أنت مين ؟!
- جندى ٢ : (فى رعب) أنا ما عملتش حاجة .. ماليش دعوة بأى حاجة .. وما أعرفش حاجة من أساسه .

(المجنوب يضحك فى صمت وقد برزت نواجذه)

- جندى ٢ : إلحق .. ده ببيضحك .. لأ .. ده بيسن سنانه ..
- (للمجنوب) باقولك إيه .. اسمع يا جدع أنت ..
- لو قربت منى مش هاحصلك طيب .. آه .. أنا
- لحمى مر .. يعنى ممكن يعملك عسر هضم ..
- ده غير الحموضة .. ويمكن يجيب لك أملاح
- كمان .. أنا قلبى عليك .. هاتندم .

- جندی ۱ : (يتأمل المجنوب) أنا متهيألى .. شوفتك قبل كده .
- جندی ۲ : ليه ؟! .. كان ليك الشرف .. وبلعك قبل كده ؟!
- جندی ۱ : أيوه .. فى المعسكر .. افكرت .. مش ده المجنوب اللى كان أحياناً بيظهر فى المعسكر وبعدين يختفى كأن الأرض انشقت وبلعته .. أيوه هوه .
- جندی ۲ : آه صحيح .. ده أنا كنت فاكره شبح .. أو عفريت .. هوه ؟! .. هوه مابيتكلمش ليه ؟! .. وياه اللى جابه معانا هنا ؟! ..
- جندی ۱ : مش يمكن هوه اللى جابنا هنا ؟! ..
- جندی ۲ : (فى رعب) حلو .. يبقى عفريت .. أنا كان قلبى حاسس .
- جندی ۱ : عفريت إيه أنت كمان .. ما أنت شايفه قدامك أهه .. بنى آدم زينا .. من لحم ودم
- جندی ۲ : (فى اعتراض) بنى آدم آه .. إنما مش زينا .. ده مجنون .
- جندی ۱ : ده إيه العنصرية دى ؟! .. مش جايز المجنون اللى مش عاجبك ده هوه اللى يدلنا على الحقيقة ؟!
- جندی ۲ : أنهو حقيقة ؟! .. أنا دماغى خلاص .. بقت فى الطراوة .. مش عارف أنا أصلاً كنت عايز

أعرف إيه ؟! .. ما بتتش عارف أنا مش عارف
إيه ؟!

جندى ١ : أنت بتهلوس يا نمرة ؟!
جندى ٢ : (فى حيرة ومعاناة) دماغى .. باقولك دماغى .
المجنوب : (يكسر فى سعادة) الدماغ .. لسه فيها ..
الدماغ .

جندى ١ : إلحق يا نمرة .. ده بيتكلم ..
جندى ٢ : أمان عايزه كمان يكون أخرس ؟! .. أهو ده اللى
كان ناقص .. المهم دلوقتى نعرف نخرج من
الخنقة دى.

جندى ١ : مش نعرف الأول إحنا فين ؟! .. (للمجنوب)
إحنا فين ؟ .. أرجوك .. لازم تساعدنا .. إحنا
فين ؟!

المجنوب : (فى هدوء عجيب) فى بطنها .
جندى ١ : بطنها ؟! .. هيه مين ؟!
المجنوب : البطن حنت .. رجعت تانى لبطنها .

جندى ٢ : (فى استنكار) بطن مين ؟! .. أما صحيح
مجنون : . يعنى أنا دلوقتى فى بطن أمى ؟! ..
طب إيه اللى جابكو معايا ؟!

جندى ١ : بطن أمك إيه أنت كمان ؟! .. (يتأمل المكان)
يمكن قصده بطن الأرض !! .. (للمجنوب)
مش هو ده قصدك ؟

- المجنوب : (فسي حزن) الأرض !؟ .. مسكينة .. شألتنا
سنين على ضهرها .. واستحملتنا .. لا يوم
تعبت .. ولا اشتكت .. واحنا ناكرين الجميل ..
كفر .. وضلال .. وقلوب ماليها السواد ..
ونفوس بتطفح بالخراب .. وللوقتي .. جايين
نتحامي في بطنها .
- جندى ٢ : (فسي دهشة) إلحق يا نمرة !! .. سامع بيقول
إيه !؟ .. ده كلام واحد مجنون ده !؟
- جندى ١ : فعلاً .. ده طلع أعقل منى ومنك .. ومن عشرة
زينا .. (للمجنوب) أنت إيه حكايك بالظبط !؟
- المجنوب : (فسي سرور) الدماغ .
- جندى ٢ : (للمجنوب) لأ .. باقواك إيه .. أمور الجنان
دى سيبك منها .. إذا كنت مجنون قيراط .. فأنا
أجن منك .
- المجنوب : (يضحك فسي سخرية) مجنون .. وعاقل ..
عاقل ومجنون .. إيه الفرق !؟
- جندى ٢ : تبقى عاقل .. وكنت بتضحك علينا !؟ .. آمال
عامل مجنون ليه !؟
- المجنوب : بأحاول أهرب .
- جندى ١ : تهرب !؟ .. من إيه !؟
- المجنون : من دماغى .
- جندى ٢ : (فسي حيرة) تبقى مجنون .. حد يهرب من

دماغه ؟!

المجنوب : الدماغ .. (يمسك رأسه فى ألم) الدماغ .. فيها
إيه غير الألم والحيرة .. آه .. صداع رهيب ..
لو ما كانتش موجودة .. يمكن كنت ارتحت .

جندى ١ : عشان كده عايز تهرب منها ؟!

المجنوب : يا ريت .. يا ريت أعرف أخلص منها ؟!

جندى ٢ : ما أنت فقري صحيح .. وفاكر إنك لما تعمل
مجنون هانتجنن بجد ؟! .. ماكنش حد غلب .

جندى ١ : استنى يا نمرة .. (للمجنوب) معنى كلامك ده
.. إنك عاقل .. وواعى تماماً للى بيحصل
حوالينا .

المجنوب : للأسف .

جندى ١ : للأسف ليه ؟! .. ده عز الطلب .. ده إحنا ما
صدقنا لاقينا حد عارف حاجة فى المعسكر, ده .

المجنوب : معسكر إيه ؟! .. أنت لسه فاكرا ؟! .. المعسكر
دلوقتى بقه كوم فحم .. ماحدش نجا منه غيركم
أنتم وبس .

جندى ٢ : أنت بتقول إيه ؟! .. آمال إحنا هانعمل إيه
دلوقتى .. هانروح فين ؟!

المجنوب : زعلان ؟! .. زعلان عشان أنقذت حياتكم ؟! ..
كنت عايزنى أسبيكم وسط النار والدمار ؟! .. ده
بدل ما تشكرونى ؟!

جندى ١ : طبعاً إنا لازم نشكرك عالمعروف ده .. بس
هو مايقصدش كده .. هو قصد إنا مانعرفش
أى مكان تانى غير المعسكر .. يعنى دلوقتى
هانروح فين ؟!

المجنوب : وتروحوا ليه ؟! .. أنا أنقذتكم عشان تفضلوا
معنا .. ده أنا ما صدقت لاقيتكم .

جندى ٢ : نعم يا خويا ؟! .. أنت كنت بتقننا عشان
تستعبدنا وتحبسنا معاك فى الخية دى .

جندى ١ : (فى قلبى وريبة للمجنوب) قصدك إيه
بالظبط ؟! .. أنت إيه حكايك يا جدع أنت ؟! ..
وايه المكان اللي أنت جايينا فيه ده ؟!

المجنوب : أرجوكم ماتخافوش منى .. ده أنا ما صدقت .

جندى ١ : ماصدقت إيه ؟!

المجنوب : ماصدقت ألاقى حد فى المعسكر لسه دماغه فيه
.. لسه عنده أمل .. لسه عنده الرغبة إنه يعرف .

جندى ٢ : يعنى كنت بتتجسس علينا .. كنت بتراقبنا ؟! ..
عشان كده خطفتنا ؟!

المجنوب : بالعكس .. ده أنا حاولت أساعدكم .. لما لاقيتكم

تايهين فى حيرتكم .. غرقانين فى بحر من
أدوات الاستفهام والتعجب .. قلت لازم أقف
جنبكم وأساعدكم .

جندى ١ : أفهم من كده إنك عارف ؟!

- المجنوب : (فى تحفظ وحذر) عارف إيه بالظبط ؟!
- جندى ٢ : عارف إحنا مين ؟! .. وليه ؟! .. وعشان إيه ؟!
- المجنوب : يعنى .
- جندى ١ : (فى عنف وثورة) يعنى إيه ؟! .. لما أنت عارف سايبنا ليه تايهين ؟!
- المجنوب : عشان السؤال ده بالذات .. لازم إنتوا اللى تجاوبوه .. لازم توصلوله بعقولكم .
- جندى ٢ : (فى حسرة) عقولنا ؟! .. هيه فين ؟! ..
- المجنوب : ماخذوها مننا .. برمجونا .. مسحوها .
- المجنوب : غلط .. والدليل إنكم لسه أحياء .. لسه بتناقشوا .. وتسالوا .. لسه بتثوروا .. وتغضبوا .. لسه بتشكوا وتخافوا .. لسه بتفكروا .. (يمسك برأسيهما) معقول الراس دى تبقى فاضية ..
- مافيهاش عقل .. لأ .. لسه فيها .. والدليل شعاع الأمل اللى طالع من العينين .. مافيش حياة من غير دماغ .
- جندى ٢ : يعنى إيه ؟! .. ماخدوش عقلى .
- المجنوب : ياخدوه إزاي .. ماقدروش .. أمال أنا جببتكم أنتم بالذات ليه .. عشان دماغكم لسه فيها .
- جندى ١ : يعنى إيه ؟!
- المجنوب : يعنى عقلك جوه راسك .. ويبقى مجنون اللى يقول غير كده .

- جندى ١ : آمال اللى بيحصل لنا ده اسمه إيه ؟!
- المجنوب : ممكن تسميه غفلة .
- جندى ١ : غفلة .
- المجنوب : أو غياب ..
- جندى ٢ : أنا مش عايز فلسفة .. لو كنت عارف إجابة واضحة وصريحة قولها على طول .. أنا مش ناقص غربة .
- المجنوب : (مسترسلاً) وممكن نسميها غربة .
- جندى ٢ : (فى ضجر) أنت هاتخلى قافية ؟! .. لو كنت عارف حاجة قولها .. بلاش إحنا مين ؟! .. إحنا فين
- المجنوب : فى أرض الله الواسعة .
- جندى ١ : فين يعنى بالضبط ؟!
- المجنوب : ودى تفرق كثير .
- جندى ١ : طبعاً .. عالأقل نلاقى خيط .. طيب إحنا إمتى ؟! .. سنة كام ؟! .. شهر إيه ؟! .. يوم إيه ؟! .. بالنهار واللا بالليل .. قول أى حاجة .. أى معلومة .
- المجنوب : كل ده مش مهم صدقونى .. فى حاجات تانية أهم بكثير .
- جندى ٢ : إحنا يا سيدى مش طماعين .. كفاية علينا نعرف إحنا مين ؟! .. وفيين ؟! .. وإمتى ؟! .. وكتر

- ألف خيرك .
- المجنوب : هاتعرفوا .. أكيد هاتعرفوا .. اللي يسأل لازم يعرف .
- جندى ٢ : ما إحنا بنسأل أهه .
- المجنوب : ما تسألنيش أنا .. أسأل نفسك .. دورها فى دماغك .
- جندى ٢ : تانى هابقول دماغك .. ماقولنا خربت .. ماعادش جايبة همها .
- المجنوب : لأ .. ماتقولش كده .. لو خربت .. تبقى النهاية قربت .. يبقى خلاص .. مافيش أمل .
- جندى ٢ : (فى ثورة) على فكرة .. أنت باين عليك نصاب .. وبتسرح بينا .. وأنت زيك زينا مش عارف أى حاجة فى أى حاجة .. أقطع دراعى إما طلعت نمره أنت كمان .
- جندى ١ : (فرحاً) دى تبقى مصيبة .. هيه ناقصة نمر ؟! .. (للمجنوب) ماتتكلم .. ساكت ليه ؟! .. أنت فعلاً كنت مجند فى المعسكر ؟! .. (صارخاً) كنت نمره من النمر ؟!
- المجنوب : (فى ألم) كفاية .. أرجوكم .. كفاية ..
- جندى ١ : تبقى فعلاً كنت نمره .. زيك .. زينا بالظبط .. أكيد أنت لا عارف اسمك ولا سنك .. ولا حتى شكلك .. بس أنت هربت زى الجبان .. وجيت

استخبيت هنا زى أى حشرة حقيرة .. ماقدرتش
تواجه مشكلتك .

جندى ٢ : (مسترسلاً) وجاى تعمل علينا أبو العريف ..

عشان تطفى نار الجهل اللى جواك .

المجنوب : (فى معاناة) أنتم مش عارفين حاجة .. مش
عارفين أى حاجة .

جندى ٢ : (فى سخريه وتهكم) قديمة .. مالحننا عارفين

إننا مش عارفين أى حاجة .. المهم أنت ..
عارف إيه

المجنوب : (فى هروب) أنا ماأعرفش حاجة .. مش
عارف حاجة ..

جندى ١ : كداب .. عنيك بتقول إنك عارف .. بس بتهرب.
المجنوب : كفاية .. أرجوكم .

جندى ٢ : أرجوك أنت .. ماحدش طلب منك تتطوع وتتقنا
.. كنت سبتنا نموت ونرتاح أحسن .. مش نتقنا
وتسببنا نموت بحيرتنا .. لا .. كمل جميلك ..
اتكلم ..

جندى ١ : (فى إصرار) لازم نتكلم .. (فى لهجة
استجواب) اسمك إيه ؟!

جندى ٢ : (فى انفعال) مش مهم .. (للمجنوب فى
استجواب) كنت إيه فى المعسكر ؟ .. عسكرى ؟!
.. واللا قائد ؟! .. فى أى سلاح ؟!

- جندى ١ : مش مهم .. المعسكر مش مهم .. إحنا عايزين
اللى قبل كده .. عندك كام سنة ؟!
- جندى ٢ : اتولدت فين ؟!
- جندى ١ : فاكرك أمك ؟!
- جندى ٢ : فاكرك أبوك ؟!
- جندى ١ : فاكرك البت بتاعتك ؟! .. اتجوزتها واللا لأ ؟!
- الاثنان : (فى صرامة) فاكرك إيه عن حياتك ؟!
- المجنوب : (صارخاً فى ألم) كفاية .. كفاية ..
- الاثنان : تبقى فاكرك كل حاجة .
- المجنوب : حرام عليكم .. ليه عايزين تتبشوا جوايا ؟! .. ده
أنا بقالى سنين باحاول أنسى .
- جندى ١ : تنسى ؟! .. أنت اللى حرام عليك .. أنت مش
شايف حالتنا ؟! .. ده بدل ما تساعدنا .
- جندى ٢ : أرجوك .. يمكن لما تفكر تساعدنا إحنا كمان .
- جندى ١ : لازم تفكر .
- جندى ٢ : افكر بقة .. أرجوك حاول تفكر .
- المجنوب : (فى ألم رهيب) افكر ؟! .. افكر ؟! ..
- باقولكم عمرى مانسيت .. وهيه دى مأساتى ..
- إنى مش عارف أنسى ، مش قادر أهرب من
دماغى .. ذكرياتى عاملة زى مرض جوايا ..
- كل ما افكر إنى خفيت منه .. يرجع يطفح من
جديد .. (يصرخ بألم) مأساتى .. إنى فاكرك ..

- فاكر كل حاجة .
- (تتنايه رعدة عنيفة - يسقط على الأرض - يتلوى فى ألم -
يمسك رأسه ثم يطنه - كمن يستجمع ذاكرته - يكاد يتقيأ)
- المجنوب : فاكر كل حاجة .. من يوم ولانتى .. لأ .. من
قبل ما اتولد بتسع شهور .. من لحظة كتابتى فى
الوجود .. إنسان .
- جندى ١ : يبقى لازم تحكيلنا .
- جندى ٢ : لازم .. كمل جميلك وقولنا .
- المجنوب : أقولكم إيه ١٤ .. عايزين تعرفوا إيه ١٤ ..
- جندى ١ : كل حاجة .
- المجنوب : بس على شرط .
- جندى ٢ : (مندفعاً) موافقين .
- جندى ١ : اسستى يا نمره .. مش لما نعرف الشرط ده إيه
الأول ؟!
- جندى ٢ : أنا موافق على كل حاجة .. بس أعرف أى
حاجة .
- المجنوب : (لجندى ١) قلت إيه ؟!
- جندى ٢ : (مندفعاً) أنا موافق .
- المجنوب : لازم توافقوا أنتو الاتنين .
- جندى ١ : مش قبل ما أعرف شرطك الأول .
- المجنوب : تفضلوا معاً هنا .. ما تسيبونيش وتخرجوا
تانى .

- جندی ۲ : (مستكراً) إيه ؟! ..
- جندی ۱ : (لجندی ۲) جالك كلامى ؟! .. عايز يذلنا .. يستعبدنا .. عايز يدفنا معاه هنا بالحيا ..
- (المجنوب) بقه هوه ده شرطك ؟!
- المجنوب : مش عايزكم ترجعوا للشقا تانى .. صدقونى .. هنا أأمن لكم و ليا .
- جندی ۲ : أمال إحنا عايزين نعرف ليه ؟! .. عشان نخرج من هنا .. نرجع تانى زى ما كنا .. بنى آدمين .. مش مجرد نمر فى قائمة عساكر .. عشان نعيش حياتنا .
- المجنوب : أى حياة ؟! .. برة مفيش غير الموت والخراب .. مفيش غير جثث أموات لابسة زى الأحياء .. عمالة تتشر ريحة الموت فين ما تروح .. برة مفيش غير نفوس خربانة .. كلها الدود والعفن .. مليانة غل وحقد وكراهية .. برة شر مالوش حدود .
- جندی ۱ : ولو .. هانخرج برضة .. أمال كنت بتتقذنا ليه م الأول .
- جندی ۲ : أنت متبب فينا كده ليه ؟! .. ما تحل عنا بقه .. اعتبرنا ما جيناش هنا من أساسه .
- المجنوب : يا خسارة .. يا ألف خسارة .. كنت فاكركم تستحقوا الحياة .. كنت فاكركم لسه فيها

شوية روح .. وكنت فاكركم هاتقهموا .. إنما
للأسف .. طلعتم أغيبا .

جندى ٢ : احترم نفسك وبلاش غلط .

المجنوب : كنت فاكركم بنى آدمين .. لسه فيكم شىء من
الآدمية عشان تستحقوا نقول عليكم بشر .. قلب
يחס .. عقل يميز .. عين تشوف نور الحقيقة
.. كنت فاكركم لسه فيكم نرة خير توهبكم حياة من
جديد .. إنما للأسف .. طلعتم زى كل اللى برة
.. ماتستاهلوش غير الموت .

جندى ٢ : إيه ؟! .. هاتموتنا ؟!

المجنوب : طبعاً لأ .. مش أنتم عايزين ترجعوا ؟! .. يللا
ارجعوا .. أنا مش هامنكمم .. أنتم اللى اخترتوا
ترجعوا للتوهة والحيرة تانى .. نمر .. عساكر
مأجورة .. مجرد أداة قتل ودمار .. زيكم زى
المدفع والدبابة .. مجرد أيادى ممدودة بالموت
.. والتمن شوية هوا فاسد تنتفسوه .. أو شربة
مية ملوثة بدم الضحايا .. يللا اخرجوا .. عيشوا
مع الأموات اللى برة .. قصدى موتوا مع
الأموات اللى هناك .. يللا .. مستنيين إيه ؟!

جندى ١ : مستنيين نعرف .. طريق الخروج .. أنهو واحد
فى دول ؟!

المجنوب : الطريق جوة الدماغ .. والدماغ فاضية .. والقلب

- أعمى .. سكتته أسود من ظلام الليل .
- جندى ٢ : يعنى إيه ؟!
- المجنوب : عقلك فى راسك .. تعرف خلاصك .
- جندى ١ : أنت لا منك .. ولا كفاية شرك ؟! .. لا عايزنا نعرف أى حاجة .. ولا عايزنا نخرج ؟! أنت أنانى .. وطماع .
- جندى ٢ : أنت إنسان مريض .. سايكو .. والدليل إنك عايش فى القبر ده لوحده .. مع نفسك .. ولنفسك بس .. كاره الناس والعالم .. عشان كده دافن راسك زى النعامة .. بدل ماتخرج وتواجه مشاكلك .. عايزنا نبقى زيك ؟! .. ده بعدك .. أيا كان اللي مستيننا برة .. أكيد هايكون أفضل من هنا .
- جندى ١ : على فكرة أنا بدأت اتخفق .. (للمجنوب) أنت هاتقول طريق الخروج منين واللا لأ .
- جندى ٢ : لأ ده إيه ؟! .. اسمع يا جدع أنت .. إحنا اتتين وأنت واحد .. والكثرة تغلب الشجاعة .. ياتقولنا باب الخروج منين .. يا نخلص عليك .
- المجنوب : يا ريت .. فاكرنى خايف م الموت .. لأ .. لأنى ساعة ما هاموت ، هاموت وأنا عارف أنا مين .. وإيه .. وإيه .. عارف تاريخى .. عندى مبدأ .. مؤمن بقضية .. هاموت إنسان واعى

وحاسس بكينونتي بشر .. مش زيكم .. مجرد
شئ فى سديم الكون .. تقدرؤا تقولولى إيه قيمة
الحياة .. من غير هوية ؟!

جندى ١ : بلاش نخلص عليك .. أنا عندى فكرة أحسن ..
ناخذك معانا .

المجنوب : تبقي واهم .. لا هاتقدر تشوف بعينى .. ولا
تسمع بودانى .. ولا تدخل جوه دماغى .. لازم
توصل بنفسك ..

جندى ٢ : (صارخاً بغيت) يبقى لازم تقولنا باب الخروج
منين .

المجنوب : يا عميان .. يا مغفلين .. هوه باب واحد واضح
قدام عنيكم .. بس غايب عن عقولكم .. الدماغ
.. الدماغ هيه الطريق ..

جندى ١ : هانرجع للجنان تانى ؟! .. فى أكثر من باب
قدامنا .. أنهو فيهم ؟!

المجنوب : هوه باب واحد يا جهلة .. مش شافينه ؟! ..
باب الخلاص .. أنتوا إيه ؟! .. فتخوا قلوبكم
وشوفوا .. شوفوا بقلوبكم الخلاص قدام عنيكم
.. واضح زى نور الشمس .. واللا أنتم خلاص
.. نهاركم بقه زى ليلكم ؟! .. ضلمة ؟!

(فجأة يظلم المسرح تماماً ويختفى المجنوب)

جندى ٢ : (فى الظلام) إيه ده ؟! .. مين طفى النور ؟!

جندی ۱ : النور أساساً كان جاى منين ؟! .. أنا لا شوقت

لمبة .. ولا لمحت فانوس !!

جندی ۲ : بس أنا كنت شايف كويس .. النور راح فين ؟!

جندی ۱ : السؤال دلوقتى .. النور كان جاى منين ؟! ..

دخل إزاي ؟! كان موجود واللّا ما كانت

موجود أصلاً .. وإحنا دلوقتى فعلاً فى

ضلمة؟! .. واللّا عنينا هيه اللّى عميت ؟!

جندی ۲ : (فى رعب) إيه ؟! .. لأ .. بلاش كآبة وحياة

أبوك .. هيه ناقصة كمان عما ؟!

(فجأة يضاء المسرح)

جندی ۲ : (يقفز فى سعادة) هيه .. هيه .. النور جه ..

يعنى ما طلعتش أعمى .

جندی ۱ : الحمد لله .. (فى حيرة) غريبة .. النور ده

جاى منين ؟! .. مفيش أى مصدر لشعاع نور

واحد ..

ص المجنوب: النور والهوا .. زى الحب والخير .. والأمل ..

منذ الأزل مخلوقة ويا البشر .. تهديه ..

وتحميه .. وتعينه .. وهوه مغرور جوة نفسه ..

مش عايش غير لنفسه .. مش شايف .. غير

نفسه .

جندی ۲ : هوه راح فين ؟!

جندی ۱ : هرب الجبان .. هرب فى الضلمة ..

- جندی ۲ : والعمل دلو قتی ؟! .. هانخرج من أى باب ..
- جندی ۱ : مفیش حل غیر ایننا نحاول .. مفیش غیر طریق واحد للخروج .. هوه قال کده .
- جندی ۲ : بس قال جوة الدماغ .. بیه .. هیه دماغی ناقصة أَلغاز ؟!
- جندی ۱ : قصده نفکر .. ونقرر .. ونختار .. وبعدين ننفذ .. والطریق اللى نختاره یحدد مصیرنا .
- جندی ۲ : یعنی ممکن بعد ده کله .. ما نوصلش ؟! .. ده إیه وجع القلب ده ؟!
- جندی ۱ : عندک حل ثانى ؟!
- جندی ۲ : سؤال وجیه .. طبعاً لا .
- جندی ۱ : بیبقى تفکر وأنت ساکت .. (یفحصان الأبواب فی حيرة)
- جندی ۲ : حادی بادی کرنب زبادی ..
- جندی ۱ : یا ترى .. الببیان دى وراها إیه ؟! ده .. لا .. ده ؟!
- جندی ۲ : شاله وحطه کله على دى ؟! .. لا .. ده ؟!
- جندی ۱ : یا رب .. الباب ده ؟! .. لا .. ده ..
- جندی ۲ : أنا اتلخبطت .. متهیأ لى ده ..
- جندی ۱ : لا ده ..
- جندی ۲ : ده ..
- جندی ۱ : لا ..

جندی ۲ : ده ..

(يدوران حول بعضهما فی حیرة وإعیاء)

ستار الختام

الحقيقة ..
كلمة من عمر الزمان..
كلمة تايهة..
زي موجة..
وسط بحر ملوش أمان..
زي دم بيجري فينا..
زي نور قدام عنينا..
زي شمس بتلاقينا..
مهما ليل الحيرة كان..
الحقيقة..
ياللي بتسأل هيه فين؟
الحقيقة عايزة قلب يحس بيها
مش عنين..
عايزة ضمير لساها بينبض بالحياة
الحقيقة..
روح بتبحث عن كيان

Bibliotheca Alexandrina



0679446